

Ներսես Շնորհալի
ԹՈՒՐԹ ԸՆԴՀԱՆՐԱԿԱՆ

ՑԱՆԿ ԳԼԽՈՑ

- [Ա] ԹՈՒՐԹ ԸՆԴՀԱՆՐԱԿԱՆ ՆԵՐՍԵՍԻ ԿԱԹՈՒՂԻԿՈՍԻ ՀԱՅՈՑ ԱՌ ՀԱՄՕՐԷՆ ՀԱՅԱՍԵՌ ԱԶԻՆՍ, ՈՐՈՑ ՏԵՍՉՈՒԹԻՒՆ ՀԱԲԱՏԱՑԱԲ ՆՄԱ Ի ՏԵԱՌՆԷ
- [Բ] ԱՌ ԿՐՕՆԱԲՈՐՍ ԽԱՐԱԶՆԱԶԳԵԱՑՄ՝ ՈՐ Ի ՎԱՆՈՐԱՅՍ
- [Գ] ԱՌ ԱՌԱԶՆՈՐԴՍ ՍՐԲՈՑ ՈՒՆՏԻՑ ՎԱՆԱԿԱՆԱՑ
- [Դ] ԱՌ ԱՌԱԶՆՈՐԴՍ ԵԿԵՂԵՑԻՈՅ՝ ՈՐ ԵՆ ՅԱՇԽԱՐՀԻ, ՈՐ ԿՈՉԻՆ ԵՊԻՍԿՈՊՈՍՈՒՆՔ
- [Ե] ԱՌ ԴԱՍՍ ՔԱՀԱՆԱՅԻՑ
- [Զ] ԱՌ ԻՇԽԱՆՍ ՈՐ ԸՍՏ ԱՇԽԱՐՀԻ
- [Է] ԱՌ ԶԻՆՈՒՈՐԱՑ ԴԱՍՍ
- [Ը] ԱՌ ՔԱՂԱՔԱԿԱՆՍԴ
- [Թ] ԱՌ ԵՐԿՐԱԳՈՐԾՍ ԵՒ ՀԱՄՕՐԷՆ ԺՈՂՈՎՐԴԱԿԱՆՍԴ
- [Ժ] ԱՌ ԿԱՆԱՆՑ ԴԱՍՍ

**ԹՈՒՐԹ ԸՆԴՀԱՆՐԱԿԱՆ ՆԵՐՍԵՍԻ ԿԱԹՈՒՂԻԿՈՍԻ ՀԱՅՈՑ ԱՌ ՀԱՄՕՐԷՆ
ՀԱՅԱՍԵՌ ԱԶԻՆՍ, ՈՐՈՑ ՏԵՍՉՈՒԹԻՒՆ ՀԱԲԱՏԱՑԱԲ ՆՄԱ Ի ՏԵԱՌՆԷ**

Ներսես ծառայ Քրիստոսի եւ ողորմութեամբ նորին կաթուղիկոս Հայոց: Ընդհանուր հաւատացելոց հայկականացո սեռից, որք յարեւելս՝ ի սեփական աշխարհոյ Հայաստանեայց բնակեալք, եւ որք յարեւմտեան կողմանոյ սահեալք նժդեհութեամբ, եւ որք ի միջերկրեայս՝ ի մէջ այլալեզու ազանց տարաբերեալք, եւ որք յիւրաքանչիւր յեզերս աշխարհաց ըստ մեղաց մերոց ցրուեալք ի քաղաքս եւ ի դղեակս, ի գիւղս եւ յագարակս, որոց այդոցիկ ամենեցունց՝ քահանայապետաց եւ քահանայից, վանականաց եւ քաղաքայնոց, իշխանաց եւ իշխեցելոց, զինուորաց դասուց՝ ծիավարժից եւ հետեւակաց, գաւառապետաց եւ գործակալաց, տանուտէրաց եւ երկրագործաց, վաճառականաց եւ արուեստագիտաց եւ որոց միանգամ ի զանազան ճանապարհս ընթանան կենցաղոյս՝ ըստ ընտրութեան կամաց եւ յօժարութեան, արանց եւ կանանց, մանկանց եւ երիտասարդաց, կատարելոց եւ ծերոց, որք ըստ օրինաց աշխարհի քաղաքավարեալք, եւ որք գերաշխարհիկք են վարուք, ողջոյն սիրոյ եւ խաղաղութեան հասցէ յԱստուածընկալ եւ փրկական սրբոյ նշանես եւ ի հրեղէն լեզուաց Յոգւոյն ընդունողաց առաքելական նշխարաց, եւ ի սուրբ Լուսաւորչին մերոյ Աջէս եւ Աթոռոյս: Որոց առաջի պաղատիմք յաղաչանս՝ որ առ Աստուած, յաղագս ոգւոց ձերոց փրկութեան, բանալ զականջս մտաց ձերոց յունկնդրութիւն աստուածայնոց բանիցս այսոցիկ, զոր հանդերձեալ ենք ի պատուիրանաց Աստուծոյ դնել առաջի ձեր որպէս զի՝ առաջնորդեալք մեօք ի շաւիղս արդարութեան՝ արժանի եղիցի իւրաքանչիւրոք ի ձէնջ՝ միոյ օթեւանաց տան Հօր երկնաւորի լինել ժառանգաւոր:

Հայցեն եւ ես յամենեցունց՝ աղօթս առնել եւ վասն մեր՝ բարուք տալ Աստուծոյ զհամար տնտեսութեանն, որ վասն ձեր, յորժամ կոչեցեալ պահանջիցէ ի մէնջ:

Գիտութիւն լիցի ամենեցուն ձեզ, զի հայրն մեր հոգեւոր եւ եղբայրն ըստ մարմնոյ՝ սրբազան Կաթողիկոսն Գրիգորիոս, աթոռակալն եւ արեանառուն մեծի Լուսաւորչին Հայաստանեայց եւ համանմանն նմին մաքրութեամբ անձին եւ իմաստութեամբ, այն, որ բարուք հովուեաց երկայն ժամանակաւ զհօտոյ բանաւոր, զոր ետ ցնա Քրիստոս ըստ Պետրոսի՝ թէ «Արածեա՛ զոչխարս ին» [Յովհ. ԻԱ 17]. որոյ հասեալ ի կատարունն հասակի՝ ըստ նահապետացն կարգի, նախ քան զվախճանն ազդունն եղեալ նմա ի Հոգւոյն, կոչեաց զեպիսկոպոսունս եւ զվարդապետս եւ զհարս սրբոյ լերինն եւ զորս ի յայլ կողմանց: Եւ թպէտ եւ մեք ի բազում անգամ կոչմանէ նորին յայտոսիկ՝ հրաժարեաք յառաջին ժամանակսն, անարժան զանձն վարկանելով, սակայն յայժմուս՝ ակամայ բռնազբօսելով զմեզ՝ ինքն ու ժողովք եպիսկոպոսացն, ձեռնադրեաց զմերս անարժանութիւն յաթոռ Կաթողիկոսութեան ազգիս Հայկայ եւ տանն Թորգոմայ:

Եւ իբրեւ կատարեաց զգործ հրամանին՝ որ ազդեցաւ նմա ի վերուստ, յետ երից ամսոց փոխեցաւ իբր կոչմամբ առ Քրիստոս, դասաւորելով ընդ հարսն՝ հայրապետսն. ընդ առաքեալսն՝ երկոտասանիցն լրունն. ընդ հալածեալսն վասն արդարութեան՝ համբերողն ի հալածանս, եւ ի զանազան փորձութիւնս ի հակառակացն ճշմարտութեան, ընդ փառաւորեալսն՝ պատուեալն Յաստուծոյ եւ ի մարդկանէ ի կեանս: Որոյ եւ մահ՝ պատուական եղեւ առաջի Տեառն՝ ըստ գերագունից սրբոցն, զորոց ասէ մարգարէն. Ինքն նաւու հաւատոյ ընդ ծով աշխարհիս՝ հողմով Հոգւոյն ուղղակի նաւապետեալ ճշմարտութեամբ եւ առաքինութեամբ, եհաս անվնաս յանքոյք եւ յառանց ալեաց նաւահանգիստն. եւ զմեզ եթող ի տաժանելի եւ յաղցաւոր կեանս, ի մէջ օձից եւ կարծաց եւ զանազան խածանօղ գազանաց՝ երեւելեաց եւ աներեւութից. եւ ոչ այս միայն, այլեւ ծանրութեան բեռանց ի ներքոյ՝ հոգեւորաց եւ մարմնաւորաց: Յորոց կրից թեթեւացեալ ինքն թեաւ յիմանալեացն կայանս՝ մերունս տկար եւ անզօր անձին յանձն արարեալ բառնալ թիկանց զծանրութիւն հոգոց ամենայն եկեղեցեաց:

Եւ իմ յայտոսիկ եղեալ՝ զարհուրիմ սարսեալ, զահ եւ զերկիւղ դատաստանին Աստուծոյ զմտաւ ածելով, որ վասն հովուաց եւ առաջնորդաց՝ ի Հին եւ ի Նոր կտակարանս ասացեալ: Մինչ զի՝ ոչ «տալ քուն աչաց՝ կամ նինջ արտեւանաց» [Սաղմ. ԾԼԱ 4], յերկիւղէ այսոցիկ՝ չարչարեալ ոգւոյ իմոյ: Քանզի ի բազումս եւ ի զանազանս բաժանին անուանս եւ իրս մի գործ տեսչութեանս ոգւոց՝ որ կոչի կաթողիկոսութիւն եւ հայրապետութիւն, եպիսկոպոսութիւն եւ քահանայութիւն. եւ մի քան զմի առաւելեալ եւ նուազեալ: Քանզի՝ որ մեծն է ի սոսա, ծանրագունի բեռանց է ի ներքոյ, որպէս պարունակօղ զամենայնն: Սակայն, ըստ գործոյն՝ անուանադրութիւնքն մի եւ նոյն են իւրաքանչիւրոցն՝ քահանայութեանն եւ քահանայապետութեանն:

Քանզի՝ վերակոչին ծնօղ, դայեակ, վարդապետ, բժիշկ, դէտ, հովիւ, առաջնորդ, միջնորդ, դատաւոր եւ այլ եւս յոլովագոյն անուանս, որովք խորհուրդ աստուածպաշտութեանն կատարի, եւ օրէնք եկեղեցւոյ Քրիստոսի ամբողջ մնայ:

Եւ արդ՝ զհա՛րդ օտար եղելոց ի մօրէ՝ կարիցէ լինել ոք ծնօղ, կամ դայեակ ըստ Պօղոսի. զի ասէ՝ «Որդեակք իմ, զորս երկնեմ վերստին մինչեւ նկարեսցի Քրիստոս ի ձեզ» [Գաղ. Դ 19]. եւ դարձեալ «Որպէս դայեակ մի՝ որ սնուցանիցէ զմանկունս, այնպէս գթացաք ի ձեզ» [Ա Թես. Բ 7-8], Չի ծնեալքն բնութեամբ սիրեն զծնօղսն. եւ սնեալքն զդայեակսն: Իսկ առ որս փոխանակ սիրոյ՝ ասելութիւն եւ օտարութիւն,

զի՞նչ յոյս գոյ ծնանելոյ զայնպիսիսն վերստին՝ աստուածեղէն բանին
յապաշխարութիւն, կամ սնուցանելոյ հայրօրէն՝ ուսմամբ եւ երկիւղի Տեառն զնոսա:

Ո՞րպէս հնար է՝ լինել վարդապետ եւ ուսուցիչ եւ քարոզ, ելանել ըստ հրամանին
Աստուծոյ ի վերայ բարձու լերին Սիօնի՝ որ է եկեղեցի սուրբ եւ բարձրացուցանել
զբարբառ Աւետարանին եւ ո՛չ երկնչել. կամ ըստ Պօղոսի՝ որ առ Տիմոթէոս քարոզել
զբանն՝ «ի ժամու եւ ի տարածամու. յանդիմանել սաստել եւ մխիթարել» [Բ Տիմ. Դ 3-
4]. ուր աշակերտեալքն ցրուեալք են, եւ ոչ ժողովեալք ի վարժարանի. եւ ո՛չ սիրողք
վարժից ճշմարիտ իմաստութեանն, այլ ստութեան եւ նանրութեան, եւ առ չարութիւնն
կատարեալք, եւ ի բարեաց տղայացեալք:

Ձիա՞րդ բժշկական գործոյն կարենք լինել նմանօր՝ առ հիւանդացեալ ոգիսն ի
խայթմանէ կամակոր վիշապին, ի բնաւորականաց կամ յանբնականացն ախտից
բժշկել ջանալով, ուր ախտացեալքն ոչ միայն ոչ են ի խնդիր առողջարար արուեստի
հոգեւոր բժշկաց, այլեւ դժկամակ լինին յարբումն դեղոցն օգտակարութեան, եթէ ոք
մատուցանէ նոցա յանդիմանութիւն կամ խրատ, ըստ ստամոքսացաւոցն
նմանութեան, որոց դառն մաղձիւք ապականեալք իցեն: Եւ ոչ միայն այս, այլեւ
ընդդիմաբանեն եւս նոցին, թէ բժիշկ՝ նախ զանձն քո բժշկեա յայդպիսի ցաւոց, եւ
ապա առ իս մատիցես յանդիմանօր քո բանիւ:

Կամ զիա՞րդ այնքան հեռացելոց ի մէջ տեղեալ եւ սիրով՝ հնար է լինել դէտ, ըստ
հրամանին Աստուծոյ՝ որ առ Եզեկիէլ, թէ՛ «Որդի մարդոյ դէտ կացուցի զքեզ տանդ
Իսրայէլի, զի թէ ոչ աղաղակաւ ազդ արասցես նոցա զդարանակալութիւն եւ
զասպատակ թշնամւոյն, եւ նոքա սպանցին կամ գերեսցին, զարիւն նոցա ի ձեռաց
քոց խնդրեցից» [Եզեկ. Գ 17]: Մի միայն ունիմք մխիթարութիւն յայտսիկ զմիւս բանն՝
գոր աւէ Աստուած առ սոյն մարգարէ՝ «Ձի թէ զձայն բարբառոյ քո լուիցեն, եւ անգոյշ
եղեալ կորիցեն, դու զանձն քո ապրեցուցեր՝ ասէ, եւ արեան իւրեանց ինքեանք լինին
պարտականք» [Եզեկ. Գ 19]:

Ձիա՞րդ հնար է մեզ եւ զհովութեանն օրէն լնուլ ի վայրի դալարուջ աստուածային
օրինացն հանգուցանել, եւ կենդանարար ջրով հոգւոյն իմաստութեամբ սնուցանել,
զգայլսն հալածել, եւ զվիրաւորսն բժշկել, ի բացեայ լինելով հովուին եւ հօտիդ յոյժ
հեռաւորութեամբ ի միմեանց:

Ձիա՞րդ կարելի է մեզ լինել առաջնորդ այնպիսեաց, որք ոչ զկնի հետոց առաջնորդին
յօժարին ընդ արքունականն ընթանալ ճանապարհ, որ տանի հասուցանէ յերկինս, այլ
ընդ լայն եւ ընդարձակ պողոտայն, որ հասուցանէ յատակս դժոխոց:

Ո՞րպէս կարացուք լինել միջնորդ ի մէջ Աստուծոյ եւ մարդկան՝ այնոցիկ, որք ոչ
կամիցին պահել զդաշինս ուխտին, զոր եղին ընդ Աստուծոյ՝ մկրտութեամբն
հրաժարեալ ի սատանայէ եւ յամենայն գործոց նորա եւ ի պատրանաց նորա, այլ
ուխտագանց եղեալ ուխտին, զոր եղին Զոգւոյն Սրբոյ յաւուրն փրկութեան, զկնի
չարին ընթանան յօժարական կամօք՝ բանիւք եւ գործովք:

Ձիա՞րդ կարիցենք եւ զքահանայապետական դատաւորութիւնն ի գործ արկանել առ
ազգ այնպիսի, որք ոչ միայն դատաստանի աստուածային օրինացն ոչ ի ներքոյ
անկեալ հնազանդին, այլեւ դատաւորաց եկեղեցւոյ՝ նստին դատաւորք
անիրաւութեան, եւ ինքեանք գերանալից աչօք եղեալ՝ դատին միշտ չարաչար
բամբասանօք եւ անդուռն բերանով զշիւղս յանցանաց վարուց նոցա:

Եւ արդ՝ վասն զի այսոքիկ այսպէս, զարհուրիմ եւ դողամ յերկիւղէ դատաստանացն
Աստուծոյ. մի՛ գուցէ այս գործ տնտեսութեան՝ յանձն եղեալ ինձ յԱստուծոյ, փոխանակ

փառաց՝ անարգութեան լինիցի պատճառ, եւ փոխանակ անթառամ պսակացն՝ ըստ խոստմանն ամօք երեսաց: Եւ փոխանակ լսելոյ թէ՛ «Ծառայ՛ բարի եւ հաւատարիմ» [Մատթ. ԻԵ 21], որպէս եւ ծառայքն՝ որք յարգեցին զտուեալ տաղանդսն եւ շահաբերք եղեն Տեառնն. զահագինն լսել եւ զսարսափելին հրաման ընդ ոչ շահեցելոյ ծառային, թէ՛ «Ծառայ՛ չար եւ վատ, պարտ էր քեզ զարծաթ բանի իմոյ արկանել ի սեղանաւորս, որք են ոգիք մարդկան, եւ ես եկեալ տոկոսեօք պահանջի զիմն» [Մատթ. ԻԵ 26]. այսինքն՝ ընդ բանին, զոր ի քէն լսէին, եւ զգործոցն կատարումն ի լսողացն: «Եւ զի դու ո՛չ ետուր քոց ծառայակցացն զկերակուրն հոգւոց՝ յորժամ ժամանակ էր լսելոյ, վասն այդորիկ՝ ասեմ, առէք ի դմանէ զարծաթ շնորհաց իմոց, եւ տուք այնմ, որ կատարելապէս աճեցոյց զբան իմ, ըստ կատարեալ թւոյ տասն քանքարացն. եւ զծառայո՛ւ անպիտան եղեալ ի գործ պաշտաման իմոյ, յորում եղի, հանէք ի խաւարն արտաքին» [Մատթ. ԻԵ 27-30]:

Եւ թէ զի՞նչ արարից, զի ապրեսցի անձն իմ յահագնալուր սպառնալեաց աստի, տարակուսելի է ինձ: Քանզի շրջել առ ամենեսեան՝ ընդ ամենայն կողմանս աշխարհի, եւ քարոզել զբանն Աստուծոյ ըստ նմանութեան առաքելոցն սրբոց, անկարելի է՝ յաղագս ժամանակիս չարութեան եւ բազմիշխանութեան: Եւ քաղաք թագաւորական եւ բազմաժողով ոչ գոյ ազգի մերում, որպէս զի անդանօր նստելով յաթոռ հայրապետութեան եւ վարդապետութեան՝ ուսուցանէաք ժողովրդեան մերոյ զաստուածային պատուիրանս, ըստ առաջի հայրապետացն եւ վարդապետաց: Այլ ենք իբրեւ զայծեամն յորսորդաց եւ ի շանց փախուցեալք՝ ի քարանձաւիս յայս բնակելով, յորում ոչ եւ մարմնական հարկաւոր պիտոյիւք շատացեալք ի գիւղից, կամ յագարակաց, յորոց ունիմք եւ ո՛չ մի: Նաեւ ո՛չ անդաստան հողոյ, զի վաստակօք եւ աշխատութեամբ զպէտս մեր լնուաք, եւ ո՛չ օգնութիւն ուստեք, որպէս արժան էր, եւ թագաւորաց եւ յիշխանաց ի Քրիստոս հաւատացելոց: Այլ միայն ի Տեառնէ Աստուծոյ՝ ըստ մարգարէին խրատու, զի ասէ՝ «Ընկեա ի Տէր զհոգս քո, եւ նա կերակրէ զքեզ» [Սաղմ. ԾԴ 23]. եւ դարձեալ՝ «Ո՞ յուսացաւ ի Տէր, եւ յամօք եղեն» [Սաղմ. ԻԴ 20]: Եւ զի այսոքիկ այսպէս, եւ սպառնալիք դատաստանին Աստուծոյ աններելիք ի վերայ պղերգացն հովուաց եւ հեղգացելոց, որք ոչ արածեն զբանաւոր հօտս Քրիստոսի յաստուածեղէն նորա վարդապետութիւնս, եւ ոչ արբուցանեն զջուրն կենդանի՝ իմաստութեանն Աստուծոյ:

Եւ զի՛ իմն տարտամութեան անկաւ այս վիճակ հոգեւոր տնտեսութեան, յորում ոչ է արթնութիւն ոգւոյ եւ ոչ զօրութիւն մարմնոյ եւ ոչ պատահումն բարւոյ ժամանակի, ըստ վերագրելոցդ: Վասնորոյ՝ անգիտանամ եթէ զի՞նչ գործեցից: Թողուլ լքանել զհօտս հովուապետին ի խնամոց հովուութեան, եւ զգառինսն ի գայլոցն տեսանելով յափշտակեալս եւ անտես առնել, անհաւատութեան է նշանակ, մանաւանդ՝ գիտողի զկանս Աստուծոյ եւ ոչ տգիտի: Քանզի թէ առ տգիտութեան որ գործէ զանպատշաճն՝ ընպէ՛ գան, բայց սակաւ, ըստ տէրունական հրամանին, իսկ գիտութեամբն՝ բազումս եւ սաստկագոյնս, թէպէտ եւ յայժմուս ոչ որ է տգէտ յընտրողութիւն բարւոյն եւ չարի, թէեւ՝ կանաւ որ տգիտանայ: Իսկ փութալ ի խրատել եւ ուսուցանել՝ ըստ աստիճանիս գործոյ հարկաւորութեան, եւ միշտ ճմլել լեզուաւ զկաթն բանին Աստուծոյ ի բերանս հոգւոց տղայացելոց ի Քրիստոս, ահա յանհնարիցն է, ըստ վերագրելոցդ՝ այսմ ժամանակի եւ տեղոյ, անձամբ մերով զայս առնել: Սակայն, զի մի՛ ամենեւին անպտուղք եղիցուք առ ձեզ հաւատացեալ ժողովուրդք մեզ ի Յոգւոյն Աստուծոյ, արդարապէս դատեցաք մեք, եւ որ ընդ մեզ եպիսկոպոսունք եւ վարդապետք, յիշեցուցանել ձեզ գրով զպատուիրեալսն յԱստուծոյ ի հին եւ ի նոր կտակարանս: Նմանելով յայսմիկ մեծի առաքելոյն Պօղոսի, որ ոչ միայն շրջելով ի տար աշխարհ քարոզէր զաւետարանն, որպէս եւ ինքն իսկ ասէր՝ յերուսաղեմէ մինչ ի Լիւրիկեա, այլեւ ի կապանս զոլով՝ թղթովք հաստատէր զաշակերտեալսն, որպէս եւ յայտ առնէ գրելովն՝ «աղաչեմ զձեզ ես, որ կապեալս եմ ի Տէր, արժանի գնալ կոչմանն, յոր կոչեցարուք» [Եփես. Դ 1]:

Ընդ նմին եւ մեք իբրեւ ի կամաւոր բանտէ եւ ի կապանաց՝ յայսմ տօթագին քարանձաւի արգելեալք, գրով ձեռնին մերոյ խօսիմք, որպէս բերանով ընդ ամենեսին, որք ունիցին ականջս լսելոյ: Ոչ զմեր ինչ բան, այլ զառաքելոցն եւ զմարգարէիցն եւ զվարդապետացն եկեղեցւոյ երկրորդելով զբանից նոցա զօրութիւն ի լսելիս ձեր: Ձորս եթ լուեալ՝ յօժարութեամբ ի միտ առնուցուք, որպէս բարի երկիր եւ պարարտ զսերմանեալսն յինքեան՝ եւ գործով պտղաբերեսցիք Աստուծոյ, անձանց ձերոց փրկութեան եւ մեզ վարձուց լինիցիք պատճառ: Ապա թէ ոք ոչ լուիցէ մտադիրութեամբ, այլ արհամարհիցէ որպէս ապստամբ յԱստուծոյ. եւ կամ թէ լուեալ եւ ոչ պտղաբերեսցէ գործով զարդարութիւն, այլ անզեղջ հոգւով եւ ապառնում սրտիւ կայ անյուսութեամբ ի մեղս անդարձ մինչ ի վախճան, մեք անպարտ ենք յարենէ նորա առաջի Քրիստոսի՝ վկայութեամբ Աստուծոյ եւ հրեշտակաց նորա եւ ձեր լսողացոյ ամենեցուն: Քանզի ոչ խորշեցաք, կամ արգելաք ի պատմելոյ նմա զբանն Աստուծոյ:

Եւ արդ՝ որպէս ի մասունս մարմնոյ քան զամենայն պատուականագոյն եւ առաջին՝ զլուխն է, յաղագս տեղւոյն բարձրութեան եւ զգայարանացն ի նմա եղելոց, եւ ապա այլքն յանդամոց մի ըստ միոջէ. այսպէս եւ յանդամս հոգւոյն՝ մեծ եւ առաջին իբրեւ զգլուխս է հաւատոյն ճշմարտութիւն. եւ ընդ նմին յարմարեալք որպէս անձն ընդ գլխոյ՝ գործք արդարութեան մեծամեծք եւ փոքունք, ըստ պատուիրանացն Քրիստոսի Աստուծոյ: Վասն այսորիկ եւ մեք նախ եւ առաջին զգլխոյն ամենայն բարութեանց զհաւատոյն բուռն հարկանելով դիցուք առաջի լսողացոյ, ոչ նորոգ ինչ գրելով, այլ ի վերայ հիման առաքելոց եւ մարգարէից եւ հարց սրբոց շինելով համառօտ բանիւ, զի մի յանուստուն տգիտաց լսելով բան, որ ոչ ըստ ուղղափառ եկեղեցւոյ դաւանութեան, այլ արտաքոյ Աստուածաշունչ գրոց բարբառին ի կործանումն լսողաց, մոլորիցի ոք ի ճշմարտութենէն: Այլ զի գիտիցէք, թէ յո՞վ արդեօք հաւատացիք ի մկրտութեանն աւուր, ըստ Պօղոսի՝ որ ասէ՝ «Գիտեն յո՞ հաւատացեալն են» [Տիմ. Ա 12], եւ կամ թէ՛ որպէս արժան է ունել ուղղափառ քրիստոնէին զդաւանութիւն հաւատոյն, յորում եւ սկսանիմք պարզ եւ յայտնի բանիւ ցուցանել զհաւատոյ ճշմարտութիւն:

Պարտ եւ արժանի է Քրիստոսի երկրպագուաց եւ յանուն սուրբ Երրորդութեանն մկրտելոց խոստովանել համագոյ զերիս անձնաւորութիւնն՝ Հօր եւ Որդւոյ եւ Հոգւոյն սրբոյ, մի բնութիւն եւ մի աստուածութիւն եւ մի իշխանութիւն՝ համապատիւ եւ զուգափառ: Ոչ յումեքէ եղեալ եւ ոչ յետոյ սկսեալ եւ ոչ ի խոնարհութենէ ի բարձրութիւն ամբարձեալ, կամ ի տկարութենէ ի զօրութիւն փոփոխեալ, այլ յառաջ քան զամենայն յաւիտեանս էր եւ յայժմուս է եւ յանվախճան յաւիտեանսն եղիցի՝ անեղ եւ անմահ էութիւն, աներեւոյթ ի բնութենէ եւ երեւելի վասն արարածոցս, տեսող ամենայնի եւ անտես յամենայնէ:

Հայր՝ անսկիզբն եւ անձին: Որդի՝ ծնեալ ի բնութենէ Հօր, այլ՝ անժամանակ: Ոչ ըստ մարդկան ծննդեան ախտաւոր եւ հոսանուտ, զոր եւ զմտաւ ածելն է հայիոյութիւն, թող թէ բարբառել բանիւ, այլ որպէս լոյս ի լուսոյ եւ հուր ի հրոյ, զի ոչ են օտարք ի բաժանիլն, այլ մի ճառագայթ եւ մի ջերմութիւն հրոյն եւ լուսոյ, ծնելոյն եւ յորմէ ծնան. եւ մի է բնութիւն երկաքանչիւրոցն, թէպէտ եւ բաժանին ի միմեանց անձամբ: Նոյնպէս եւ լոյս Որդի՝ ի լոյս Հօրէ, եւ հուր աստուածութեանն Որդւոյ՝ ի հրոյ աստուածութեան Հօր յառաջ եկեալ ծննդեամբ, ոչ են այլեւայլ, այլ մի եւ նոյն բնութեամբ:

Իսկ օրինակ անօրինակ ծննդեանն Որդւոյ ոչ այլ ինչ է, բայց որ ի մեզ մտացս ծնունդ զբան, թէպէտ եւ ոչ ամենայնիւ համեմատի ճշմարտութեանն օրինակս: Վասն որոյ եւ բան ասի՝ յաղագս անապական գոլոյ ծննդեանն: Իսկ որդի, զի ի Հօր բնութենէ է եւ ոչ օտար ի նմանէ, կամ արարած, ըստ հայիոյութեանն Արիոսի: Եւ հնար իմանալոյ զանիմանալին՝ ոչ այլ ինչ է, բայց հաւատալ ասացելոցն ի գիրս սուրբս, եւ ոչ ընդ

քննութեամբ արկանել զանքննելին, որք անհաս մտաց ասացին զաստուածային ծնունդն եւ անճառ բանից:

Նոյնպէս եւ Հոգին սուրբ՝ բղխումն ասի առ ի Հօրէ եւ փառակից Որդւոյ, Աստուած կատարեալ որպէս զՀայր եւ զՈրդի:

Մի կամք՝ երից անձնաւորութեանն եւ մի զօրութիւն եւ մի արարչութիւն:

Հայր կամեցաւ ստեղծանել զերեւելի եւ զաներեւոյթ արարածս, եւ Որդի՝ գոյացոյց յանգոյից, եւ Հոգին սուրբ զարդարեաց իմաստութեամբ:

Եւ նոյն ինքն բանն Աստուծոյ, որ արար զմարդն ի պատկեր իւր, եւ երեւեցաւ նմա յետ յանցաւորութեանն եւ ամենայն արդարոցն առաջնոց՝ Նոյի եւ Աբրահամու եւ Իսահակայ եւ Յակոբայ եւ Յօբայ, Մօսիսի եւ Ահարօնի եւ Յեսուայ եւ այլոց մարգարեիցն, եւ խօսեցաւ ընդ նոսա, ի ժամանակս վերջինս ւաւետօք հրեշտակապետին Քաբրիելի էջ յորովայն կուսին Մարիամու, եւ առեալ ի բնութենէ նորա մարմին եւ հոգի եւ միտս, եւ խառնեաց նոր եւ անճառելի միաւորութեամբ ընդ Աստուածութեան իւրում. եւ զարգացեալ յորովայնին իննամսեայ ժամանակաւ որպէս մանուկ, ծնաւ Աստուած եւ Մարդ կատարեալ, անշփոթ էութեամբ եւ անբաժանելի միաւորութեամբ, մի Քրիստոս եւ մի անձնաւորութիւն նորա, յերկուց բնութեանց միացելոց:

Կաթնասուն եղել որպէս զմարդ, եւ ի հրեշտակաց փառաւորեցաւ որպէս զԱստուած:

Շրջեցաւ յաշխարհի կատարիչն ամենայնի զամս L, մինչեւ ի կատարումն հասակի մարդկութեանն, մկրտեցաւ ի ծառայէն որպէս զմարդ, եւ վկայեցաւ ի Հօրէ եւ ի Հոգւոյն որպէս զՈրդի բարձելոյն:

Փորձեցաւ ի սատանայէ որպէս զմարդ եւ յաղթեաց փորձողին որպէս զԱստուած:

Քաղցեաւ եւ ծարաւեցաւ եւ ննջեաց եւ արտասուեաց եւ վաստակեցաւ որպէս մարդ՝ մտեալ ընդ օրինօք մարմնոյ, եւ կատարեաց զքրանչելիս եւ նշանս եւ եցոյց զօրութիւնս աստուածայինս՝ որպէս զԱստուած կատարեալ:

Եկն կամաւորաբար ի չարչարանս, եւ չարչարեցաւ անչարչարելին՝ չարչարելի բնութեամբ ի վերայ Խաչին. մեռաւ անպարտականն մահու՝ մահկանացու մարմնովս, վասն կենդանացուցանելոյ զմեռեալ մեղօք բնութիւնս. էջ ի գերեզման եւ արար աւարումն կրկին դժոխոց մարդկային հոգւովն՝ միացելովն ընդ աստուածութեանն, հոգւոցն՝ որ ի դժոխս, շնորհելով ազատութիւն: Իսկ աստուածային մարմնոյն յարութեամբն՝ տալով յոյս յարութեան մահկանացու բնութեանս յապականութենէ մահու. յարեաւ ի մեռելոց իշխանաբար յաւուր երրորդի, եւ երեւեցաւ աշակերտաց իւրոց երկոտասանիցն եւ եօթանասնիցն եւ հինգ հարիւրոցն եւ այլոց բազմաց, որք եղեն նորա վկայք եւ քարոզք ընդ տիեզերս. եւ յաւուրս քառասունս երեւեալ նոցա եւ խօսէր ընդ նոսա:

Եւ ի լրումն քառասնեկի աւուրցն՝ վերացաւ ի յերկինս եւ նստաւ ընդ աջմէ Հօր ի բարձունս՝ մերով բնութեամբս, յորմէ անբաժանելի էր Աստուածութեամբն, եւ գալոց է նովին մարմնովն՝ փառօք Աստուածութեան իւրոյ եւ Հօր՝ յարուցանել զմեռեալս եւ դատել զաշխարհս արդարութեամբ՝ բարեգործացն զբարեացն տալով ժառանգութիւն եւ զանվախճան թագաւորութիւնն, իսկ գործողացն չարեաց՝ զամօթ յաւիտենից եւ զտանջանսն ըստ իւրաքանչիւր գործոց:

Եւ արդ՝ այս դաւանութիւն ճշմարիտ հաւատոյ՝ հիմն է աստուածայնոյ տաճարիս որ ի մեզ: Իսկ գործք բարեաց՝ շինուածն է ի վերայ այսր հիման, Որպէս եւ Տէրն գրաւանութիւնն Պետրոսի եղ որպէս զվէմ՝ հիմն իմանալի Եկեղեցւոյ իւրում, եւ զինքն որպէս զշինօղ, եւ զընտրելոց իւրոց բարեգործութիւնս՝ որ յամենայն ազգաց իբրեւ զնիւթ շինուածոց՝ փոխանակ քարի եւ փայտի եւ այլոց պիտոյից:

Դարձեալ՝ է նա որպէս զճարտարապետ, եւ մեք որպէս զմշակս հրամանատարս: Ըստ որում ասաց աշակերտացն, թէ «Առանց իմ՝ ոչ ինչ կարէք առնել» [Յովի. ԺԵ 5]: Գրէ եւ Պօղոս, թէ՛ «Ես զիմաստութիւնն Աստուծոյ հիմն եղի» [Ա Կոր. Գ 10] որ է Քրիստոս, եւ որ ի նա հաւատն ճշմարտութեան, «բայց՝ այլ է, որ շինէ... այսինքն՝ որ են եւ որ գալոց են յաշխարհ: Եւ շինելն՝ գործովք, զոր կամի իւրաքանչիւր ոք, եթէ բարի եւ եթէ չար» [Ա Կոր. Գ 10]:

«Եթէ ոք շինէ ասէ ի վերայ հիմանս այսորիկ ոսկի» [Ա Կոր. Գ 12], որ է արդարութիւն եւ ճշմարտութիւն, արծաթ, որ է մաքրութիւն մտաց եւ սրբութիւն սրտի, ականս պատուականս, որ են մասունք բազմապատիկ առաքինութեանց, սէր, խոնարհութիւն, ողորմածութիւն, անոխակալութիւն, պահք, աղօթք, ժուժկալութիւն: Այսորիկ եւ որ նման սոցա են պատուական ակունքն՝ շինեալք յարդարոց անձանց ի վերայ հիման հաւատոյն:

Իսկ մեղսասիրացն անձինք՝ ոչ ի պատուական եւ ի հաստատուն նիւթոցս յայսցանէ ասէ, շինեն զշինուածս իւրեանց ի վերայ հաւատոյն հիման, այլ յանարգաց եւ ի դիւրավատնելեաց, այսինքն՝ փայտ, խոտ, եղէգն: Փայտն՝ զթանձրագունից մեղաց ունելով զտեսակ, զապականութեան, զպոռնիկութեան, զգողութեան, զյափշտակութեան, եւ որ նման սոցա. խոտն՝ զխորհրդոցն չարութիւն ժողովեալս ի սրտի. եղէգն՝ զբանիցն զարշութիւնս նշանակէ, զորս բղխեն ի բերանոց մարդիկ, զլեզուն գործարան տուեալ սատանայի, թշնամանելով եւ անարգելով զընկերս՝ զանազան եւ պէսպէս հայիոյութեամբ: Որ ըստ գեղջկացն բարբառոյ՝ յիշոցք անուանին, եւ ըստ գրոց սովորութեան՝ անէծք եւ թշնամանք եւ որ այսպիսի են անուանք, զորոց եւ Դաւիթ ասէ, թէ՛ «Անիծիւք եւ դառնութեամբ լի են բերանք նոցա» [Սաղմ. Թ 7]: Նաեւ ստութիւնն եւ չարախօսութիւնն եւ մատնութիւնն եւ այլք՝ որ յայս յարին, բանք անիրաւութեան՝ յեղեգան են օրինակի:

Եւ զայսոցիկ զերկուց հակառակ շինուածոց նիւթս՝ որ ի պատուականաց եւ յանարգաց, հուրն՝ ասէ ընտրեսցէ, քանզի հրով յայտնելոց է դատաւորն: Եթէ գործն, զոր շինեաց ի վերայ հաւատոյն հիման, ոսկի է եւ արծաթ եւ ականս պատուականս, որք ոչ ապականին, այլեւ սրբին ի հրոյն, գործօղն կեցցէ՝ եւ վարծս առցէ: Իսկ եթէ խոտ է եւ եղէգն եւ փայտ, որ դիւրաւ ապականին ի հրոյ անտի, որ գործեացն զայն՝ տուժեսցի: Վասնզի, զորօրինակ, ապարանք՝ հիմամբն միայն չեն բաւական լինել ի բնակութիւն մարդկան, այլ՝ պէտս ունին որմոց եւ ձեղուանց եւ այլոց շինուածոցն: Նոյնպէս եւ հաւատովն միայն, առանց գործոց, ոչ ոք կարէ զանձն իւր շինել տաճար Աստուծոյ:

Եւ որպէս զլուխ՝ առանց անձին յարմարութեան ոչ կարէ կրել կենդանութիւն, եւ ոչ անձն՝ առանց գլխոյ, նոյնպէս եւ հաւատ՝ առանց գործոց, եւ գործք՝ առանց հաւատոյ, մեռեալ են երկոքին, ըստ առաքելոյն:

Վասն որոյ, աղաչեմ զամենեսեան, զի ընդ հաւատոցդ ճշմարտութեան, զոր ընկալայք ի ծննդեմէ աւագանին եւ ունիք հաստատութեամբ, յարմարեցէք եւ զգործս արդարութեան, զի մի՛ միով աչօք միայն լուսաւորիցէք զանձինս, այլեւ երկոքումբք պայծառանայցէք: Եւ մի վստահանայք ի սնոտի յոյսն անմտաց, որք ասեն, թէ՛ բաւական է հաւատոյն միայն ճշմարտութիւն քրիստոնէին՝ փրկել ի տանջանաց եւ

արժանաւորել արքայութեան: Ձի, գործրինակ, մեռեալ անդամ չեն ինչ պիտանացու ի գործ մարմնոյն. նոյնպէս եւ մեռեալ հաւատ՝ ոչ տայ զօրութիւն հոգւոյն, այլ մանաւանդ՝ առաւելագոյն տանջանաց պարտական կացուցանէ զունօղն իւր, որպէս այն, որ զմի տաղանդն պահեաց եւ ոչ շահեցաւ նման ընկերացն, զի տաղանդն՝ հաւատն է, եւ շահ տաղանդացն՝ գործքն:

Եթէ վասն է՞ր ասի հաւատ՝ մեռեալ առանց գործոց, յայտնի արասցուք, որոց ոչ գիտեն:

Յաւատոյն անուն մի է, բայց կրկին ունի զօրութիւն: Առաջին՝ դաւանութեան հաւատն, որ է խոստովանութիւն ի Սուրբ Երրորդութիւնն, զոր ընկալաւ իւրաքանչիւր ոք յաւագանէն: Երկրորդ, հաւատ այն է, որ զբանս, զոր Յոգին Սուրբ խօսեցեալ է բերանով մարգարէին եւ առաքելոցն եւ եկեղեցւոյ վարդապետօք, զորս ի գիրս սուրբս գրեցին, չհամարի առասպելս եւ սուտս, այլ հաւատայ թէ ճշմարիտ են եւ ուղիղ, այնպէս, որպէս թէ աչօք իւրովք տեսանէ զամենայն զեղեալսն եւ զլինելոցն եւ զոր էնն: Եղեալն այն է, զոր պատմեն, թէ ամենայն երեւելի եւ աներեւոյթ բնութիւնք ոչ էին եւ յԱստուծոյ հրամանէն ստեղծեալ եղեն, եւ որ ինչ յետ լինելութեան արարածոց սքանչելիք եւ զօրութիւնք եղեալք յԱստուծոյ՝ պատմին ի գիրս, ի հնումն եւ ի նորումն: Եւ լինելոցն այն է, զոր ասեն՝ բարեգործացն բարի հատուցումն լինել յԱստուծոյ, եւ չարագործացն՝ տանջանք եւ հուր յաւիտենական: Եւ որ էնն այն է, զոր քարոզեն յամենայն բանս իւրեանց, թէ՛ Աստուած մերձաւոր է առ ամենեսեան եւ ոչ հեռաւոր, եւ զոր խորհին մարդիկ ի միտս իւրեանց, բարի կամ չար, իմանայ զամենայն, եւ զոր խօսին բանս լեզուաւ՝ լսէ անսխալ, եւ զոր գործեն մարմնով ի ծածուկ՝ տեսանէ յայտնապէս, զի չիք արարած աներեւոյթ առ ի նմանէ:

Արդ՝ որ այսոցիկ ի բոլոր սրտէ հաւատայ, նա է, որ ունի հաւատ կենդանի, որ եւ ոչ՝ երբէք յանդգնի կամ խորհել չարութիւն ի սրտի, կամ խօսել անիրաւութիւն բերանով, կամ գործել զմեղս անձամբ իւրով, զի թէ ի միոյ ուրուք մերձ լինելոյ, արգելուն մարդիկ յանարժանս գործելոյ. յորժամ հաւատայ ոք զԱստուած՝ լինել տեսող, զհա՞րող ժպրհի, կամ խօսել ինչ, կամ գործել կամակոր մտօք զչարութիւն: Իսկ՝ որ բանիւ միայն ունի զառ ի յԱստուած խոստովանութիւնն, այլ ոչ գործով, այնպիսոյն հաւատն ասի մեռեալ:

Եւ արդ վասն զի ընդ բազմատեսակ տնտեսական գործոցն անուանս, որ հաւատացաւ մեզ ի Տեառնէ ի ձեռն սրբոյ Աթոռոյս սպասաւորութեան, է եւ բժշկական անուն եւ գործ, վասն որոյ որպէս բժիշկ՝ ճանաչելով զհիւանդացելոյն անտարար ցաւոցն զպատճառս, հրամայէ ի վնասակարացն ի բաց կալ եւ զառողջարարն ընդունել դեղ եւ կերակուր. այսպէս եւ մեք զընդհանրական եկեղեցւոյ Քրիստոսի հոգեւոր բժշկութեան ունելով զփոյթ, տեսանենք մտաց աչօք, թէ եւ ոչ զամենեսեան, այլ գյուղավագոյն մասն աշխարհի, զի յաղագս մեռելոտի գործոց՝ մեռեալ ունին եւ զհաւատն: Եւ կամիմք որպէս զբժիշկ ուսուցանել ամենայն անձին՝ զմահաբեր անտից իւրեանց զպատճառսն եւ զկենդանարար հոգւոց զդեղսն, զոր թէ առեալ ընպիցէք առանց դժկամակ լինելոյ, եւ ի բաց մաքրիցէք յոգւոց ձերոց զդառնութիւն մաղձիցն ապականութեան՝ խոստովանութեամբ եւ ապաշխարութեամբ, արժանի լինիք ողորմութեանն Աստուծոյ, եւ առ ի նմանէ խոստացելոց բարութեանցն: Իսկ որոց ոչ թուին անտրժելի ասացեալքս ի մենջ, կամ՝ յաղագս ծուլութեան եւ մեղսասիրութեան, կամ՝ վասն արհամարհելոյ զմեք, առ այնպիսիսն զմարգարէականն ասացուք, թէ որ «անօրինելոցն է՝ անօրինեսցի եւ որ արդարանալոցն է՝ արդարացի» [Ես. ԻԱ 2]: Մեք, զոր հրամայեալն է մեզ՝ արասցուք, աղաղակելով որպէս դէտ ի բարձր դիտանոցէ զպատուիրանս Աստուծոյ ի լսելիս ձեր: Այսուհետեւ՝ առնելն եւ ոչ առնելն ի կամս ազատութեան իւրաքանչիւր անձին է:

Բայց մի որ կարծիցե՞ գմենց, թէ իբրեւ առողջս գմեզ համարելով յախտից մեղաց, ձեզ միայն զբժշկականս զայս մատուցանենք դեղ՝ որպէս հիւանդացելոց այլ ծանիցե՞ ամենայն որ, զի մեք առաւել քան զամենեսեան ունիմք պէտս հոգւոց բժշկութեան: Բայց որպէս յիմար հիւանդի է զիւրն առողջութեան դեղ՝ զոր մատուցանէ նմա ախտացեալ ոմն բժիշկ ի բաց մերժել, տեսանելով զցաւս մարմնոյ նորա, նոյնպէս իմաստնոյ է ոչ զբնութեան բժշկին ունել փոյթ, թէ առողջ է եւ կամ հիւանդ, այլ զդեղին քննել զօգտակարութիւն, եթէ առողջարար իցէ, եթէ՛ վնասակար:

Արդ եւ դուք մի վասն մեր անարժանութեան եւ ի հոգելորսն պակասութեան զօգտակար դեղս հոգւոց, զորս մատուցանենք ձեզ, արհամարհիցեք եւ ոչ ընդունիցիք յանձինս: Ձոր աղաչենք ընկալարուք սիրով եւ յօժարութեամբ ոչ վասն մեր ինչ փառաց եւ պատուոյ, զոր ոչ պահանջենք յունեք, թէ եւ էաք արժանաւոր, այլ վասն սիրոյն Քրիստոսի, որ կոչեաց զմեզ յիւր արքայութիւնն եւ ի փառս, զի թէպէտ եւ մեք անարժան ենք, այլ բանս վասն զի աստուածային է, արժանաւոր է ընդունելութեան: Եւ ընդունելութիւնն որ այլ ինչ եղիցի, այլ կատարումն գործոց:

Վասն որոյ, աղօթեսցուք ի վերայ միմեանց, մեք յաղագս ձեր՝ որպէս գլուխ վասն անձին, մտադիւրութեամբ ընդունել զսերմն աստուածային բանիս ի սիրոս, եւ պտղաբերել Աստուծոյ՝ մի ի յերից պտղաբերութեանց բարի եւ պարարտ երկրին: Եւ դուք վասն մեր, ըստ որում անձն՝ վասն գլխոյ՝ առողջանալ ի հոգելոր հիւանդութեանց եւ զօրանալ ի տկարութենէ զգայութեանցս: Որպէս զի, թէ գերան իցէ ի մեզ մերումս տեսարանի կուրացուցիչ, նախ ի բաց մաքրել զայն, զի եւ զայլոց շիւղս տեսանել եւ սրբել կարօղ լինիցիմք: Բանալ եւ զխցեալ ունկն՝ աստուածայնոյ ձայնին հնչման ճանապարհ առնելով, եւ զհոտոտելիս՝ անմահութեան թափեցելոյ իւղոյ անուամբն անուշացուցանել, եւ զճաշակելիս՝ կենացն հացի քաղցնուլ եւ ծարաւել եւ յագիլ՝ անյագութեամբ արդարութեան եւ իմաստութեան, եւ զլեզուս, որ ի փառս Աստուծոյ եւ ի շինութիւն լսողաց բանից, լինել սպասաւոր՝ աղ լինելով նեխելոց եւ լոյս խաւարելոց, ըստ հրամանի Տեառն՝ նախ՝ անձին, եւ ապա այլոց: Որով եւ զերկոսին դնենք առաջի լսողացո՞ զանազան կերպարանօք. պայծառացելոց ոգւով՝ զլուսափայլ բանից ճառագայթ. եւ մթացելոց կամ նեխելոց՝ զաղին օրինակի յանդիմանողական մորմոքումն, որով եւ սկսանիմք այժմ՝ առ որս արժան է, նախակարգել զբանէ:

ԱՌ ԿՐՕՆԱԻՌՈՒՄ ԽԱՐԱԶՆԱԶԳԵԱՅՄ՝ ՈՐ Ի ՎԱՆՈՐԱՅՄ

Եւ արդ՝ առաջին ընդ գերաշխարհիկս վարուք եւ քաղաքավարութեամբ խօսեսցուք, առ կրօնաւորսդ՝ որք ի վանորայս եւ ի մենաստանս բնակիք, որք սիւնք էք աշխարհի եւ պարիսպ ընդդէմ թշնամւոյն՝ աղօթիւք ձեր եւ բարի վարուք. հրեշտակք ի մարմնի, եւ աստեղք լուսատուք յերկրի, յորոց ի բարի եւ ի լուսաւոր վարուց փառաւորի միշտ Յայր ձեր՝ որ յերկինս է, որք թէպէտ եւ խրատեալ էք յԱստուածաշունչ գրոց՝ միշտ ի լսելիս ձեր հնչելով, եւ չունիք ինչ պէտս կարեաց՝ մերոց դուզնաքեայ բանից, այլ որպէս ծառայք՝ որք զհասարակական կերակուր հրաման առնուն ի տէրանց բաշխել՝ ոչ միայն քաղցելոց, այլեւ յագեցելոցն շնորհեն: Նոյնպէս եւ մեք, զի ընդհանուր ծառայակցաց մերոց հրամայեցաք ի Տեառնէ տալ զբանին կերակուր, հասարակաբար պարտիմք մատակարարել փարթամաց գիտութեամբ եւ աղքատաց՝ ի գիտութենէ, զօրաւորաց՝ առաքինութեամբ եւ տկարագունիցն՝ յառաքինութենէ:

Վասն որոյ՝ աղաչեն զամենեսեան մի նուագութեամբ իւղոյ ողորմութեան եւ սրբութեան աղօտացուցանէք զլոյս հաւատոյ լապտերաց ձերոց, այլ անշիջանելի պահեցեք զճառագայթս աստուածութեան մշտավառ առաքինութեամբ յանձինս ձեր:

Մի՛ վասն սիրոյ նիւթականիս ի հրոյ սիրոյն Քրիստոսի, զոր արկ յերկիր եւ կամի զբորբոքելն վաղվաղակի, ցրտացուցանէք զոգիս:

Մի՛ տայք տեղի օտար հրոյ ցանկութեան ի սիրտս ձեր եւ այնու խնկարկել Աստուծոյ զաղօթս եւ զխորհուրդ աստուածայնոյ պատարագին, որպէս որդիքն Ահարօնի՝ Նաբատ եւ Աբիուդ, այլ նախ մաքրեսցի իւրաքանչիւր ոք խոստովանութեամբ յանմաքուր խորհրդոց եւ գործոց եւ պատարագ կենդանի զինքն մատուցէ կենդանւոյն Աստուծոյ՝ առաքինութեամբ եւ ապա ի մաքուրն մերծեսցի եւ սրբութեան սրբոցն սպասաւորեսցէ, զի մի, ըստ նմանութեան նոցա, տանջողական հրովն այրեսցի ներքին մարդն, աստ խղճի մտաց եւ անդ բոցովն անշիջանելեալ: Մի՛ լիցի ունեք ի ձէնջ յարձան աղի մածնուլ, որպէս կինն Ղովտայ, յաղագս յետս դառնալոյ յաշխարհական իրս՝ ի հեշտութիւնս ախտից կամ ի ցանկութիւնս հիւթանիւթից:

Քանզի, զորօրինակ, նա յետ պատուհասին ոչ եղեւ համեմիչ կերակրոց իբրեւ զաղ, քանզի քար էր եւ ոչ ի շինուած ինչ պիտանացաւ եղաւ որպէս զքար, վասն զի աղ էր: Ըստ այսմ նմանութեան եւ ամենայն ոք, որ ելանէ յաշխարհէ, որպէս Ղովտ ի Սողոմայ, եւ բարձրանայ ի կարգ կրօնաւորութեան, որ է հրեշտակական, որպէս նոքա ճանապարհորդեալք ընդ հրեշտակացն ի լերինն, եւ դառնայ անդրէն ի սէր աշխարհիս եւ յախտս թաւալի մեղաց, որպէս եւ կինն այն՝ զի դառնայր դիմօք ի Սողոմ. ոչ Աստուծոյ է պիտանացու այնպիսին՝ իբրեւ զկրօնաւոր, եւ ոչ աշխարհի օրինաց՝ որպէս զաշխարհական, այլ է անարգ եւ անպիտան, կոխան եղեալ ի մարդկանէ՝ որպէս զաղ անհամեալ. բայց ձեր, որ անփոփոխ էք յաստուածայինսդ, ամենայն ինչ ըստ առաքելոյն խրատու՝ բարեձեւութեամբ եւ ըստ կարգի եղիցի: Որ եւ դարձեալ ասէ՝ «Իմաստութեամբ գնասցիք առ արտաքինսն, գնոյ առեալ զժամանակս» [Կող. Դ 5]. եւ թէ՛ «Զվարս ձեր առաջի հեթանոսաց պարկեշտ ունիցիք» [Ա Պետ. Բ 12]:

Եւ արդ՝ մի ոք ի ձէնջ զվատթարս խոսելով լեզուաւ, կամ իրս ինչ անպատշաճ գործելով անձամբ առաջի արտաքնոցն՝ պատճառ լինիցի բանալոյ զանդուռն բերան նոցա ի հայիոյութիւն սուրբ հաւատոյս եւ կարգիս, որովք կրկին դատաստանս տալոց են այնպիսիքն առաջի Աստուծոյ, առաջին՝ ընդ մեղանացն, զոր խօսին կամ գործեն. երկրորդ եւ մեծ՝ ընդ գայթակղութեան լինելոյն պատճառ:

Մի ոք զընկերակից կրօնաւորաց թողլով զկենակցութիւն՝ առանձինն բնակիցէ, ոչ յաղագս ճգնողական վարուց՝ որպէս միայնակեացք, այլ վասն ազահութեան ախտի, զի զանձին իւրոյ աշխատութիւնն ոչ հասարակաց եկեղեցւոյն, այլ իւր միայնոյ ամբարիցէ, յորմէ վնասք բազում՝ հոգւոց, եւ ի միաբանութենէն՝ օգտութիւնք յոլովագոյնք, որպէս աստուածախօս վարդապետացն ցուցանեն բանք, զի առ բազումս քան զերկիւղն Աստուծոյ առաւել զօրէ ընկերակցացն ամօթոյ երկիւղ, յետս դարձուցանելով գյոժարութիւն մտացն ի չար ցանկութեանց մեղացն կատարմանէ: Եւ եւս՝ բազմապատիկք են շահիցն հոյլք՝ ի միասին եղբարցն բնակութենէ, զոր աւելորդ վարկանիմք գիտողացդ երկրորդէլ:

Են ոմանք դարձեալ յաշխարհասէր եւ ի մեղկ կրօնաւորաց, զի ոչ միայն սրտիւք ըստ հնոյն Իսրայէլի դառնան յեգիպտական գործս խաւարինս, այլեւ անձամբ իսկ ընդ աշխարհական բնակեն ի գիւղս եւ ի քաղաքս, եւ ի բանից բերանոյ զարդութիւնս եւ ի գործս վատթարութեան, եւ յորովայնամոլութիւնս անպատկառս եւ յարբեցութիւնս անառակս եւ յամենայն անկարգութեանց բերմունս՝ առաւելուն քան զնոսա:

Պարտ եւ արժան էր, զի թէ պատահէր կրօնաւորաց ըստ հարկաւոր ինչ պատճառի բնակել յաշխարհի, իբրեւ զլուսատու լինել աստուածային եւ ուղիղ վարուքն ի մեջ նոցա՝ ի փառաց պատճառս անուանն Աստուծոյ եւ ոչ ի հայիոյութեան: Չայնպիսիսն մանաւանդ յորդորեմք ի նոյն, քան թէ արգելումք, զի օրինակաւ բարեաց՝ բազումք լինին բարիք, որպէս եւ ի նախանձուէ չարացն վարուք՝ չարք յոլովագոյնք:

Արդ՝ հրամանաւն Աստուծոյ եւ մեր, այս եղիցի կանոնական օրէնք ի վերայ այնպիսեացն, փոխել այսուհետեւ զբնակութիւնս իւրեանց ի վանս եւ զվարս իւրեանց ըստ ձեւոյն եւ ըստ կարգին՝ յապաշխարութիւն եւ ի պարկեշտութիւն մինչեւ ի վախճան: Իսկ եթէ ոք ի նոցանէ ոչ լուիցէ աստուածային օրինացս՝ զոր գրեցաք, եւ ոչ ելցէ յաշխարհէ, այլ կացցէ յամառեալ մինչեւ ի մահ իւր՝ ի նոյն, անպարտ ենք մեք ի խղճէ կորստեան նորա ինքն եղիցի արեան իւրոյ պարտական առաջի Աստուծոյ:

Այլ քահանայից պատուէր տամք, զի թէ մինչ յաշխարհի իցէ այնպիսին, եւ վախճան մարմնոյ ընդ հոգւոյն մեռելութեան հասանէ նմա, ո՛չ հաղորդութեան եւ ո՛չ օրինաւոր թաղման արժանի առնել զնա, մանաւանդ զայնոսիկ, որ միշտ յանզոջութեան լինիցին մինչ ի մահ: Իսկ եթէ ոք յայնպիսեացն մերձ եղեալ ի մահ՝ զղջասցի եւ հայցէ արտասուօք զհաղորդութիւն եւ զթաղումն, եւ խոստովանութեան նորա գիտողք վկայեսցեն, եթէ հաստատեալ էր ի միտս՝ ելանել յաշխարհէ, եթէ օրհաս մահուն ոչ էր կանխեալ, այնպիսւոյն վասն ողորմութեանն Աստուծոյ տացի թօշակն վերջին, եւ օրինաւոր թաղումն՝ ոչ որպէս քահանայի, կամ կրօնաւորի, այլ իբրեւ զմիոյ աշխարհականաց:

Բայց մի ոք անընտրողաբար զամենայն, որ յաշխարհի մեռանիցին կրօնաւորք, հաւասար համարեսցի. զի են բազումք, որ հիւրութեամբ եկեալք յաշխարհ, պատահէ նոցա վախճան, եւ այլք, որ ծեր եւ տկար գոլով մարմնով եւ վասն ոչ գտանելոյ խնամս ի վանորայս՝ բնակին յաշխարհի ուղիղ եւ ոչ բամբասելի վարուք, այսոքիկ եւ սոյնպիսիքս պատուով թաղեսցին, յորժամ հասանէ վախճան՝ որպէս զծառայս աստուծոյ:

Դարձեալ՝ զգուշացուցանենք զճշմարտագունիցոյ երամս՝ յաղագս նոր եղելոյ սովորութեանդ ի վանորայս ի մերում ժամանակի, այգեգործ իւրաքանչիւր ոք լինելով ի կրօնաւորաց, որպէս ի գեօղս, որ անվայելուչ է կրօնաւորական կարգի, եւ արտաքոյ առաջին սրբոց հարցն պատուիրանաց: Զի նոքա եւ զորս յաշխարհի ունեին ժառանգութիւնս եւ ստացուածս՝ թողին, եւ թողուլ օրինադրեցին, եւ զխաչ առաքինութեան բարձին եւ զկնի գնացին Քրիստոսի, որպէս եւ Ինքն հրամայէր մեծատանն, թէ՛ «Երթ վաճառեա, զոր ինչ ունիս, եւ տուր աղքատաց, եւ դու առ զխաչ քո եւ զկնի իմ, եւ ունիցիս զանձս բազումս յերկինս» [Մարկ. Ժ 21]: Եւ դարձեալ թէ՛ «Որ կամիցի զկնի իմ գալ եւ ոչ ուրասցի զամենայն, զոր ունիցի յաշխարհի, եւ առցէ զխաչ իւր հանապազ, ոչ կարէ իմ աշակերտ լինել» [Ղուկ. ԺԴ 26-27]: Եւ այլ եւս՝ որ այսպիսիք են անտարանական պատուիրանք աշակերտելոց անձանց, որ էք դուք: Յորոց բազումք են ի ժամանակիս կրօնաւորաց, որ յաշխարհի առանց ժառանգութեան էին եւ հարկատուք իշխանաց եւ աղքատք ի գոյից եւ կարօտք հարկաւորացն, եւ յորժամ զծեւ կրօնաւորութեան ընկալան՝ տեսարք եղեն ի վանորայս բազում ժառանգութեան եւ փարթամացն ստացուածովք, եւ ոչ միայն հարկաւոր պիտոյիցն եղեն անկարօտ, այլեւ անելորդօքն լցան՝ եւ յաշխարհի հոգովք եւ երկօք տաժանեալք եւ աստ անհոգութեամբ եւ հեշտութեամբ ստուարացեալք: Եւ զհա՞րդ կարիցէ այնպիսին յաշակերտութեան լինել կարգի, եւ ասել ընդ Պետրոսի, «Տէ՛ր, ահա մեք թողաք զամենայն՝ եւ եկաք զկնի քո, արդ՝ զի՞նչ լինիցի մեզ» [Մատթ. ԺԹ 27]: Յայտ է, զի ոչ եթող ինչ վասն Քրիստոսի, այլ մանաւանդ, զոր ոչ ունէր յաշխարհի, ստացաւ հակառակ Քրիստոսի:

Եւ արդ՝ քանզի աստուածային պատուիրանք ըստ զօրութեան ընդունողացն եղան յիւրաքանչիւր ժամանակի՝ տկարագունիցն թեթեւագոյնք, զի տանել կարիցեն, եւ զօրաւորացն՝ ծանուք, զի յօժարութեամբ բառնան: Ըստ այսմ օրինակի եւ մեք, վասն զի տեսանենք զբազումս ցամաքեալս յաստուածային սիրոյն, եւ ոչ մի քան զմի նախանձու բարեաց շարժեալք՝ ի բարձրագոյն առաքինութիւնս ձեռնարկելով, որպէս առաջին հարքն, այլ մերոյս նախանձ ի հակառակսն վերաբերի նոցա, այսինքն թէ՛ ո՞վ

քան զընկերս յընդարձակագոյն տեղոջ եւ ի պարարտ երկրի տնկիցէ այգի, եւ թէ՛ զհա՞րոյ սնուցանիցէ իմաստութեամբ զնորագոյն տունկսն: Եւ փոխանակ զարուեստս առաքինութեան ուսանելոյ ի միմեանց, յայգեգործութեան հնարս վարժին անհմուտք ի հմտագունիցն: Արժան է, ասեն, այսքան եւ այսպիսի օրինակաւ վաստակել եղամբք եւ բրել ձեռամբ, փայտատօք եւ բահիւք, եւ հակառակ տնկոցն՝ զարմատս եւ զբոյսս արմատաքի խլել, զոր պարտ էր նախ զբարեաց հակառակ բոյսն, որ ի վարս մեր եւ ի բարս, ի բաց հանել ի մէնջ եւ ապա արտաքնոցն ունել փոյթ: Այլեւ հատանելոյն օրինակ զանագանեալ է իւրաքանչիւր տնկոցն սեռից առ իմաստունսն յայնոսիկ, զի զոմանս հուպ յարմատսն եւ զայլսն ի բացեայ հատանեն, յոմանս՝ սակաւ զուռսն, եւ ի կէսս՝ յոլովագոյնս թողուն, եւ այս ամենայն՝ որպէս զի յաճախագոյնս պտղաբերեսցեն եւ յոլովս զգինւոյն չափոյ աճեցուսցեն զթիւս: Թողից ասել զպատուաստելոյն հնարս, մի քան զմի առաւելեալ ի հանճար եւ զգործելոյն եռանդն ջերմութեան, զի ոչ զտիւն ոմանք բաւական համարին ժամանակ գործելոյ, այլեւ զգիշերն եւս խառնեն ընդ տունջեանն: Զոր արժան էր յայգի պատուիրանացն Աստուծոյ զայնքան ունել փոյթ եւ յօժարութիւն գործոյ, յորում հրաւիրեցաք ի քարոզչացն, եւ մտաք ի գործ հաւատովք եւ կրօնիւք ընդ դահեկանին վարձու մեզ յԱստուծոյ, յերեկոյանալ կենցաղոյս ժամանակի նման լինելով նմա, ըստ խոստացելոյ:

Դարձեալ՝ յորժամ պատահին միմեանց տեսաք այգեաց, կրօնաւորք յայլ եւ յայլ տեղեաց, յետ ողջունին ոչ զողջութենէ՝ հոգւոց հարցանեն եւ զհիւանդութեանց ախտից, եւ ոչ զպատերազմաց դիւաց եւ զխաղաղութեանց, եւ ոչ թէ՛ զհա՞րոյ ստասցուք շնորհս արտասուաց՝ ի ժամ աղօթելոյն, այլ թէ՛ յայսմ ամի, ո՛վ եղբայր, զհա՞րոյ է պտղաբերութիւն քոյին տնկոցն, առաւե՞լ է, թէ՞ նուազ: Եւ նա թախժեալ սրտիւ պատասխանէ՝ զինչ ասացից, ասէ, զաղէտսն, որ պատահեցան, զի ոմանք ի ճճեաց վնասեցան, եւ յոմանց ծաղիկքն թօթափեցան, եւ այլքն արեւակէզ եղեալ՝ ողկուզաց չորացան, եւ կէսք՝ նեխութեամբ ապականեցան. եւ թէ՛ զի՞նչ արարից՝ անգիտանամ զելս վտանգիս եղելոյ: Եւ ընկերն թելադիր եղեալ նմին՝ խրատ տայ, զոմանս պատուաստել ի տնկոցն, որք պտղակորոյսք լինին, եւ զայլսն զանագան փորձեալ հնարիւք՝ բժշկել ի պատահելոց կրիցն:

Եւ քանզի՝ ի նիւթականացս ցանկութիւն զբազումս ի կրօնաւորաց ժամանակիս տեսանենք ըմբռնեալս, որք զթեթեւանալն յայսպիսի ծանրութեան հոգոց՝ դժուարինս վարկանին, եւ գնալ զհետ խրատուն Քրիստոսի, որ հրամայէ՝ ոչ հոգովք պաշարել զանձն յաղազս հարկաւորացն կերակրոց եւ զգեստուց, թող թէ՛ վասն ասելորդացն: Վասն այնորիկ եւ մեք ոչ դնենք օրէնս՝ այսպիսի կրօնաւորաց ամենեւին ի բաց կալ ի տնկագործութենէ եւ յամենայն գոյից ստանալոյ, որպէս վայել է աշակերտաց Քրիստոսի, զի մի ի լսելն դարձուսցեն զդէմսն յարեւմուտս եւ խոժոռեալ ընդ լուր խրատական մեր բանի՝ ի բաց գնասցեն, որպէս եւ մեծատունն այն, այլ զերկրորդն գտեալ, զոր յայսոսիկ հաճոյս իմանամք կամացն Աստուծոյ, եւ զայն դիցուք ձեզ օրէնս: Եւ դուք թէեւ ընդ առաջինն՝ դժուարանայք զամենայնն տալ Աստուծոյ եւ մերկանալ աշխարհի՝ կամաւ, նախ քան զմերկ դնիլն ի գերեզմանի ակամայ, զերկրորդ օրինադրութիւնս ընկալարուք ախորժելի կամօք, զոր թէ յօժարական սրտիւ առնիցէք, հաւատամք ողորմութեանն Աստուծոյ, զի որպէս զառաջինն ընկալցի, եւ ի ձեռն երկրորդիս կատարման՝ առաջինն առաջնորդեսցէ ձեզ վերանալ յօժարութեամբ եւ ոչ բռնութեամբ. եւ այս է՝ զոր ասելոցս ենք:

Յամենայնէ, զոր ստանայք՝ եթէ տունկս եւ եթէ այլ ինչ, զախտ ազահութեան ի բաց մերժեցէք ի նոցանէ, որպէս զբոյս վնասակար ի բարի սերմանց, եւ զաշխատութիւն ձեր, որ ի նոսա, մի վասն յոլովելոյ յինչսն առնիցէք, այլ վասն կամացն Աստուծոյ եւ յերկինս գանձելոյ զերկրաւորս, եւ ի մարմնոցդ աշխատութենէ՝ հոգւոցդ ամբարել գանձ:

Եւ զոր ասեմքս՝ այսպէս եղիցի, որով լինիցին ստացուածք ձեր ի հաճոյս Աստուծոյ:

Ի պտղոցն ժամանակի՝ զպտղաբերացն ձերոց մասն տուք Աստուծոյ ի ձեռս աղքատաց եւ կարօտելոց, եւ մի դատարկ եւ ունայն զխնդրողսն պտղոյն դարձուցանիցէք, զի մի զձեզ Աստուած ի յիւր տնկեալ դրախտէն ունայն դարձուցէ:

Եւ եթէ տայցէք, մի խոժոռ դիմօք եւ զայրացեալ սրտիւ եւ դժկամակ բանիւք՝ իբրեւ զզոհն Կայենի, որ ոչ է հաճոյ աստուծոյ, այլ եւ պատճառ զայրացման, այլ զուարթառատ կամօք, որպէս սիրէ եւ խնդրէ Աստուած:

Եւ ի գինւոյն ժամանակի՝ ի գինւոյ անտի մասնաւորեցէք զբաժինն Աստուծոյ: Եւ յորժամ առաւելուցու քան զպէտս ձեր, եւ հարկ լինի վաճառել, ի գնոց անտի արծաթոյ առաւել պտղաբերեցէք Քրիստոսի՝ տալով տառապելոց եւ գերելոց, եւ մի ամբարիցէք յերկրի եւ յուսայք յետ մահու այլոց ձեռամբ զձերն տալ Աստուծոյ վասն ձեր, զի փոքր է յոյսն այն, չասեմ թէ՝ ամենեւին ընդունայն. եւ երկրորդ բարի, եւ ոչ առաջին. ի յայլոց ձեռն յուսալ առատագոյն լինել յինչս իւր եւ զիւրն կարկամեցուցանել, մինչ իշխան է գոյիցն եւ տէր: Եւ երկբայելի է այր այնպիսի գտանել, որ երկիւղին Աստուծոյ մատակարարիցէ զինչսն, ըստ հրամանի գնացելոյն: Ջի բազմաց աներկիւղից պատճառ կորստեանն լինի հոգւոյ ստացուածք մեռելոցն, յորժամ ժառանգէ, անառակ եւ անկարգ գնացիւք վատնելով զամենայնն, որ վնասու պատճառ, փոխանակ փրկութեան, լինիցին ինչքն այն ստացողին իւրուն:

Դարձեալ, զի թէ երկիւղած ոք հանդիպիցի եւ զամենայն գոյս մեռելոյն ըստ կամացն Աստուծոյ տնօրինէ՝ վասն հոգւոյ նորա թողութեան մեղաց, նուազ է ի բարեաց եւ ոչ կատարեալ բարի: Եւ զի այս ճշմարիտ է, ի բանից իմաստնոյն ուսանիմք այն, զի ասէ, թէ՝ «Որ ողորմի աղքատին, փոխ տայ Աստուծոյ» [Առակ. ԾԹ 17]: Եւ զիտէ զայս ամենայն ոք, զի զվճար փոխոյն ոչ օտարի ուրուք, այլ փոխատուին տայ փոխառուն:

Վասն որոյ աղաչեմ, մի յայլ ոք վստահանայք, այլ դուք տուք զփոխն ձեռամբ ձերով ի ձեռս Աստուծոյ, զի թէ զձեզ ճանաչիցէ փոխատուս՝ խնդրող փոխոյն Աստուած յաւուր պայմանի հատուցման իւրոյ, զոր եդ, ի ձեռս տայցէ զվճար փոխոյն:

Իսկ եթէ ձերոց գոյիցն այլ ոք լինիցի տուօղ փոխոյ, նոյն ընկալցի եւ զփոխարէնսն յԱստուծոյ, եւ ձեզ մասն ինչ թերեւս հատուցի ողորմութեան՝ միջնորդութեամբ տուողին զձերն:

Այլեւ տէրունական հրամանն՝ զոր ի հրապարակախօս ատենի անդ ասելոց է առ աջակողմեանսն, զնոյն նշանակէ, քանզի ոչ ասէ թէ՝ քաղցեալ, եւ այլք վասն ձեր ետուն ինձ ուտել, կամ թէ՝ «Մերկ էի, եւ այլք վասն ձեր զգեցուցին զիս. այլ թէ՝ դուք ետուք ինձ ուտել, եւ դուք զգեցուցէք զիս» [Մատթ. ԻԵ 35]:

Եւ արդ՝ թպէտ եւ առաջին կամք Քրիստոսի եւ հրամանք այն է, զի ոչ բնաւ ստանայցէ կրօնաւորն ստացուածս, որպէս վերագոյն ասացաք, զի մի յաղագս նիւթականիս հոգալոյ՝ յաստուածային առաքինութեանց աննիւթական հոգոցն խափանեսցի եւ բազում վնասուց՝ հոգոց եւ ծանրութեանց զանձն ի ներքոյ արկանիցէ, այլ ունել ի միաբանական կենացն կերակուր եւ հանդերձ ըստ հրամանին առաքելոյ, եւ այնու շատանալ: Բայց, վասն զի այս ոչ ամենեցուն է, այլ որք վասն սիրոյն Աստուծոյ ատեցին զաշխարհի եւ ելին յաշխարհէ, եւ ոչ յաղագս այլ ինչ պատճառի:

Վասն որոյ եւ մեք՝ այնոցիկ կրօնաւորաց, որք երկակենցաղ կենդանեաց նմանեալք են, զի են ցամաքայինք վասն ձեւոյն եւ են ծովայինք՝ յաղագս ի ծովու աշխարհիս զբաղանաց, զաշխարհայնոցն դիցուք օրէնս, եւ ոչ զգերաշխարհիցն, զի մեծ է

աղքատանալն վասն Քրիստոսի, քան ստանալ ինչս եւ տալ աղքատաց յաղագս հրամանին Քրիստոսի. որքան մեծ է Քրիստոս քան զայն, որ ողորմի աղքատին՝ ի դէմս Քրիստոսի:

Քանզի կամաւոր աղքատն, որ յաղագս Աստուծոյ նմանօղ Քրիստոսի է, վասն մեր աղքատացաւ, ասացաւ ի գիրս՝ իսկ ողորմածն աղքատին՝ բարեկամ Քրիստոսի կոչի, այլ ոչ նոյն ինքն Քրիստոս:

Եւ արդ, զի բոլորովին լինել Քրիստոս՝ մերկանալովն կամաւորութեամբ զամենայն ինչ վասն Քրիստոսի դժուարին է ամենեցուն, ոչ ասեմ թէ անհնարին, զի որք կամին կարօղ են, զոր յայտ առնէ բազմացն կատարումն յամենայն ժամանակի: Դուք այսուհետեւ, որ ստացեալ էք ինչս, զբարեկամացն Քրիստոսի ընկալարուք զաստիճան՝ ողորմելովն աղքատաց, որպէս եւ ինքն իսկ հրամայեաց տէրն, թէ՛ «Տուք ողորմութիւն, եւ ամենայն ինչ ձեր սուրբ է» [Դուկ. ԺԱ 41], այսինքն թէ՛ յորժամ ի ձերոց ստացեալ գոյիցն տայցէք մասն ողորմութեան աղքատաց՝ յօժարական եւ առատամիտ կամօք, մնացեալն ամենայն սրբին եւ անվնաս լինին ձեզ: Եւ ոչ դատիք իբրեւ զագահս յաղագս ստանալոյն, այլ ողորմութեան արժանաւորիք յԱստուծոյ որպէս զողորմածս ըստ ասելոյն Տեառն մերոյ՝ երանի ողորմածոց, զի նոքա ողորմութիւն գտցեն:

Նաեւ զայս եւս ասեմք, թէ օրէնք, որ եղան կրօնաւորաց անինչս եւ անստացուածս լինել, թէպէտ եւ յաղագս անզբաղ լինելոյ է յաշխարհական իրաց, եւ միայն հոգեւորացն պարապել, այլ կատարեալ պատճառն՝ յաղագս կարօտ լինելոյ կրօնաւորին, ոչ միայն յաւելորդացն կերակրոց եւ ըմպելեաց եւ զգեստուց, այլեւ ի հարկաւորացն եւս, որպէս զի՝ կարօղ լինիցի պատերազմի ցանկութեան, որ զինուորին ընդդէմ մաքուր կուսութեան, յաղթօղ լինել. զի որք անխտիր տան զանձինս որկորստութեան եւ արբեցութեան, թէեւ դեւք պոռնկութեան գրգռիչս ոչ ունէին ւխտից, բաւական է բոցոյ ցանկութեան՝ զառաւելութիւն միւրոյ որովայնամոլութեամբն տալ, ձգել զնոսա ի կատարումն մեղաց:

Վասն որոյ աղաչեմ, զի թէպէտ եւ յոլովս ունիցիք զնիւթ կերակրոյ եւ ըմպելոյ առ ձեռն եւ առտնին, այլ յոգիս ձեր խնայելով մի ազահութեամբ եւ որկորստութեամբ յայնոսիկ վարիցիք, այլ պարկեշտութեամբ եւ օրինաւոր, ըստ կարգի կրօնաւորաց: Եւ զոր ի ձեռն պակասեցուցանէք վասն պատուիրանին Աստուծոյ՝ ի սէր կարօտեալ եւ չքաւոր եղբարց եւ ծերագունից եւ տկարաց, զայնոսիկ ի կիր արկանիցէք, յորոց կրկին ամբարէք ի յոգիս ձեր զբարին՝ զպարկեշտութիւն անձանց ձերոց եւ զսիրով ողորմութիւն կարօտելոց:

Մի՛ ոք գտցի ի միջի ձերում, որ զձեւ կրօնաւորութեան զգեցեալ է եւ յառաւելութիւն գինւոյ տուեալ զանձն իւր՝ զբամբասանս արբեցողաց ընկալցի ի կարգն սուրբ, զի միոյն անկարգութեամբ՝ ամենայն կարգակիցք նորա անգոսնեսցին յաշխարհականաց եւ յայլազգեաց: Եւ թէեւ այլով ամենայնիւ հնար էր անբամբասելի լինել այնպիսոյն, արբեցութեամբն արտաքսելք յարքայութենէն՝ ըստ բանին առաքելոյ, քանզի ասէ՛ «Մի՛ խաբիք, ո՛չ սպանօղ, ո՛չ շնացօղք, ո՛չ արուագէտք, ո՛չ արբեցօղք» եւ զայլն, որ ըստ կարգի թուէ, «Ոչ ժառանգեսցեն զարքայութիւն Քրիստոսի եւ Աստուծոյ» [Ա Կոր. Զ 9]:

Ձի, որք օրինակ լինել բարեաց պարտական են ամենայն տեսողաց, եւ նոքա զայն ինչ գործեն, զոր արգելուն զիրք սուրբք ի յաշխարհականաց, զի՞նչ յոյս աշխարհականին կայցէ, եւ կամ՝ ո՞վ համարձակեսցէ առ նոսա յաղագս վատթար ինչ գործոց յանդիմանութեան ինչ խօսել բան, որք եւ ընդդիմաբանեն զկարգաւորաց ոմանց

զանազան անկարգութիւնս: Ոչ զամենեցուն ասենք, զի բազումք ի ձէնջ եւ ոչ հացի եւ ջրով յագին վասն սիրոյն Աստուծոյ, թող թէ՛ աւելորդ կերակրովք եւ գինեաւ:

Այլ յաղագս անխրատիցն եւ ծուլից, զորս եւ դուք, որ կատարեալքդ էք, խրատեցէք զնոսա, որ ստահակսն գնայցեն, զի ուղղեսցին: Իսկ որք յամառեալք, ի նոյն բերին հանապազ ի լոյծ եւ ի մեղկ կեանս, յետ բազում անգամ խրատելոյն եւ ոչ անսալոյն՝ ի բաց հատէք զանբժշկելի անդամսն ի մարմնոյ եկեղեցւոյ, զի մի՛ փոքր մի խմորն զամենայն զանգուածն ապականիցէ, չարն՝ չարեաց լինելով օրինակ:

Իսկ եթէ որ յեղբարցն ջատագով է այնպիսունն վասն մարմնաւոր ընտանութեան կամ սիրելութեան, որպէս զի ախտացեալ անդամն ի կարգ առողջիցն պահեսցի՝ լրբաբար գործելով զանպատշաճսն, եւ մերձակայիցն պատճառ լինելով հիւանդութեան՝ զիւրն հոգւոյ ախտ ի նոսա փոփոխելով, որպէս զբոր կորստեան հոգւոյ նորին եւ այլոցն՝ որ նովաւ, օգնականն նորա տացէ պատասխանի առաջի Քրիստոսի, եթէ առաջնորդն իցէ եւ թէ այլ որ յընկերակցացն: Ձի թէ Տէրն զաջ ակնն հրամայէ խլել, եւ զձեռն աջոյ եւ զոտն հատանել, զի՞նչ լինիցին, որք զգայթակղեցուցիչսն առ գայթակղեալսն պնդեալ պահեն՝ ի վնաս երկաքանչիւրոցն ոգւոց, հիւանդացն՝ աներկիւղ գործելով զվատթարս, եւ առողջիցն՝ զայթազկղելովն եւ բամբասելով:

Իսկ եթէ յետ ի բաց գնալոյն եւ զղջացեալ դարձցի յուղղութիւն այնպիսին շնորհօքն Աստուծոյ եւ ողջացի ապաշխարութեամբ՝ ճշմարտութեամբ եւ ոչ կեղծաւորութեամբ, ընկալցի վերստին յառողջ անդամոցն Քրիստոսի միաւորութիւնն:

Դարձեալ եւ զայս պատուիրենք. զի թէ հնար է փոփոխել ձեզ ի փոփոխական բարուց՝ վանաց ի վանս շրջելով, զի վասն դոյզն պատճառի թողուլ զառաջնորդն իւր եւ զկենակից եղբարսն, անհաստատութեան բարուց է նշանակ: Վասն զի բաց ի հոգւոց վնասուէ, որ հրամայեալ է ի գիրս, թողուլ եւ գնալ յաղագս մարմնաւոր ինչ պատճառի, ոչ թողացուցանեն զփոփոխունն ի տեղուոջն: Եւ յայսմ պատճառէ յազգի մերոյ կրօնաւորաց զբազումս տեսանենք անհրահանգս եւ անխրատս եւ անհնազանդս աւագագունից. եւ զրեթե զբովանդակն, բաց ի սակաւուց: Ձի յորժամ յանպատշաճսն, կամ ի գործս, կամ ի խօսս, որ անվայելուչ է կրօնաւորաց, տեսանիցեն զոք եղեալ՝ առաջնորդն կամ վարդապետն կամ որք ի ծերագունիցն, եւ յանդիմանօղ բանիւ սաստիցէ, վաղվաղակի գիշերագնաց եղեալ իբրեւ ծառայ փախուցեալ ի տեսնէ, փախչի զայրացեալ սրտիւ յաստուածային խրատտուէ անտի:

Եւ զի առաջնորդն երկնչի մի զուցէ ի գնալ եղբարց յաղագս այսպիսի պատճառի՝ գործոյ եկեղեցւոյն պակասունն լինիցի, ներօղ լինի ամենայն ստահակ եղբօր, կալ մնալ անբժշկելի ի բարս եւ ի գործս ստահակութեան. եւ այսու աղագաւ՝ անխրատս եւ անհրահանգս մնան այնպիսիքն մինչ ի վախճան:

Նաեւ՝ եւս ծանրագոյն յիմարութեան բանք, զոր պատասխանեն նոքա խրատտուաց իւրեանց մի լինել հետաշրջօղս, ասեն՝ Աստուած ազատ արար զմեզ եւ ինքնիշխանս, զիա՞րդ զազատութիւնս մեր ի ծառայութիւն դիցուք մարդկան: Եւ երանի թէ զազատութիւնն, զոր ետ Աստուած բնութեանս, բարւոք ի կիր արկանէին, այսինքն՝ ի յախտից լինել ազատս:

Վատթար ծառայութիւն եւ վնասարար՝ մեղաց ծառայութիւն է, որպէս Քրիստոս՝ թէ «Որ առնէ զմեղս, ծառայ է մեղաց» [Յովի. Ը 34]: Իսկ Աստուծոյ ծառայութիւնն եւ վասն Աստուծոյ եկեղեցւոյն, եւ վասն եկեղեցւոյն՝ առաջնորդին, արդարութիւն է եւ ոչ մեղք. զոր եւ առաքեալն օրինադրէ թէ՛ «Ծառայեցէք միմեանց երկիւղիւն Քրիստոսի» [Եփես. Ե 21]. եւ ինքն Քրիստոս հրամայէ թէ՛ «Որ կամիցի մեծ լինել, եղիցի ամենեցուն ծառայ» [Մատթ. ԻԳ 11]. գրէ եւ սուրբն Բարսեղ ի կրօնաւորաց սահմանն, թէ՛

«Ամենայն ժուժկալութիւն եւ առաքինութիւն այնմ, որ զհնազանդութիւն առաջնորդին ոչ ունիցի, անօգուտք են եւ յոչ ինչ պէտս համարեալ»:

Մի ոք յեղբարց տրտնջօղ լինիցի զառաջնորդէ իւրմէ յինչ եւ իցէ պատճառս տրտնջման, թէ եւ արդար գտանիցի ի տրտնջելն, զի մի զվարձսն, որ յԱստուծոյ, կորուսանիցէ, եւ ընդ այգւոյն մշակացն առաջնոց դատեսցի, վասն տրտնջելոյն գտեառնէն անիրաւաբար: Ձի թէ մարմնաւոր ծառայից հրամայէ առաքեալն՝ հնազանդ լինել ըստ մարմնոյ տերանց, ոչ առ ականէ ծառայելով, այլ միամտութեամբ սրտիւ որպէս Աստուծոյ, «զի ի Տեառնէ, ասէ, ընդունիցիք զվարձսն» [Կող. Գ 22-24]. քանի՞ եւս պահանջէ Աստուած ի հոգեւորացոյ, առաւել քան զնոցայն ցուցանել հնազանդութիւն եւ համբերութիւն եւ միամտութիւն՝ եկեղեցւոյ հոգեւոր առաջնորդաց: Ձի ոչ միայն ընդ պահոցն եւ աղօթից եւ որ նման սոցին մասանց առաքինութեանց տայ Աստուած զվարձս վաստակոց՝ գործողաց ի յայգի պատուիրանի նորա, այլ առաւել ընդ հաւատարիմ լինելն եկեղեցւոյ՝ ի գործս եւ յաշխատութիւնս եւ յամենայն իրս:

Իսկ զգողսն եւ զծծիսն եւ զհատուսն, քան զարտաքինսն ի սոյն յանցանս գտեալս, առաւելապէս դատի Աստուած, որպէս զդիտօղ կամաց տեառն ծառայ, քան զայն՝ որ ոչն գիտէ: Ձի, զորօրինակ, զսուրբ կերակուրս եւ զըմպելիս՝ պիղծ կայտառք անկեալք ի նոսա եւ հեղձեալք ապականեն, սոյնպէս եւ յարդար վաստակս, յորժամ ձեռն գողոց մերձենան ի կծծութիւն, ինքեանց բարեգործութիւնն հեղձնուն ի հոգիս իւրեանց՝ որպէս զմկունս, եւ զմնացեալ ստացուածսն պղծեն անիրաւութեամբն: Յորմէ զգուշանալ աղաչեմ եւ սուրբ պահել զձեռս ի վնասակար եւ յանիծաբեր անձին ախտիցս, քանզի անէծք ցաւագինք վասն այլ մեղաց ոչ եւս շարժին ի մէջ եկեղեցւոյ, քան յաղագս գողութեան:

Եւ մի ոք փոքր համարեսցի զսա ի կարգ մեղաց, զի ի քարեղէն տախտակսն ի գրեալ օրէնսն մատամբն Աստուծոյ՝ երրորդն է սա կարգեալ, յետ սպանութեանն եւ շնութեանն: Եւ մի ոք կարծիցէ, թէ մեծագոյն իրաց յափշտակութիւնն է ի գողութեան համարի, եւ փոքրն ոչ. ծանիցէ այնպիսին, զի թէպէտ եւ ի տուգանսն զանազանութիւն է, քանզի չորեքպատիկ հատուցանել՝ յօրէնսն հրամայեցաւ զգողութեան վճարումն, եւ տասն դահեկանի չափոյն՝ չորեքպատիկն, կամ հարիւրին կամ հազարին՝ առաւել է քան զմիոյն կամ զերկուցն: Սակայն, անունն մի եւ նոյն է մեծին եւ փոքուն՝ բազմին եւ սակաւուն, զի ոչ թէ որ զմեծագոյն իրս կամ զբազումս գողանայ՝ նա միայն կոչի գող, եւ որ զփոքունս եւ զսակաւս՝ յայլ ինչ անուն վերածայնի, այլ՝ համանունաբար ի վերայ ամենայն գողոց է գողութեան անուն եւ պատիժ, որ զբազումսն գողանայ եւ որ զսակաւսն:

Եւ սահման, որ ընդ գողութեան անուամբ եւ բանբասանօք արկանէ զմարդ՝ այսչափ է, ամենայն ոք, որ զձեռս իւր ձգէ յառնուլ զինչ եւ իցէ իրս եւ աչօքն այսր եւ անդր նայեսցի, զի մի տեսցէ կամ տէր գոյին եւ ըմբռնեսցէ զնա, կամ օտար ոք՝ եւ հայիոյեսցէ, գող է այնպիսին, եւ գողութիւն է զոր առնուն:

Եւ մի ոք ինքն ինքեան իրաւունս առնիցէ, կամ աշխատութեան իւրոյ վարձ՝ զգողացեալն ասելով, եւ կամ այլ ինչ ցուրտ պատճառս յօղելով, անպատիժ համարի լինել զինքն ի դատաստանէն Աստուծոյ. ի նախնի եղեալ օրինակէն զգաստացի այնպիսին. Անանիայ եւ Սափիրայ՝ միթէ անձի՞ն աշխատութիւն էր գողացեալն յիրաց այլոց՝ որպէս եւ քոյր. ոչ, այլ ի սեպիական իւրեանց գեղջն գնոց եւ ի հայրենի ժառանգութենէ, զոր վաճառեալ արծաթոյ եւ սակաւ ինչ խորեալ յաղագս առանձնական իւրեանց պիտոյից, եւ զբազումսն առ ոտսն եղեալ Պետրոսի. տես՝ ս զիա՞րդ մահու եղեն պարտականք ի վիմին հաւատոյ արդար իրաւանցն պատուհասեալք. ոչ վասն արծաթոյն ինչ կարեաց, զորմէ ոչ ինչ փոյթ էր Պետրոսի,

այլ վասն ստութեանն, որպէս եւ ասէր՝ «Ոչ ստեցեր դու մարդոյ, այլ՝ Աստուծոյ» [Գործ. Ե 3]:

Իսկ առ մերովքս տեսանենք ոչ միայն գողութիւն, այլեւ ստութիւն վասն գողութեանն, ոչ լոկ բանիւ, այլեւ մեծամեծ երդմամբ ուրացութիւն, որոյ մեղաց չիք թողութիւն. զի եւ ոչ զղջումն խոստովանութիւն առ այն, յորմէ գողացան, զի թողութեան իշխանութիւն գողոյն՝ յաղագս գողացելոյ իրին, որ տէրն է գողացեալ գոյին՝ ունի, եւ ոչ օտար ոք խոստովանահայր: Վասնորոյ, զի ոչ խոստովանի նմա եւ ոչ հատուցանէ, զոր գողացան ի նմանէ եւ զրկեաց, ոչ ասեն չորեքկին, ըստ մաքսաւորին Ջաքէի, այլեւ ոչ զոր էառն, ոչ ընդունի թողութիւն յաւիտեան:

Են դարձեալ ոմանք ի պակասամիտ կրօնաւորաց, որք թեպէտ եւ ոչ զարտաքին իրս, այլ զանձին իւրեանց զօրութիւն եւ զյաջողութիւն գողանան յեկեղեցւոյն, ի յիւրեանց առանձնական գործս արի եւ արթուն լինելով, եւ ի հասարակացն՝ հեղձ եւ պղերձ, ոչ անպատիժս ի դատաստանէ Աստուծոյ մնան այնպիսիքն ընդ թերահաւատութեանն՝ առաւել քան ընդ պղերձութեանն, զի ոչ հաւատան զաշխատութեանն վարձ ի Տեառնէ ընդունել, այլ զմարդկայինն միայն համարին հատուցումն, որոց յորժամ ըստ կամաց զպէտսն տայ առաջնորդն՝ արիանան ի վաստակսն, իսկ յորժամ փոքր մի նուաղանալ հանդիպի ընդ հեղձութեան գործոյն զտրտունջն եւս յաւելուն:

Ընդ այսոսիկ՝ որ գործոց գրեցան պատուիրանք յԱստուածաշունչ գրոց, եւ շրթանց եւ լեզուոյ դնել դրունս, աղաչենք եւ դռնապանս, որպէս զի զօգտակարն ի բանից եւ զբարին թողացուցեն ելանել, իսկ զչարս եւ զվնասակարս եւ զանօգուտս ի սրտին, որպէս ի բանտի, արգելցեն՝ ոչ թոյլ տալով մտացն ծնանել զչար մանկունսն, այլ մանաւանդ հեղձուցանել յինքեան զսերմանեալ յղութիւնն ի սատանայք:

Եւ արդ՝ մի՛ ոք դատեսցի զընկեր իւր, զի մի եւ ինքն դատեսցի յարդարադատէն Աստուծոյ՝ որպէս եւ ասաց տէրն՝ «Մի դատէք, եւ ոչ դատիցիք» [Մատթ. Ե 1]:

Մի՛ ոք ի բամբասանս յօժարեսցի, թէւ ուղիղ իցէ, թող թէ՛ զրահետ վարեալ, զի զի՞նչ օգտեցուցանես զեղբայրն՝ բամբասելովն զնա առ այլս. զքեզ վնասեցեր ի բամբասելն, եւ նա ոչ ինչ օգտեցաւ: Եթէ կամիս օգտեցուցանել զնա եւ զքեզ, տէրունականաւն վարեսցիր խրատով, յանդիմանեա զնա սիրով, որպէս զհիւանդացեալ անդամ՝ սպեղանեօք, նախ՝ առանձնաբար, եթէ ոչ անսայցէ՝ առաջի երկուց եւ երից վկայից. եթէ եւ ի նոցանէ ոչ պատկառեսցի դառնալ յուղղութիւն՝ ասասցիր յեկեղեցւոջն, եւ թէ՛ եւ յեկեղեցւոյն ի հրապարականախատ լինելոյն ոչ զղջասցի, յայնժամ համարեսցի քեզ եւ բամբասեսցի իրաւապէս՝ իբրեւ զհեթանոս եւ զմաքսաւոր:

Եւ արդ՝ մի՛ ոք սովորեսցուցէ ի կրօնաւորաց զլեզու իւր, կամ չարախօսել ի զուր զումեքէ, կամ անիծանել վայրապար, կամ հակառակել ընդդէմ բանից հակառակողաց յանօգուտ կռիւս եւ ի վնասակար վիճաբանութիւնս, կամ ի վիճելն՝ թշնամանաց եւ անարգանաց բանս բարբառել, որպէս զաշխարհականս, որ ոչ վայելէ սրբոց: Զի թէ ընդ դատարկ բանից համարս պահանջէ Քրիստոս, որպէս եւ հրամայեաց, զի՞նչ լինիցին, որք գարշելի եւ վատթար բանիւք վարին անխտրաբար, մանաւանդ, որք ի խեղկատակութիւն սովորեսցուցեն զլեզուս եւ ի ծիծաղական բանս՝ նման լինելով խաղալկացն եւ հացկատակաց, եւ որք ի ծիծաղելն այլայլեն զդէմս եւ կարկաչեն անմտաբար:

Վասն որոյ, աղաչեն, զի բանք ձեր ոչ լիցին անհամ եւ անաղ, որպէս զռամկաց անմտաց, այլ որպէս աղիւ համեմեալ, ըստ խրատուն առաքելոյ, ի շահ եւ ի շնորհս տալ լսողաց, եւ ոչ ի գայթազղութիւն եւ ի զագրութիւն լինել լսելեաց:

Այլեւ՝ նոյն ինքն շահաւէտ եւ օգտակար բանքն մի յաճախութեամբ եւ առանց դիպօղ ժամու եղիցին խօսեցեալ յայնմանէ, որ խօսելն գիտիցէ իմաստութեամբ, զի մի ծանծրացեալ՝ նողկոտայցեն լսօղք, եւ դսրովանս դիցեն ատեցօղք բարե բանից, այլ՝ սակաւք եղիցին, եւ այն՝ հեզութեամբ եւ հանդարտութեամբ:

Եւ գլխաւորելով զբանս, որ առ մաքրագունիցդ երամք, ասենք զայս, եթէ խորհուրդք եւ բանք եւ գործք ձեր եւ ամենայն շարժումն հոգւոյ եւ մարմնոյ այնպէս եղիցին պարկեշտք եւ աստուածավայելուչք, որպէս զի՝ անուանն Աստուծոյ եւ ձեւոյ կրօնաւորութեանդ մի հայիոյութեան եւ պարսաւանաց, այլ գովութեան եւ փառաւորելոյ լինիցին պատճառք ի տեսողաց եւ ի լսողաց: Ձի մի լիցի ունեք ի ձեւնջ, ըստ հնոյն Իսրայէլի, լսել յԱստուծոյ մարգարէին, թէ՝ «Անուն իմ վասն ձեր հայիոյի ի մէջ հեթանոսաց» [Ես. ԾԲ 5], այլ, մանաւանդ, տէրունական բանին, որ առ աշակերտսն, արժանաւոր առնիցէք զանձինս պայծառ առաքինութեամբ, թէ՝ «Այսպէս լուսաւորեսցի լոյս ձեր առաջի մարդկան, որպէս զի՝ տեսցեն զգործս ձեր բարիս եւ փառաւորեսցեն զհայրն ձեր, որ յերկինս է» [Մատթ. Ե 10]:

Եւ այս ինչ սակաւութեամբ՝ առ աշակերտեալ եղբարսդ ասացեալ ի մէնջ՝ ի փառս Աստուծոյ, աւարտեսցին:

ԱՌ ԱՌԱՋՆՈՐԴՍ ՍՐԲՈՑ ՈՒՆՏԻՑ ՎԱՆԱԿԱՆԱՑ

Փոքր ինչ եւ առաջնորդացդ, ի յերկինս ճանապարհորդելոցն տացուք ծառայակցաբար զհոգեւորական եւ զաստուածային բանին կերակուր, որք զաչաց ունիք գործ եւ սպասավորութիւն մարմնոյ եկեղեցւոյ:

Ձի, զոր օրինակ, աչք առաջնորդեն անձին յամենայն շարժումն ի լավագոյնսն կամ ի վատթարագոյնս, ըստ այսմ նմանութեան եւ առաջնորդք՝ առաջնորդելոցն: Եւ որպէս բիբք աչացն, եթէ մաքուրք լինիցին ի յախտից ինչ ի ներքս անկելոց, սրատեսութեամբն անմոլար առաջնորդէ անձին յուղիղ ճանապարհն. իսկ եթէ շամանդաղք մթինք զերակսն լուսոյ, որ ի գլխոյ անտի յաչսն իջանեն՝ խնուն անտեսութեամբն, սխալէ եւ ընդ ինքեան ի խորխորատ մահու զբոլոր անձն իւր արկանէ:

Ըստ այսմ օրինակի եւ առաջնորդք եկեղեցւոյ, որ ոք երկոքումբք աչօք լուսաւորեալ իցէ, յայսինքն՝ գիտութեամբ Աստուածաշունչ գրոց, եւ առաքինասէր զործովք՝ ամբժութեամբ, եւ սրբութեամբ եւ ամենայն արդարութեամբ, զոր պատուիրանք Աստուծոյ ուսուցանեն, այնպիսին՝ որպէս անձին իւրոյ, սոյնպէս եւ համօրէն եղբայրութեանն բարւոք առաջնորդէ յաստուածայինսն: Իսկ որ զմի յաչացն բաց ունիցի եւ միւսովն կափուցեալ իցէ, յայսինքն՝ որ կամ գիտութիւն առանց գործոց առաքինութեան եւ կամ առաքինութիւն առանց գիտութեան ունիցի, թերի է ի բարեաց եւ ոչ կատարեալ. քանզի միականեաց նմանի այնպիսին:

Ձի թէպէտ եւ որ զիմաստութիւնն ունիցի՝ գիտէ զշաւիղս արդարութեան ճանապարհին ուղիղ ուսուցանել բանիւ, այլ ինքեան ոչ գնալովն ընդ նոյն գործով՝ ոչ կարէ հաւանեցուցանել զայլս գնալ: Նոյնպէս եւ այն, որ սրբութեամբ վարուք իցէ միայն առանց գիտութեան գրոց, թէպէտ եւ անձամբ իւրով գնայ ընդ ճանապարհ օրինացն Աստուծոյ, բայց զի այլոց՝ որպէս արժան է, ոչ գիտէ իմաստութեամբ առաջնորդել, վասն այնորիկ՝ բազում անկարգութիւնս մտանէ յեկեղեցի: Իսկ այնոքիկ, որ զերկոսեան տեսարանս աչաց խաւարեալս ունիցին ի լուսոյ, յայսինքն՝ զի են տգէտք աստուածային գիտութեանց եւ են պղերգ յամենայն գործս արդարութեան, մանաւանդ թէ՝ եւ հակառակօքն լցեալք եւ յանդգնին տալ զանձինս յառաջնորդութիւն եկեղեցւոյ, որ եւ զբազումս տեսանենք յայսպիսեաց ի մերումս թշուառացեալ

Ժամանակի ձեռնամուխ եղեալ յայտսիկ, լինին այնպիսիք ըստ տէրունական առակին՝ «Կոյր կուրի յորժամ առաջնորդէ, ասէ, երկրքին ի խորխորատ անկանիցին» [Մատթ. ԺԵ 14], որք ոչ յԱստուծոյ, այլ ի սատանայէ շարժեալք՝ դիմեն յառաջնորդութիւնն յայն՝ կորուստ ինքեանց եւ առաջնորդելոցն:

Վասն այնորիկ՝ եւ մեք զաստուածայինս բանի խրատու սերմն յայնց առաջնորդաց յոգիս սերմանեսցուք, որք օրինօքն Աստուծոյ վարել յօժարին զառաջնորդութիւնս իւրեանց, որք Աստուծով սկսանին եւ առ Աստուած կատարեսցին:

Առ որս եւ ասեմք, մի՛ անփոյթ առնիցէք զաշակերտելոց եղբարցն ի հոգւոյ ինչ վտանգս անկեալ ուրուք, կամ ի մարմնոյ. քանզի համարս տալոց էք ընդ իւրաքանչիւրոցն: Մի՛ զնիւթականին գործոյ միայն պահանջել զկատարումն անթերի, եւ զհոգեւոր գործոյ զառ ի նոցանէ կատարելոյ անփոյթ առնել, այլ ի վատթարաց զգուշանալ եւ լաւագունիցն պատկառ կալ՝ միշտ խրատ տալով, զոր մանաւանդ պահանջէ ձեւն եւ կարգն, զոր ընկալան: Վասն զի այսմ կարգի է մեռեալ լինել աշխարհի եւ աշխարհական իրաց, եւ կենդանի Քրիստոսի եւ նորին պատուիրանաց, ըստ խրատուն Պօղոսի. զի զայգի օրինացն կոչեցան գործել, եւ ոչ զարտաքնոցն մշակութեան գործ: Եւ որ այն միայն գործէ աստ, եւ ի հոգեւորացն ոչ բնաւ, կամ զնիւթականսն ի բոլոր սրտէ, եւ զաննիւթն ի հարկէ եւ առ աչս մարդկան, ոչ եղև լսելի ներքին ականջօք տէրունական հրամանին, թէ «Գործեցէք՝ մի զկորստական կերակուրն, այլ զայն, որ տանի ի կեանսն յաւիտենից» [Յովհ. Զ 27]:

Գործել արժան է եւ զայս, քանզի դատարկութիւնն չար է, որպէս եւ Պօղոս խրատ տայ, մանաւանդ զի եւ օրէնս դնէ, եթէ «Որ գործիցէ ոչ՝ եւ կերիցէ մի» [Բ Թես. Գ 10], զոր եւ ինքն կատարէր յասելն՝ «Ձցայգ եւ զցերեկ գործէաք առ ի չժանրանալոյ ումեք» [Բ Թես. Գ 8], եւ թէ «Ձեռքս այս պաշտեցին զիս, եւ որ ընդ իսն էին» [Գործ. Ի 34]: Բայց յաղագս մարմնական գործոյն զհոգեւորսն անտես առնել իբրեւ զաւելորդ իրս՝ յոյժ վատթարագոյն է աշակերտելոց բանին: Քանզի պարտ է, որպէս երկրորդ է մարմին հոգւոյն, առաջին զհոգւոյն հոգալ կերակրոց, որ եւ աղօթք եւ ամենայն բարեգործութիւնք, եւ ապա՝ զմարմնոյն եւ զմարմնականաց, զի եւ առ մարդիկ նախ տէրն կերակրի՝ սպասաւորեալ ի ծառայիցն, եւ ապա ծառայքն ի նշխարէ տերանցն: Եւ ի մեզ՝ քանզի մարմինն ծառայական է եւ հոգին տիրական եւ կամք մտացն դատողական, արժան է դատողականին ի կարգի պահել զերկաքանչիւրսն: Յառաջագոյն զհոգին կերակրել հոգեվորական կերակրօք ի ձեռն մարմնոյն սպասաւորութեան, եւ ապա զմարմնականացն հոգալ՝ հոգւոյն իմաստութեամբ եւ տնօրինութեամբ:

Արդ, յայտսիկ եւ որ նման սոցա բարեկարգութիւնս՝ պահեսցիք զմիաբանութիւն եղբայրութեան ձերոյ:

Դարձեալ՝ մի կողմնաւոր բարուք զոմանս սիրել, ջոկս առնելով եւ զոմանս անտես առնել, ոմանց աւելորդօք բերիլ ի պէտսն, եւ այլոց՝ եւ ոչ հարկաւորօքն բաւականանալ, այլ սերն հասարակաց եղիցի՝ ըստ սրբոյն Բարսղի կանոնադրութեանն, եւ պատիւ՝ որոց վայել է:

Իսկ կերակրոցն բաշխումն՝ ըստ չափոյ աշխատութեանն առ իւրաքանչիւրսն լիցի՝ առաւելութեամբ եւ նուազութեամբ: Ձծերացեալսն եւ զվտանգեալսն, որք զմանկութեան ժամանակն եւ զգօրութիւն անձանց ի յաշխատութիւնս եկեղեցւոյն ծախեսցին, մի բարձի թողի առնիցէք, որպէս ոչ ժամանակին պիտանացուք, զի մի բարկացի Տէր, քանզի թէ՛ օտարաց վտանգելոց, նաեւ թշնամեաց՝ խնամ տանել հրամայէ Քրիստոս եւ ողորմել, եւ պատուհաս սպառնայ, որք ոչն առնեն, քանի՞ եւս եղբարցն եւ անդամոց եկեղեցւոյն: Վասն որոյ, զծերս պատուեցէք եւ ծերատածեցէք,

ըստ հրամանին առաքելոյ, եւ զտկարացեալսն խնամարկեցէք տեսչութեամբ եւ պիտոյից նոցա պատրաստութեամբ՝ ըստ չափոյ զօրութեան ձերոյ: Գիտենք, զի այսպիսեաց բարեկարգութեանց խափանելոյ աղքատութիւն ժամանակիս է պատճառ, բայց ոչ զառաւելն, այլ գլխաւորութիւն կամացն եւ զկարն պահանջէ Աստուած:

Մի զնուիրեալն յեկեղեցիս՝ կամ կենդանւոյ միաբանութեան, կամ մեռելոց յիշատակի, անձին միայնոյ սեպիականեսցէ առաջնորդն, այլ ի պէտս եկեղեցւոյն ծախիցէ: Չնոյն եւ հատուցէ եկեղեցեան զհոգեւոր պարտսն, զի մի յարդար դատաստանին աւուր պահանջեսցէ իւրաքանչիւր ոք զտուեալն, եւ զի՝ ոչ ունիցի յայնժամ հատուցանել զիւրն առեալ բարեգործութիւն՝ փոխարէն՝ տայցեն:

Եւ թէ առաջնորդն առաջին՝ զոր առ յաւուրս իւր ի ծախս եկեղեցւոյն վատնեաց հաստատուն վկայիւք եւ ոչ ժամանեաց յաղագս օրհասին մահու կանխելոյ՝ հատուցանել զպարտսն, երկրորդն, որ զկնի նորա ժառանգէ զառաջնորդութիւն եղբայրութեանն, պարտական է վճարելոյ եւ, եթէ անտես առնէ, ունի տոկոսեօք վճարել առաջի Քրիստոսի: Իսկ եթէ ոչ վկայեն նմա ի պէտս եկեղեցւոյն առնել զառեալն, ինքն՝ որ էառն, հատուցէ ի հանդերձելումն:

Մի ոք ինքնական ախտիւ շարժեալ՝ կաշառանօք աւագաց յափշտակեսցէ զառաջնորդութիւն վանաց՝ առանց ժամանակին առաջնորդի քննութեան եւ հրամանի, քանզի երկու են պատճառ իրաւացի փոխելոյ զվանաց առաջնորդս. կամ՝ վասն զանարժանս գործելոյ արտաքոյ օրինաց Աստուծոյ, եւ այն՝ ճշմարիտ վկայիւք, կամ՝ եկեղեցւոյն ոչ շինութեան, այլ աւերման լինելոյ պատճառ: Եւ առանց այսոցիկ, եթէ յանդգնի ոք հակառակ յառնել, մեղանչէ յօրէնս Աստուծոյ:

Եւ զոր ինչ միանգամ կանոնեալք են եւ եղեալ ի բանս սրբոց հարցն յաղագս առաջնորդաց՝ առ ի խրատ եւ յուղղութիւն ի բանս, ի գործս եւ յամենայն բարեձեւութիւնս կարգաւորութեանց, զամենայն բարեացն զտիպսն եւ զօրինական փութասցիք յանձինս ձեր նկարագրել: Եւ թէ եւ զամենայնն ոչ էք բաւական կատարել յաղագս ձմեռն գոլով ի բարեաց ժամանակիս, զոնէ գլխովսն գործով կատարեսցէք եւ առ պակասեալսն գլխաւորութիւն կամաց ունիցիք, եւ զղջումն եւ տրտմութիւն՝ վասն պակասութեան:

Ձի յորժամ յայտոսիկ հաստատիցէք զմիտս, հակառակ բարւոյ ոչ կարէ տեղի գտանել յոգիս ձեր:

Վասն որոյ եւ մեք աղաչեսցուք զՏէր, զի առաջնորդացդ եւ առաջնորդելոցդ յաջողեսցէ եւ յերկնայինն հետեւել ճանապարհ՝ մեօք հանդերձ, զի ամենեքեան արժանասցուք խոստացելոց բարեացն, որ ի Քրիստոս Յիսուս՝ ի Տէր մեր :

ԱՌ ԱՌԱՋՆՈՐԴՍ ԵԿԵՂԵՑԻՈՅ՝ ՈՐ ԵՆ ՅԱՇԽԱՐԴԻ, ՈՐ ԿՈՉԻՆ ԵՊԻՍԿՈՊՈՍՈՒՆՔ

Խօսեսցուք եւ առ դասս եպիսկոպոսաց սրբոց, որ էք տեսուչք կարգեալք յԱստուծոյ՝ հոգւոց հաւատացելոց, որ են յաշխարհի. որ թէպէտ եւ ըստ կարգի երկրորդ եղաք յաղագս բարեկարգութեանն՝ նախ առ վանականսն, սակայն ըստ աստիճանի՝ առաջին էք:

Ձորս աղաչեն նախ քան զամենայն՝ ի միտս ձեր գալ եւ ճանաչել իմաստութեամբ զաստիճանիդ, զոր ունիք, զբարձրութիւն եւ զգործ, եթէ ուստի՞ սկսաւ, եւ վասն է՞ր եղաւ, եւ զի՞նչ հրամայեցաւ առնել յայնցանէ, յորոց հաստատեցին զսա: Ձի յորժամ զայտոսիկ գիտիցէ ոք, որպէս պարտն իցէ գիտել, մի ի յերից աստի շահիցի, կամ

Ճանաչելովն զծանրութիւն սորա եւ զգժուարակրութիւն, եւ ոչ յօժարութեամբ դիմել իբր ի դիւրին իրս եւ ի հեշտալիս՝ գիտելով զհար տկարութիւնն, այլ ի բաց հրաժարել, թէ եւ բռնադատիցի յիւրոց մտացն ախտից կամ ի մերձակայից՝ որպէս եւ առաջին սուրբքն արարին եւ ուսուցին. կամ թէ յանձն առցէ զլինելն, փութայ ըստ հաճոյիցն Աստուծոյ կատարել զտնտեսութիւն գործոյն, կամ թէ՝ ոչ արասցէ զանարժանն՝ ճանաչէ զպակասութիւն բարւոյն եղեալ յինքեան եւ զվնասն, եւ խղճիւ մտաց իւրոց դատէ զանձն՝ յանցաւոր զինքն համարելով:

Արդ, թէ՛ ուստի՞ սկսաւ ասացուք:

Սկիզբն եպիսկոպոսութեան եղեւ յայնմանէ, որ երդմամբ առ զքահանայութիւնն ի Զօրէ, ըստ կարգին Մելքիսեդեկի. ոչ ըստ աստուածութեանն, այլ ըստ մարդկութեանն, ոչ յանբանից մատուցանելով պատարագս, ըստ ահարօնեան քահանայութեանն, այլ զանձն իւր մատոյց կամաւոր պատարագ ի վերայ խաչին՝ Զօր, վասն ընդ մեզ հաշտութեան: Եւ զնոյն քահանայապետութիւն, զոր ինքն ի Զօրէ ընկալաւ յաղագս խաչին մահու ի վերայ այնոցիկ, զորս գնեաց արեամբն իւրով, շնորհեաց աշակերտաց իւրոց ի ժամանակի համբառնալոյն յերկինս, ըստ աւետարանին Ղուկայ, թէ՛ «Եղ ձեռս ի վերայ նոցա եւ օրհնեաց զնոսա» [Ղուկ. ԻԴ 50], եւ ապա ինքն, ասէ, վերանայր յերկինս, զնոյն օրհնակ պահանջելով եւ ի նոցանէ, թէ՛ որպէս ես ոչ հեշտութեամբ, այլ չարչարանօք եւ մահուամբ ընկալայ զքահանայութիւն ի վերայ ազգի մարդկան, եւ դուք նմանապէս մահու չափ նահատակեցարուք ի վերայ ոչխարաց հօտի իմոյ, զոր ստացայ արեամբ իմով. որք եւ արարին, ըստ հրամանին՝ մեռանելով ի վերայ ժողովրդեանն, որ հաւատացաւ նոցա ի Տեառնէ:

Եւ յորժամ հանդերձեալ էին առաքեալքն Քրիստոսի ելանել յաշխարհէ, ընտրէին ի հաւատացելոց անտի արս երկիւղածս եւ իմաստունս եւ կացուցանէին փոխանակ իւրեանց զլուխ ժողովրդեանն ի քաղաքս, եւ ի գաւառս, զորս եւ եպիսկոպոս անուանեցին, որ թարգմանի՝ տեսուչ:

Արդ, այս թէ ուստի՞ սկսաւ ասացաք:

Պարտ է գիտել եւ զայն, թէ յաղագս որո՞յ պատճառի եղաւ ի Քրիստոսէ եւ յառաքելոց նորա այս գործ եպիսկոպոսութեան. յայտ է թէ՛ վասն լինելոյ զլուխ եւ հրամանատար քահանայից եւ ժողովրդոց, եւ որպէս զդէտ աննիրհ աչօք մտացն նայել ի վերայ ամենեցուն՝ զթիւրեալսն ուղղել եւ զուղիղսն հաստատուն պահել յուղղութեանն:

Եւ թէ զինչ՞ հրամայեցաւ լինել եպիսկոպոսին եւ կամ զի՞նչ առնել, զայս Պօղոս յայտ առնէ առ Տիմոթէոս գրելովն, թէ՛ «Պարտ է եպիսկոպոսին անարատ լինել» [Ա Տիմ. Գ 2] որպէս Աստուծոյ տնտեսի, հեգ, ցած, պարկեշտ, հիւրասէր, բարեսէր, արդար, սուրբ, ժուժկալ, մի՛ արծաթասէր, մի՛ կռուող, մի՛ հարկանօղ, այլ հանդարտ եւ այլն եւս:

Անարատն ասելովն, յամենայն արատոյ, որ ըստ հոգւոյ եւ մարմնոյ իցեն, մաքուր լինել հրամայէ:

Իսկ որպէս Աստուծոյ տնտեսի՝ զայս յայտ առնէ. զի թէ մարդիկ նիւթական գոյից իւրեանց տնտես զանարատսն ասէ ընտրեն լինել, այսինքն՝ որ ոչ գողասցի աւազակօրէն, եւ ոչ հեղգայցէ ի խնամ տանելոյ գոյիցն եւ ի պահպանութենէ, քանի՞ եւս արժան է անարատութիւն եւ արթնութիւն եւ զգուշութիւն ունել տանն Աստուծոյ տնտեսաց, որ է եկեղեցի սուրբ, ոչ զնիւթականս ասեմ զեկեղեցւոյ, այլ զհոգիս մարդկան, որք շինին տաճար Աստուծոյ կենդանւոյ, զորս պարտ է որչափ զօրութիւն իցէ Աստուծոյ տնտեսին անխախտելի պահել զշինուածս աստուածաբնակ տաճարացն, եւ ոչ տալ գողանալ սատանայի իւրով պղերգութեամբն ի հոգեւոր

զանձուց անտի, ոչ դիրք եւ ոչ յորոց գտնտեսութեանն ունի գործ, տացէ նոցին օր ըստ օրէ եւ զբանին կերակուր ի ժամու` ըստ տէրունական հրամանին:

Յեզ, ցած, պարկեշտ. հեզութեամբն յուշ առնէ նմանօղ լինել Մովսիսի եւ Ղաւթի` որք ի հնունն էին հովիւք ժողովրդեանն Իսրայէլի, թէ նոյնպէս պարտ է եւ նորոց հովուացս հեզութեամբ եւ հանդարտութեամբ հովուել զժողովուրդս, որպէս հովիւք` զհօտս, եւ ոչ ճոխութեամբ եւ սաստկութեամբ` ըստ աշխարհի իշխանաց: Իսկ ասելովն թէ` ցած, զխոնարհութեանն ուսուցանէ, զի անդէպ է եպիսկոպոսին հպարտութեամբ եւ գոռոզութեամբ լինել առ հնազանդեալ ժողովուրդսն, որպէս զգործակալս բռնաւորաց, այլ հեզութեամբ եւ խոնարհութեամբ բերիլ առ ամենեսեան, որպէս եւ Քրիստոս յայտոսիկ զինքն տայ օրինակ. «Ուսարուք յինէն, ասէ, զի հեզ եմ եւ խոնարհ սրտիւ» [Մատթ. ԺԱ 29]: Եւ դարձեալ` ցուցանելով զոր ի խոնարհութենէն օգուտն եւ զառ ի հպարտութենէն վնասն` ասէ, «Ամենայն` որ բարձրացուցանէ զանձն` խոնարհեսցի, եւ որ խոնարհեսցուցանէ զանձն` բարձրացի» [Մատթ. ԻԳ 12]: Եւ Պօղոս զգուշացուցանելով զՏիմոթէոս, զի մի զանկատարսն հոգելոր եւ մարմնաւոր հասակաւ վերակոչեսցէ յաստիճան եպիսկոպոսութեան, ասէ` «Մի մատաղատունկ, զի մի հպարտացեալ ի դատաստանս անկցին սատանայի» [Ա Տիմ. Գ 6]: Քանզի սատանայ ընդդէմ արարչին Աստուծոյ հպարտացեալ` եւ վասն այնորիկ անկաւ յերկնից, եւ պարտական է յաւիտենական դատաստանացն եւ մշտնջենաւոր տանջանացն: Վասնորոյ, հրամայէ, թէ` ցած, զի մի նորին ախտիւն ըմբռնեալք` նորայն դատաստանի եւ պատժոց կցորդք եղիցին:

Պարկեշտ. պարկեշտն անուն` մի է, բայց առ ամենայն շարժունն հոգւոյ եւ մարմնոյ պատշաճեալ բերի պարկեշտութիւնն` ի բանս մի շատախօս լինել, ի կերակուրս եւ յըմպելիս եւ ի զգեստս մի աշխարհօրէն բերիլ, այլ ըստ նոցա նմանութեան, որոց խաչեալ է աշխարհ: Նաեւ յընթացս ճանապարհի ոչ երեւելի եւ կազմեալ երիվարօք եւ կամ կիսիշօք ամբարձեալ եղիցին ի բարձրն կոյս, այլ վասն զտկարացեալ մարմինն միայն բառնալոյ, ըստ պատահելոյ կրողին: Եւ ոչ սրընթաց ձիովք շահատակել, եւ շամբք եւ բազիւք որսականօք բերիլ առ երեվայրիս եւ թռչունս, որպէս լսենք զոմանց, թէ` իցեն: Որ այնքան պատշաճի այսմ ձեւոյ ունողաց այս գործ, որպէս թէ` զգտակ կարմիր դիցէ ի գլուխ իւր կրօնաւորն` փոխանակ քուսիթայի, եւ զգեստ բեհեզեայ ընդ ասուոյ եւ այծեաց: Եւ կերակուրքն եւ ըմպելիքն ոչ յաճախութեամբ եւ անկարգութեամբ, այլ պարկեշտութեամբ եւ չափաւորութեամբ եղիցին, ըստ Աստուածաշունչ գրոց խրատաւ: Եւ բանք բերանոյն մի անմտաբար խեղկատակութեամբ կամ աշխարհօրէն, զառականս կամ զանկաճութիւնս ի լեզուն յեղյեղով անարգել զոք, այլ բղխեսցէ սրտիւն զբան բարի` ըստ մարգարէին, ի յօգուտ եւ ի շնորհս լինել լսողաց` ըստ առաքելոյն, եւ մի ի վնասս եւ ի տաղտկութիւնս եւ ի պատճառս աղարտելոյ զառաքելականն աստիճան:

Յիրասէր. ըստ Աբրահամու եւ Ղովտայ եւ այլոց նահապետացն, որք այնչափ գտան հիւրասիրութեամբն հաճոյք Աստուծոյ, մինչ զի եւ զԱստուած, հանդերձ հրեշտակօք, ընկալան եւ պատուասիրեցին: Եւ ոչ ասէ հիւրընկալ, այլ հիւրասէր, քանզի հիւրընկալութիւն է երբէք, զի ի հարկաւոր ինչ պատճառէ լինիցի, կամ ի բռնութենէ, կամ ի պատուոյ երեսաց, կամ զովութիւնս եւ փառս որսալոյ ի պատուասիրելոցն: Իսկ սիրով ընդունելութիւնս յայսցանէ յամենեցունց ազատ է, որով եւ խնդութեամբ ընդունի զեկեալ հիւրսն եւ ոչ տրտմութեամբ, եւ զուարթ ցուցանէ կերպարանս եւ ոչ խոժոռ, եւ թախծեալ դէմս եւ ոչ զժղմնելով ինչ բարբառի բանս, այլ ուրախարար եւ խրախճանականս, որ յոյժ լաւագոյն է հիւրոցն, քան զկերակուրսն:

Վասն այսր պատճառի հրամայէ եպիսկոպոսաց եւ քահանայից, նաեւ ամենայն քրիստոնէից` ոչ միայն հիւրընկալ, այլեւ հիւրասէր լինել:

Բարեսէր. եւ ո՞ր են բարիքն, զորս հրամայէ սիրել. ոչ զկարծեցեալ բարիսն, որ են ախտաւոր բարիք մարմնականք, կամ հոգեկանք եւ նիւթք աշխարհի, այլ նախ եւ առաջին զճշմարիտ բարին սիրել զԱստուած, որ է սկիզբն եւ աղբիւր բարութեան, երկրորդ՝ զպատուիրանս նորա որ է բղխումն յաղբերէն բարեաց յԱստուծոյ, ըստ Դաւթայ, թէ՛ «Սիրեցի զպատուիրանս քոյ քան զամենայն ոսկի եւ զտպագիծն» [Սաղմ. ԾԺԸ 127]. երրորդ, զորս ի մարդկանէ լինին բարիք: Իսկ զհակառակ բարւոյն զչարն, այսինքն՝ զսատանայ, եւ զորս ի նմանէ սերմանեալ զմեղս ատել եւ ի բաց դառնալ, ըստ նորուն Դաւթայ, թէ՛ «Չմեղս ատեցի եւ անարգեցի, եւ զօրէնս քո սիրեցի» [Սաղմ. ԾԳԸ 163]: Նաեւ զչարասէրն եւ զանդարծսն ատել եւ ի բաց դառնալ, յորոց յետ բազում անգամ խրատելոյն եւ ոչ դառնալոյն՝ հրաժարել հրամայէ տէրն, եւ համարել որպէս զհեթանոս եւ զմաքսաւոր:

Արդար. արդարութեան անուն մի է, բայց զամենայն պարունակէ յինքեան զմասունս բարեաց, որ ունին զնա: Որպէս եւ արդարաբքն առաջինք, որք վկայեցան յԱստուծոյ՝ Յօբ եւ Ջաքարիա եւ Յովսէփ եւ այլք բազումք ըստ նոցին օրինակի պարտ է լինել, ասէ եւ եպիսկոպոսին՝ արդար եւ ճշմարիտ առաջի Աստուծոյ եւ մարդկան, եւ արտաքոյ ստութեան եւ անիրաւութեան՝ ի բանս եւ ի գործս:

Սուրբ. առաջին սուրբ այն է, որ մաքուրն է՝ յամենայն ախտից, որ պատերազմին ընդ ոգին, որ ոչ խոցուածս ընդունիցի ի սկզբանն եւ ոչ դեղոց կարօտանայցէ: Երկրորդ՝ սուրբ է, որ թէպէտ եւ հարկանիցի ինչ նետիւք բօցից, ոչ ասեմ մինչ ի կատարումն ոչ լինի ի ներքոյ անկեալ թշնամւոյն, միշտ խոցոտելոյ զոգին՝ հեշտութեանցն ախտից տեղի տուեալ, եւ երկրորդ բնութիւն զնոյն սովորութիւն առնելով, այլ, մանաւանդ, զանցեալ խոցուածսն բժշկեսցէ դեղովք ապաշխարութեան եւ յառաջակայիցն՝ զինուք աղօթից եւ պահոց եւ պահպանութեամբ զգայարանացն զգուշանալ. ոչ վերստին խոցոտիլ սովորական նետիւքն, այլ այնքան ատել զնոսա, մինչ զի յիշատակ նոցին ոչ հեշտութիւն, այլ տրտմութիւն բերել մտացն:

Արդ, որ յայսմ մասին է յառաջնոյն կամ յերկրորդիս, նա է սուրբ եւ այսմ առաքելական աստիճանի արժանաւոր, իսկ որ ախտիցն յօժարութեամբ տուեալ տեղի է՝ ոչ պատերազմի ընդ նոսա, այլէւ խնամով թաքուցանէ յինքեան զխնորն չարութեան, եւ միշտ խոցեալ ոգւով ոչ ատեայ զխոցմանն պատճառս. այլէւ սիրէ եւս եւ ոչ բժշկել փութայ զխոցուածսն, այլէւ օր ըստ օրէ նորոգել զվէրսն, ոչ է, եւ ոչ ասի սուրբ այնպիսին, եւ ոչ ընտրութեամբն Աստուծոյ կոչի սպասաւորել աստուածայնոցն, այլ իւրով ախտիւն շարժեալ՝ ըստ ներելոյն Աստուծոյ ձգի յայնոսիկ՝ ի կորուստ անձին եւ բազմաց:

Ժուժկալ. ժուժկալութիւնն իբրեւ նիւթ եւ տեղի իմն է ամենայն առաքինութեանց, զի որ կրէ յինքեան զառ ի չարեաց ժուժկալութիւն, կրէ եւ զբովանդակ մասունս բարեաց. եւ որ ոչ ունի զսա, անհաստատ է յամենայն բարութիւնս, զի թէպէտ եւ յօժարի ի բարիս եւ սկսանի, այլ ոչ կատարէ, որպէս այն, որ կամեցաւ առանց խորհելոյ շինել աշտարակ:

Եւ ժուժկալութեան սահման այս ինչ է. յամենայնէ, յորոց օրէնք Աստուծոյ հրաժարեցուցանեն զմեզ, պարտ է ժուժկալ լինել. առաջին՝ խորհրդոցն վատթարաց ոչ տալ տեղի առ միտսն, այլ ընդդէմ կալ ժուժկալութեամբն եւ հալածել ի սրտէն, զի մի եւ կատարումն հետեւեսցի: Չնոյն ժուժկալութիւն պարտ է եւ աչացն դնել պահապան, ոչ բռնադատիլ հեշտութեամբ ի յայրատ հայեցուածս կամ ի չարակնութիւնս, այլ անարատապէս հայել յարարածս Աստուծոյ. եւ ականջացն՝ ոչ յօժարութեամբ ունկնդիր լինել վնասակարաց բանից, այլ օգտակարաց. եւ լեզուոյ՝ ոչ խօսել զայն ինչ բանս՝ որով արտաքինքն վարին, որ է անվայելուչ սրբոյ աստիճանին, այլ զպիտանին եւ զգովելին. եւ սրտի՝ ոչ բարկանալ տարապարտուց, այլ հեզ լինել.

եւ ձեռաց՝ ոչ յանիրաւի զոք հարկանել, այլ վաստակել զբարիս եւ յաղօթս ամբառնալ. եւ բերանոյ՝ ոչ մերձենալ տարածամ ի կերակուրս, այլ պահօք դաստիարակիլ. եւ ոտից՝ ոչ զնալ ի շաւիղս գայթակղութեան ուղոց, այլ ի ճանապարհս արդարութեան. եւ ոչ եւ միոյ անդամոյ թոյլ տայ ժուժկալութիւն, որ ունի զնա, շարժիլ ի վատթարագոյնսն: Արդ, այսոքիկ եւ որ սոցին նման՝ է ժուժկալութեան գործ:

Մի արծաթասէր. արծաթասիրութիւնն՝ զոր մայր ասէ Պօղոս ամենայն չարեաց, թեպէտ եւ ամենայն ումեք եւ յամենայն գործս՝ յորում են մարդիկ, վնասակար է, առ թագաւորս եւ դատաւորս առ իշխանս եւ գործակալս, եւ առ ամենայն ոք, որ յաշխարհի են, բայց առաւել առ հոգեւոր առաջնորդութիւնս: Քանզի առ աշխարհի իշխանութիւնս՝ ըստ մարմնոյ առնէ վնաս ումեք, կամ անիրաւ դատելով կամ զրկելով, կամ յափշտակելով կամ զրպարտելով, կամ զողանալով կամ սպանանելով, կամ որ յայսպիսեաց իցեն. իսկ առ հոգեւորս այս զհոգիս վնասէ: Քանզի յայսմ աստէ է զանարժանս յառաջ կոչել յաստուածայնոցն սպասաւորութիւն ի կորուստ կոչողացն եւ կոչեցելոցն, եւ զարժանաւորս յետս կացուցանել, զպիղծս՝ իբրեւ զսուրբս, եւ զսուրբս՝ իբրեւ զպիղծս վարկանելով. եւ բիւրք են առ ի նմանէ խառնափնդորեալ կարգք յեկեղեցւոջ, որք խոտելիք են Աստուծոյ, զորոց Դաւիթ ասէ հոգւովն, թէ՛ «խոտեցին այնոքիկ, ոյք ընտրեալ են արծաթով» [Սաղմ. ԿԷ 31]: Վասն այնորիկ հրամայէ առաքեալն վասն եպիսկոպոսաց, թէ մի՛ արծաթասէր, մի՛ կռուօղ, մի՛ հարկանօղ, քանզի թէ Քրիստոսի ես աշակերտ, մանաւանդ թէ՛ փոխանակ զհեզութեան նորին ընկալ զօրինակ, որպէս հրամայէ աշակերտելոցն, թէ «Ուսարուք յինէն, զի հեզ են եւ խոնարհ» [Մատթ. ԺԱ 29]. զորմէ եւ Եսայի ասէ, թէ՛ «Ոչ աղաղակեսցէ, եւ ոչ վիճեսցի» [Ես. ԽԲ 2]. եւ ինքն իսկ Տէրն երանի տայ հեզոց եւ խաղաղարարաց:

Եւ զի ոչ ամենայնիւ ներօղ պարտ է լինել եւ հեզ առաջնորդին, այլ առ յանցաւորս զսաստն ի կիր արկանել. տայ եւ այնմ օրինակ, զի առեալ խարազան եւ եհան արտաքս զվաճառականսն ի տաճարէն, եւ այն զի՝ չուանեայ եւ ոչ ի կարծր նիւթոց:

Խրատէ զառաջնորդս՝ ոչ զդառնութիւն միայն ի կիր արկանել առ յանցաւորս, այլ եւ քաղցրութիւն եւ ներողութիւն ունել ի սաստելն, վասնորոյ յաւելու ասել, թէ՛ այլ հանդարտ. եւ զհանդարտութեան չափ տէրունականն ուսուցանէ խրատ, որ ոչ միայն զինքն, այլ եւ զընդհմական հանդարտ առնէ. զի յետ միոյ դիմաց ապտակին՝ զերկրորդն մատուցանել հրամայէ առաջի անիրաւին, որով թէ եւ քան զգազանս խստագոյն իցէ, քան զոչխարս հանդարտագոյն լինիցի: Եւ ինքն Քրիստոս ոչ աղաղակէր եւ ոչ վիճաբանէր, այլ որպէս զոչխար ի սպանո՞ վարիւր՝ ըստ Եսայեայ, զնոյն նմանութիւն պարտ է եւ առաջնորդաց եկեղեցւոյ բերել յինքեանս, բայց ոչ առ ամենայն ժամանակի: Քանզի յիւրոյ անձին արհամարհութիւն, որ յանիրաւաց, բարուք է հանդարտութիւն եւ վարձուց արժանաւոր: Իսկ յորժամ զսատուածային պատուիրանս տեսանէ արհամարհեալ յանզգամաց, առ այնպիսիսն ոչ զհանդարտութիւն, այլ զբարկութիւն ի կիր արկանել արժան է, ըստ բարւոյ նախանձուն Եղիայի վառելով, որպէս եւ Տէրն, յորժամ առ ինքն ձգէին զնախատանացն բանս՝ դիւահար կոչելով, ներելով տայր զպատասխանին ասելով՝ «Յիս դեւ ոչ գոյ» [Յովի. Ը 49]. իսկ յորժամ առ Յայր եւ Յոգին, ցասնոյր եւ վրէժխնդիր լինէր, այսինքն՝ յորժամ նոքա, որք զգործսն սատանայի գործէին, հայր կոչէին զԱստուած, ասէր՝ «Դուք ի հօրէ սատանայ էք» [Յովի. Ը 44]. եւ յորժամ զգործս Յոգւոյն՝ Բեղզբբուղայ՝ իշխանին դիւաց տային, ասէր թէ՛ «Ամենայն որ ասէ բան զՈրդւոյ մարդոյ թողի նմա, բայց որ զՅոգին Սուրբ հայիոյէ, մի՛ թողցի նմա» [Մատթ. ԺԲ 32]: Այսոքիկ եւ սոյնպիսիքս են բարուք, եւ ըստ կամացն Աստուծոյ՝ երբեմն հանդարտութեան, եւ երբեմն ոչ հանդարտութեան օրինակք, զոր առաքեալն հրամայէ ունել եպիսկոպոսին:

Յաւելու եւ զայս, վերակացու, ասէ, լինել բանին վարդապետութեան, այսինքն՝ ուսանել եւ գիտել եւ սպասաւորել աստուածային օրինացն քարոզութեան. եւ առաջին զայն ստանալ գործ եւ ապա զնիւթականացն հոգաբարձութիւն, որպէս առաքելալքն արարին եւ ուսուցին, քանզի ասէին՝ «Ոչ է պարտ թողուլ մեզ զբանն Աստուծոյ եւ պաշտել զսեղանս» [Գործ. 22]: Թէպէտ եւ սեղանն այն աղքատաց էր սպասաւորութիւն եւ ոչ անձանց, բայց զի զմարմինս կերակրել զաղքատաց՝ փոքր համարէին ի բարիս, քան զհոգի աղքատացեալս ի բարեաց հոգեւորական կերակրովն, որ է բան վարդապետութեանն: Նորին աղագաւ նիւթականին կերակրոց զՍտեփաննոսեանքն եղին սպասաւորել ժողովրդոցն, իսկ ինքեանք զբանն Աստուծոյ քարոզէին:

Եւ այս է՝ զոր հրամայէ եպիսկոպոսաց վերակացու լինել բանին վարդապետութեան, եւ զողջամիտսն մխիթարել, այսինքն, որք ոչ ունիցին հիւանդութիւն հաւատոյ, որք զաթոռն ընդունին զառաքելական, պարտին եւ զգործն ստանալ զառաքելոցն, որպէս եղեն հետեւողքն նոցին սուրբ հարքն առաջինք:

Եւ թէ որք զեպիսկոպոսութեանն ունիցին աստիճան, եւ ոչ իցեն վարժեալք վարդապետական բանիւ, պարտ է յայնցանէ, որք կրթեցան յայս շնորհ աստուածային, մերձ առ ինքեանս ունել, զի տացեն ծառայակցացն յիւրաքանչիւր ժամու զբանին Աստուծոյ զկերակուրս, եւ զհակառակորդսն, ասէ, կշտամբել: Երկու գործս դնէ բանին վարդապետութեան վերակացու լինելովն առաջնորդաց. առաջին՝ զծառայակիցսն կերակրելով ըստ աւետարանական հրամանին, երկրորդ՝ զթշնամիսն ճշմարտութեան, որք հակառակին հաւատոյն բանի եւ օրինաց Աստուծոյ եւ աւանդութեանց եկեղեցւոյ՝ ըմբերանել աստուածային գիտութեամբն, զի մի զպարզամիտս ի ժողովրդոցն՝ պատիր բանիւքն ձգեսցեն ի կորստեան իւրեանց խորխորատ, ըստ ընտանի գազանացն կրկին գործոյ, որք զվայրենի գազանսն հալածեն եւ զհօտս հովուին պահեն արթնութեամբ, որպէս կարգեցան:

Արդ, որք զառաջինն ընկալան ի Քրիստոսէ զգործ եպիսկոպոսութեան՝ դասք առաքելոցն, այսպէս արարին ինքեանք եւ ուսուցին հետեւողաց իւրեանց նովին օրինակաւ վարիլ: Իսկ յայժմուս թշուառութեան ժամանակի այնքան հեռացաք ի բարւոյ նոցին նմանութենէ, մինչեւ զի ոչ այլ ինչ գործոյ պատճառ գիտել զեպիսկոպոսութիւնն, որք յօժարին ստանալ զնա, բայց միայն զանազան հնարիւք ինչս ժողովել ի հնազանդելոցն եւ փառս որսալ ի փառաւորչաց, զոր անարգանս պարտ է ասել եւ ոչ փառս: Քանզի ճշմարիտ փառք այն են, որ ի ձեռն բարեաց գործոց անուանն Աստուծոյ լինիցի որք փառաւորութեան պատճառ, ըստ Տեառն հրամանին, թէ՛ «Տեսցեն զգործս ձեր բարիս եւ փառաւոր արասցեն զՅայր ձեր, որ յերկինս է» [Մատթ. Ե 16]: Իսկ անձին առ ի մարդկանէ փառքն ոչ միայն հակառակ են փառացն Աստուծոյ՝ ըստ ասելոյն ի Տեառնէ զոմանց, թէ՛ «Սիրեցին զփառս մարդկան առաւել, քան զփառս Աստուծոյ» [Յովհ. ԺԲ 43], այլեւ ի գովչացն առ երեսս դսրովեալք լինին իբրեւ զախտաւորս, յորժամ տեսանեն ցանկութեամբ զհետ ընթացեալ գովութեան եւ փառացն, որ ի նոցանէ:

Թողից ասել զեւս դժնդակագոյնսն այսր ժամանակի եպիսկոպոսաց գործ, զի եւ բազում անարգանաց եւ տուժից տանին յայլազգեաց, ոչ յաղագս աստուածային օրինացն, որպէս առաջին սուրբքն, զի այն երանութեան էր արժանաւոր, այլ վասն սնոտի փառացն յուսոյ եւ զգերփեալսն ի հնազանդելոց պէսպէս հնարիւք եւ բռնութեամբ, զոր յեկեղեցւոյ պայծառութիւն եւ յաղքատաց պէտս հրամայեցաւ լինել, զայնոսիկ ժողովեն որպէս զմաքսաւորս, եւ բռնակալաց աշխարհի նուիրեն: Եւ ոչ թէ ի նոցանէ բռնադատելով զայն առնեն. քանզի ի սոյն իսկ յազգէ մերմէ սկսաւ այս գործ չարութեան, եւ ծանուցաւ այլազգեաց յաներկիւղից ոմանց եւ ի փառամոլից, որք մի ի միոյ վերայ յառնելով տակաւին աճեցուցանեն զկապալս ի վերայ եկեղեցւոյ

Քրիստոսի, որպէս գտունս բաժից կամ գներկոցաց, որոց մեղաց չիք թողութիւն՝ ըստ առ ի յԱստուած մեղուցելոցն: Որ ոչ միայն քահանայապետութեան չեն արժանի՝ որ զայս դաժան գործ սկիզբն արարին մուծանել յեկեղեցի, եւ կամ այնոքիկ, որք ի հայրապետաց ընկեցեալք յաթոռոյ՝ վասն հոգեւոր պատճառի, այլազգեաց բռնաւորութեամբ եւ յաւելուածով կապալացն՝ դարձեալ փութան յափշտակել զեպիսկոպոսութիւնն, այլեւ՝ ոչ քրիստոնէութեան հաւատոյ եւ կարգի եւ ոչ օրինաւոր քահանայական թաղման եւ սրբոյ պատարագին յիշատակի:

Զի՞նչ ասել եւ զմօրէն այսոցիկ չարեաց, զյայտնապէս հակառակացն ճշմարտութեան եւ սրբոյ աթոռոյ Լուսաւորչին, որք ինքնաշարժ ախտիւք եւ բռնակալաց աշխարհի հրամանօք զանձինս իւրեանց յայս աստիճան հոգեւոր բարձրութեան ձգեն, եւ ոչ ընտրութեամբ Աստուծոյ եւ աստուածայնոց արանց համօրէն ազգիս, որպէս օրէնն պահանջէ, որով բիւր նեխութեան եւ ապականութեան անդամոց Քրիստոսի լինին պատճառ: Զի թէ ի գլուխն Ահարօնի իջանեն շնորհք Յոզուայն Սրբոյ, որ է հայրապետութիւնն, եւ ի գլխոյն ի մօրուսն՝ յեպիսկոպոսութիւնն, եւ ի մօրուացն ի գրապանակսն, որ է քահանայութիւնն, եւ ի գրապանացն ի զգեստն, որք են ժողովրդեանն դասք:

Եւ արդ, զո՞ր արդեօք իւղ շնորհաց ունիցին, որք յԱհարօնեանն գլխոյ օտարացեալք են, եւ ընդ Դադանայ եւ Աբիրօնի, որք հակառակ կացին մեծին Մովսէսի եւ Ահարովնի,

յօդեալք իցեն գործովք, կամ եթէ զոր կամակորութեամբն մերկացան՝ բաժանեալք եւ որոշեալք ի շնորհաց, զհարդ կարիցեն գլխնքեանց կարուսեալն այլոց ընձեռել:

Որք յաղագս սոյն եւ այսր իրի յանդգնութեան՝ ի ժամանակս տեառն մերոյ եւ եղբօր Գրիգորիսի կաթուղիկոսի սրբոյ, ի սուրբ լեռնն՝ մեծաւ սիւնհողոսիւ, սուրբ եւ առաքինեաց արանց ազգիս Յայոց՝ ժողովով աւելի քան զերկու հազար եւ հինգ հարիւր անձանց եպիսկոպոսաց, վարդապետաց, հարց վանականաց եւ միանձանց սրբոյ լեռինն, նգովեալ հերքեցան յեկեղեցոյ Քրիստոսի, եւ սրով բանին Աստուծոյ հատեալ՝ ի բաց ընկեցան որպէս զմեխեալ եւ զփտեալ անդամ յառողջ մարմնոյ եկեղեցոյ՝ անէծս ցաւագինս կուտեալ ի գլուխ նոցա, որոց ոչ եկեալ ի միտս, եւ ոչ զգացեալ զմահու ցաւս հոգւոց՝ անելով զդեղ կենաց ի դեղատուէ իմաստնոյ, եւ բժշկիլ զղջմամբ եւ ապաշխարութեամբ ի մահահամբոյր պատուհասէն: Այլ, հանգոյն իժի եւ քարբի, խցեալ զլսելիս աստուածային բանին, դեռես յամառեալ բորբոքին ի նոյն չարութեան, արբեալ եւ յիմարեալ փառամոլ ախտիւ իբրեւ զգազան կատաղիս, ոչ դադարեն մուծանել զխռովութիւն յառագաստ խաղաղութեան երկնաւոր հարսնարանի՝ փեսայացեալ բանին, զոր արեամբն զնեալ՝ ազատեաց ի չար մշակութեանց բանսարկուին, որոց արիւն ի գլուխ իւրեանց եղիցի, եւ վրեժ չարութեան գործոց նոցին՝ յանձինս իւրեանց լիցի:

Այլ դուք, որք ճշմարտութեանն էք ջատագովք եւ նոյն բարեաց հետեւօղք, աղաչենք պատրաստ լերուք ամենայնիւ ի գործ հոգեւոր հովուութեանդ, զոր ընկալայք ի ճշմարիտ հովուապետէն, ամենայն զգայարանօք ըստ վերոգրեալ սահմանիդ եւ ըստ կանոնական խրատու սուրբ առաքելոցն եւ նոցին հետեւողաց, որպէս զի համարձակութեամբ եւ պարզերես կացջիք առաջի աւանդողին ձեզ զտաղանդ պատուիրանին՝ տալով զհամար շահիցն նմա կրկնապատիկ յաւելուածով, յորմէ լիցիք զբարբառն երանաւէտ, եթէ՝ «Օառայ բարի եւ հաւատարիմ, որովհետեւ ի սակաւուդ հաւատարիմ ես, ի վերայ բազմաց կառուցից զքեզ, մուտ յուրախութիւն տեառն քոյ» [Մատթ. ԻԵ 21-23]: Որում եւ մեզ լիցի աղօթիւք ձեր հանդիպիլ ի Քրիստոս Յիսուս ի Տէր մեր:

ԱՌ ԴԱՍՍ ՔԱՅԱՆԱՅԻՑ

Դարձուցուք այսուհետեւ զկարգ բանիս առ դասս քահանայիցդ, որք աստիճանաւ երկրորդ էք եպիսկոպոսաց եւ կարգեալ էք քահանայական գործառնութեամբ նուիրել զամենայն գորդիս Աստուծոյ՝ ծնանելով զամենայնսն մկրտութեամբ սուրբ աւագանաւն՝ յորդեգրութիւն Զօրն երկնաւորի եւ ի ժառանգակցութիւն Քրիստոսի Աստուծոյ, եւ մեղսաքաւիչ մարմնոյ եւ արեանն Տեառն բաշխմամբ կերակրել զհոգիս նոցա յանմահութիւն:

Եւ արդ՝ աղաչեն զամենայնսն սիրովն Քրիստոսի բանալ զաչս մտաց եւ զարթնուլ ի մահահրաւէր թմբուրեանէ կենցաղոյս եւ ճանաչել զգօրութիւն երկնային գործոյդ, յորս հրաւիրեալ կոչեցայք, որ եւ հրեշտակական գերաշխարհիկ գօրութեանցն է գեր ի վերոյ այս աստիճան, որք անարատութեամբ եւ սրբութեամբ պաշտեն զսա:

Եւ որովհետեւ արժանի եղէք յերկնայինն գործ մատուցանել զանձինս, մի եւ մի իւրք պատճառս տայք արատոյ անկանել ի պաշտօնդ ձեր՝ ըստ առաքելոյն խրատու, այլ արիաբար եւ յօժարամիտ սրտիւ, առանց ծուլութեան զկանոնեալ սահմանս աղօթից սուրբ հարցն կատարեցէք ըստ իւրաքանչիւր ժամու: Եւ մաքուր հոգւով եւ սուրբ սրտիւ եւ անարատ հաւատով եւ մեծաւ յուսով եւ պարզ մտօք եւ կատարեալ ահիւ եւ դողութեամբ սպասաւորեցէք աստուածային խորհրդոյն եւ մի իբրեւ ջուր ընդ խողովակ անցանիցէք անմտաբար ընդ խորհրդական բանս աղօթիցն, զոր մատուցանէք, եթէ սաղմոսերգութիւնք են եւ եթէ ընթերցումն սուրբ գրոց, եթէ պաշտօներգութիւն եւ եթէ քահանայական աղօթք սրբոյ պատարագին եւ այլոց կարգադրեալ կանոնացն, այլ յոյժ մտաւորաբար. եւ թէ գոյ հնար արտասուօք եւ մեծաւ երկիւղիւ, որպէս թէ դուք նորոգապէս բոխէք զնոսա ի սրտէ եւ ի մտաց ձերոց, զի ամենայնքն խնդրուածք են առ Աստուած զանագան եւ պէս պէս պարգեւաց եւ բարութեանց մեզ առ ի նմանէ: Եւ ինքն պարգեւատուն բարեաց Աստուած, յորժամ տեսանէ զջերմեռանդն հայցուածս խնդրողին, առաւել առատապէս շնորհէ զխնդրելին, ըստ այնմ, եթէ՝ «Որ խնդրէ առնու» [Մատթ. Է 8] եւ որ զկնի:

Գիտասցիք, զի յառաջագոյն ի ժամանակս առաքելոցն, մինչդեռ նոր ծաղկեաց գարունն հաւատոյ, ամենայնքն լի էին Զոգուով Սրբով եւ շնորհօք Զոգւոյն, յինքեանց մտաց խօսէին զբանս աղօթից՝ ըստ ժամուն պիտոյից զպատարագին խորհրդածութեան եւ զամենայն կատարողապետութեանց:

Իսկ ի ժամանակս յետինս, քանզի հանդերձեալ էր ձմեռն մեղացն սառնամանեօք խստութեան ցրտացուցանել զբորբոքումն առ Աստուած սիրոյն յամենեցունց, եւ բթացուցանել ի շնորհաց Սուրբ Զոգւոյն, տեսեալ հոգւոյ ակամբ սուրբ եւ հոգեկիր վարդապետք եկեղեցւոյ՝ եւ այնր աղագաւ գրով աւանդեցին զամենայն զկնի եկողացս: Զի նոքօք անվրէպ եւ անսայթաք առաջնորդեալք՝ կատարեսցուք զամենայն կարգաւորութիւնս եկեղեցւոյ, վասնորոյ զսոյն մտաւորաբար պարտք է մատուցանել եւ մեծաւ հաւատով եւ յուսով:

Ծաներուք եւ զայս, զի կոչումն անուան քահանայութեանդ ձերոյ՝ ոչ է ի մարդկանէ եւ ոչ ի ձեռն մարդոյ, այլ յայնմանէ, որ կոչեցաւն քահանայ ըստ կարգին Մելքիսեդեկի, որ եւ ինքն է ճշմարիտ քահանայ եւ քահանայապետ եւ պատարագ Աստուծոյ Զօր. եւ նա ետ ձեզ զկոչումն անուան իւրոյ եւ յանձն արար ընդ անուանն եւ զգործն իւր՝ հովուել զժողովուրդ իւր եւ ուսուցանել միշտ զգործս բարիս եւ տալ զանձն օրինակ բարեաց ամենեցուն, ըստ որում եւ Պօղոս գրէր առ Տիմոթէոս, թէ՝ «Մի՛ անփոյթ առնէր զշնորհացդ, որ տուաւ քեզ ի ձեռնադրութենէ երիցութեան» [Ա Տիմ. Դ 14]: Եւ դարձեալ՝ թէ՝ «Քահանայք կրկին պատուոյ արժանի եղիցին, որք աշխատիցին բանիւ եւ վարդապետութեամբ» [Ա Տիմ. Ե 17]:

Վասնորոյ, աղաչենք, զի ըստ անուանդ կոչման եւ զգործն կատարիցէք. եւ որպէս հարք եւ ծնողք ժողովրդեան ձերոյ՝ յամենայն ժամ տուք նոցա զհոգեւոր խրատս, միշտ ուսուցանելով յեկեղեցւոջ, ի հրապարակս եւ առտնին, զամենայն ոք ըստ իւրաքանչիւր հասակի՝ զգուշացուցանելով եւ յորդորելով յաստուածայինսն:

Եւ թէպէտ եւ ամենայն բարեաց տեսալօք եւ առաքինութեամբ կատարեալք իցէք, սակայն զեկեղեցւոյ պայծառութենէ եւ զսրբոյ Պատարագին պատուական եւ մաքուր զգեստուց մի անփոյթ առնէք, որպէս լսենք զոմանց՝ եթէ հասարակաց զգեստուք եւ աղտեղեալ տրեխօք ելանեն ի բեմն սուրբ եւ զսարսափելի խորհուրդն անխորհրդական զգեստուք կատարեն, եւ զայն ի պարկեշտութիւն անձանց համարին, հանելով զժողովուրդն արտաքոյ եկեղեցւոյն եւ զդուռն ընդդէմ ձգելով. եւ ոչ միայն, այլեւ անմտաբար ի բամբասանս բերին ոմանց եկեղեցեաց եւ ի մերս բարեզարդ կարգաւորութիւն:

Եւ արդ՝ մի ոք վայրապար եւ անխորհուրդ համարեսցի զքահանայականն զգեստ, զի որպէս ի հնումն առ Մովսէսիւ նկարեցաւ խորհուրդ սրբոյ պատարագին նախօրինակօք եւ նորումն կատարեցաւ ի Քրիստոս, նոյնպէս եւ քահանայք հնոյն՝ նորոյ քահանայութեանս էին տիպք, եւ պատմութեանն Ահարովնի՝ նորոց քահանայիցս զգեստուցն յարացոյց, զոր եւ սուրբ առաքեալքն, գործակցութեամբ Հոգւոյն Սրբոյ, կատարելապէս յարդարեցին զլրումն եկեղեցւոյ, եւ յամենայն տեղիս ձեռնադրեալ կարգէին քահանայս եւ սարկաւագունս, եւ պատուիրէին ներքին եւ արտաքին մաքրութեամբ սպասաւորել փրկական խորհրդոյն, որ եւ ընդ բնաւ աշխարհս մեծազարդ պայծառութեամբ զարդարեալ լինէին եկեղեցիք ընդհանուր ազգաց քրիստոնէից՝ պայծառազգեստ վայելչութեամբ սպասաւորել սրբութեանցն: Նա եւս առաւել եւ Հայաստանեայցս ազգի եկեղեցիք ի սուրբ Լուսաւորչէն մերմէ սկսեալ մինչեւ յաւերումն աշխարհի ի հիմանց:

Բայց այսոցիկ բարւոյ աւանդութեանց հակառակելոյ առաջնոց հարցն սրբոց ոչ այլ ինչ է պատճառ, քան թէ տգիտութիւն եւ ինքնօրէն անձնահաճ կամապաշտութիւն, որք ոչ տեսին զառաջին պայծառութիւնս մինչ ողորմութեամբ Տեառն լի էր երկիր, այլ ի հալածանացս ծնեալ ժամանակի ընդ խրթնատեսակս նայեցան տգեղութիւն, որովք կապեալ են յամենայն ուրեք ազգ մեր յաղքատութեան, որպէս ընդ երկաթոյ ի ներքոյ լծոյ ծառայութեան իւրաքանչիւր ազգաց՝ ուր եւ իցեն, ոյք եւ հարկաւոր պիտոյիցն կարօտ են ըստ մարմնոյ, թող թէ պայծառութեան եկեղեցւոյ ի խնդիր, եւ ըստ հոգւոյ ամենեւին անշարժք ի բարիս, զի ցամաքեցաւ սէրն՝ ըստ տէրունական բանին: Ոչ որպէս առաջին հալածանացն ժամանակին՝ նոր հաւատացեալքն ի Քրիստոս, յորս այնքան զօրանայր սէրն Աստուծոյ՝ մինչ զի ի հալածանսն առաւել մեծամեծս եւ վայելուչս տեսանենք շինեալ ի նոցանէ եկեղեցիս, քան մինչ խաղաղութիւն եղել եկեղեցւոյ:

Եւ արդ՝ ո՞ ի գիտնոց զխաւարին զայս տեսանելով անկարգութիւն, որ յաղքատութենէ եւ յաւերմանէ, եւ զբարկութիւնս, որ յԱստուծոյ աւանդութիւնս եւ օրէնս կարծելով, եւ նորին աղագաւ յանդգնին հակառակել աստուածաւանդ հրամանացն:

Այլ մեր ի բաց թողեալ զանհմաստ հակառակորդացն զվիճմունս, հնազանդ եղելոցդ օրինաց Աստուծոյ ի վերայ ասացելոցս եւ զայս աւանդեսցուք պատուիրան, որ վասն այսր իրի խնդրոյ:

Ոչ ունել քահանայից յԱստուծոյ եւ ի մենջ հրաման առանց սուրբ ծածկութի պատարագամատուցին զգենլոյ մատուցանել զսուրբ պատարագն, կամ աւետարան կարդալ, կամ խաչ առնուլ ի ձեռս, կամ յայլ ինչ ի սրբութիւնսն մերձեմալ. եւ այսոքիկ,

զորս գրեցաք սակաւութիւն եւ որ նման սոցին՝ արտաքին մարդոյս զգուշութիւն, որոց հանդերձեալ են սպասաւորել աստուածայնոցն:

Ասացուք եւ յաղագս ներքին մարդոյն, որ եւ օրինակ է արտաքնոյն, զարդ՝ սորին հոգեւոր պայծառութեան զարդու. մի որ ձեռն անարժանութեամբ աստուածային խորհրդոյն սպասաւորեսցէ եւ կամ զոր ի ժողովրդենէն անքննաբար հաղորդեսցուցէ, զի մի ընդ Յուդայի եւ ընդ խաչահանուացն դատապարտեսցի:

Մի որ ծածկելով յոգի իւր զգործս մեղաց առանց ճշմարիտ խոստովանութեան եւ այնպէս մատիցէ ի տէրունական խորհրդոյն սպասաւորութիւն, զի մի զբարկութիւն Աստուծոյ շարժեսցէ ի վերայ ինքեանն եւ աշխարհին, եւ ի բաց ընկեսցի յաստուածային հարսանեացն, քանզի զխաւարատեսակ մեղացն զգեցեալ պատմուճան՝ եմուտ յեկեղեցի Աստուծոյ, որ է օրինակ վերին հարսնարանին, որ եւ լսելոց է զահագին բարբառն, «Ընկեր, զիա՞րդ մտեր այսր, զի ոչ ունէիր հանդերձ հարսանեաց» [Մատթ. ԻԲ 12], եւ թէ՛ «Յանէք զդա արտաքս» [Մատթ. ԻԲ 13], այս է՝ յարքայութենէն, եւ կտրեսցէք զդա ընդ մէջ, այսինքն՝ զհաւատն եւ զշնորհս սուրբ աւագանին եւ զքահանայութեան ի բաց մերկացուցէք, եւ մասն դորա ոչ ընդ հաւատացեալս, այլ ընդ անհաւատսն լիցի, քանզի ոչ հաւատաց եթէ մարմնոյ եւ արեանն Աստուծոյ սպասաւորէ, այլ հաց լոկ եւ գինի համարեցաւ, եւ վասն այնորիկ անարժանութեամբ ժպրհեցաւ մերձենալ եւ առանց խոստովանութեան:

Եւ արդ՝ աղաչենք, մի որպէս մարմնական ինչ գործ վարկանելով զերկնային խորհրդոյն կատարումն, այլ ահիւ եւ դողութեամբ սպասաւորեսցէք աստուածայնոցն, զի թէ սերովբէն սուրբ յօրինակն ունելեաց կարօտանայր, մերձենալովն ի կայծակունսն, որ ի վերայ սեղանոյն, մեզ հողեղինացս եւ մեղաւորացս քանի՞ մաքրութիւն եւ զգուշութիւն պիտոյ է յաղագս առ ճշմարտութիւն այնր օրինակի մերձենալոյ:

Վասնորոյ զմիտս եւ զգայարանս պարտապան էք պարսպել յամենայն վնասակար իրաց՝ սպասաւորքդ սրբոյ խորհրդոյ յամենայն ժամանակի, առաւել յայնմ աւուր, յորում յԱստուած մերձենալ հանդերձեալ իցէք:

Զի թէ Մովսիսի ասացաւ յԱստուծոյ՝ ոչ կոխել մեռեալ մորթովք զտեղին, ուր երեւեցաւ հուր աստուածութեան, ո՞րքան մեզ արժան է լուծանել նախ զմեռելութիւն մեղաց ի մէնջ, եւ ապա յաստուածայինն մերձենալ խորհուրդ, զի ոչ միայն խօսել ընդ Աստուծոյ ըստ Մովսիսի կայ մեր առաջի եւ կամ տեսանել զյետոյսն Աստուծոյ, այլեւ ձեռօք շօշափել զանշօշափելին եւ շրթամբք համբուրել զսէրն եւ բերանով ճաշակել զկերակրիչն ամենայնի, եւ ի սիրտս ընդունել եւ հոգւով միանալ ընդ նոյն եւ լինել Աստուած՝ շնորհօք ընդ Աստուծոյ միաւորելովն: Վասն որոյ զտեսանելիս եւ զլսելիս եւ զլեզու եւ զամենայն անդամս խրատեսցէք ի բարիս շարժել եւ ի չարիս անշարժ մնալ, եւ ողջախոհութեամբ եւ սրբութեամբ յաշխարհական ցանկութեանց եւ զբօսանաց զմիտսն ամփոփելով, եւ ապա յերկնային խորհրդոյն սպասաւորութիւն մերձենայցէք. զի մի ի դատաստան անձանց ուտիցէք եւ ըմպիցէք զմարմին եւ զարիւն Տեառն՝ ըստ առաքելոյն, այլ եւ քաւութիւն մեղաց եւ ի մաքրութիւն հոգւոց՝ ձեզ եւ ժողովրդեան ձերում:

Եւ մի լիցի, որպէս լուսաք զոմանց աներկիւղ քահանայից, որ ի քաղաքս բնակին, եթէ յառաւօտն մինչեւ ցժամ պատարագին ի վաճառափողոցս քաղաքին շրջին ի տուրեւառութիւն վաճառաց, յորս բազում նետք հարկանին յոգիսն ընդ մուտս զգայարանացն ի տեսանել եւ ի լսել, ի խօսել եւ ի գործել զանպատշաճսն. եւ անտի դարձեալք մտանել յանդգնին յեկեղեցիս, եւ յայլոց քահանայից կազմեալ նշխարաւ, առանց սաղմոսաց եւ աղօթից, մատուցանեն զպատարագն: Որոց պատուիրենք՝

յայսմիտե տ է թաց կալ յայդպիսի աներկիւղ եւ չար սովորութեանց, եւ նախ սրբել զմիտսն գիշերոյն եւ տունջեանն աղօթիւք, որպէս վերագոյնն գրեցաք, եւ ապա մտանել յեկեղեցի սուրբ եւ յանդիման լինել Աստուծոյ սրբով պատարագաւն:

Մի ոք ի քահանայից առանց գիտելոյ զխոստովանութիւն մարդոյ, զհաւատոյն եւ զգործոցն, կամ իւր ինքեան, կամ այլուն քահանայի, տացէ նմա զհաղորդութիւն մարմնոյ եւ արեանն Քրիստոսի՝ ի յառողջութեան կամ ի հիւանդութեան, եւ կամ գիտելով զանարժանութիւն ուրուք՝ տայ յաղագս մարդահաճութեան զաստուածային խորհուրդն, ծածկելով այնու զկարծիս չարութեան, որ զնմանէ. զի այնպիսին է, որ տայ զսրբութիւն շանց եւ առաջի արկանէ զմարգարիտն խոզաց:

Մի ոք ի քահանայից պատարագողաց, ոխակալութիւն ունելով ի սորին ընդ ունէք, մատիցէ յաստուածային խորհրդոյն կատարումն եւ անընդունելի առնիցէ զպատարագն առաջի Աստուծոյ, այլ նախ հաշտեսցի ընդ եղբօրն, ըստ հրամանին Քրիստոսի, եւ ապա եկեալ մատուցէ զպատարագն:

Նոյն սահման եւ ի վերայ հաղորդականացն եղիցի, բայց այս օրէնք առ համապատիւ եղբարսն է, քահանայից առ քահանայս, եւ աշխարհականաց առ աշխարհականս: Իսկ եթէ քահանայն ընդ բանիւ արարեալ զոք ի ժողովրդականացն վասն պատուիրանագանց լինելոյ յօրէնս Աստուծոյ, եւ նա հպարտացեալ ոչ զայ յուղղութիւն, եւ ոչ խնդրէ թողութիւն ի քահանայէ անտի, քահանայն առանց խղճի մտաց մատուցէ զսուրբ պատարագն. եւ ընդ դատապարտութեամբ է այն, որ ոչ ուղղեցաւ, եւ ոչ խնդրեաց զթողութիւն, քանզի Քրիստոս ոչ վայրապար հրամայէ առնել թողութիւն տրտմեցուցանողին, այլ եթէ անկեալ առաջի խոստանայ ապաշխարել, յայնժամ ասէ՝ շնորհեսցի առ ի քէն թողութիւն յանցանացն, զոր առ քեզն յանցեալ: Իսկ եթէ մեղուցեալն առաջի անկեալ քահանային եւ խոստանայ զալ յուղղութիւն, եւ քահանայն յաղագս մարմնական ինչ պատճառի ոխակալ լինելով՝ ոչ առնիցէ թողութիւն, չէ պարտ նախ քան զհաշտելն մատուցանել պատարագ:

Նաեւ առ քահանայս բազում պատճառս յօդէ սատանայ՝ խռովելոյ ընդ միմեանս եւ վիճաբանելոյ եւ յոխակալութեան եւ ի նախանձու ախտս տանջելով զոգին զամենայն ժամանակս, որ եւ առ տգէտս եւ վայրենաբարոյս առաւել զօրանայ. է որ վասն յափշտակելոյ ի ժողովրդեան միմեանց՝ ազահութեան ախտիւ, եւ է որ յաղագս հարստահարելոյ զընկերն՝ փառասիրութեան աղագաւ, եւ յայլ եւս յուրվագոյն ատելութեան պատճառաց լուծանի ի նոցանէ սիրոյն պատուիրան, եւ Քրիստոսի աշակերտութեան նշան, առ որս ասաց, թէ՝ «Յայսմ ծանիցէ աշխարհ զձեզ. եթէ իմ աշակերտք էք, եթէ սիրիցէք զմիմեանս» [Յովի. ԺԳ 35]: Որոց եւ մեք զառաքելականն աւանդենք պատուիրան, եթէ «Արեգակն ի վերայ բարկութեան ձերոյ մի մտցէ, եւ մի տայք տեղի սատանայի» [Յովի. ԺԳ 35], այսինքն՝ զի թէ զխաղաղութիւնն, զոր ետ Քրիստոս աշակերտացն եւ նոքօք մեզ, փութայ հանել ի ձենջ խռովարարն, եւ զխռովութիւն իւր փոխանակ խաղաղութեան սերմանել ի միջի ձերում, մի տայք նմա տեղի՝ երկար ժամանակաւ բնակել ի յոգիս ձեր, զի մի զտաճարդ Աստուծոյ, որ ի ձեզ, չարին առնիցէք բնակութիւն ատելութեամբն եւ ոխակալութեամբն: Այլ ընդ շարժել բարկութեան եռանդն բոցոյն, որ ի փչմանէ անտի նորա բորբոքի, շիջուցէք զնա խաղաղարար ջրով հոգւոյն՝ նախ քան զմտանել արեգականն, որպէս զի խաղաղասեր լինելովն՝ որդիք Աստուծոյ լինիջիք, ըստ երանութեան խոստման զճշմարիտ որդւոյն Աստուծոյ զգործ արդեամբ ի ձեզ կատարելով, այն որ արար խաղաղութիւն յերկինս եւ յերկրի արեամբ խաչին իւրոյ:

Իսկ եթէ ոք ի քահանայից խռովելոց ընդ ընկերի՝ սիրէ զատելութիւն, քան զսէր, եւ զխռովութիւն, քան զխաղաղութիւն եւ ոչ լուծանէ զտրտմութեան պատճառն եւ հաշտեսցի ընդ եղբօր իւրում՝ ի խոնարհել միոյն եւ ի խնդրել զհաշտութիւն, մի

իշխեսցէ քահանայազորութիւն առնել, որչափ զդեւն տրտմութեան եւ բարկութեան յինքն բնակեցուցանէ, զի «Ձի՞նչ հաղորդութիւն է լուսոյ ընդ խաւարի» ասէ առաքեալն, կամ «Քրիստոսի ընդ Բելիարայ» [Բ Կոր. 2 15]: Քանզի գրեալ է, թէ որպէս «Որ զւերն ունի՝ զԱստուած յինքն բնակեցուցանէ, զի Աստուած սեր է» [Ա Յովհ. 7 16], նոյնպէս՝ եւ որ զատելութիւն ունիցի՝ զաստանայ յանձն իւր դարմանէ, զի կերակուր է նորա ատելութիւնն, որպէս եւ ամենայն զործք չարեաց: Վասն որոյ, ամենայն ոք ի ձէնց որքան ատելութեան ախտիւ տայ տեղի սատանայի ընդարձակագոյն յինքեան, Քրիստոսի մարմնոյն եւ արեանն ոչ է արժանի բնակութեան. եւ թէ ռխակալութեան եւ նենգութեան հոգւով յանդգնի առնուլ զնա, նման լինի Յուդայի մատնչի, որ յետ պատառոյն ապա եմուտ ի նա սատանայ:

Եւ արդ, աղաչեմ զամենեսեան զձեզ՝ դժուարաշարժս լինել ի վիճաբանութիւնս եւ ի կռիւս եւ դիւրաշարժ՝ ի հաշտութիւն եւ ի խաղաղութիւն: Եւ մի ոք, որ զօրաւորն է ի մարմնական յառաջադիմութիւնս, ջանայ զրկել զընկերն եւ անիրաւել, զի մի գայն, որ առնէ իրաւունս զրկելոց զԱստուած, դատաւոր եւ դատախազ իւր կացուցանէ, եւ զոր ի յանցաւոր կեանս զրկեաց, ի յանանցն վաշխիւ հատուցանէ:

Այլ աւագագոյնքդ ի ձէնց եւ հաստատունքդ յիմաստութիւն՝ շահեցարուք զկրտսերագոյնսն եւ զպակասամիտսն, ներօղ լինելով առ նոսին եւ երկայնամիտ, որով եւ վարձս ընկալջիք յԱստուծոյ ի շահելն զեղբարս:

Իսկ կրտսերագունիցդ պատուէր տամք՝ զխոնարհութիւն եւ զհնազանդութիւն ցուցանել աւագագունիցն եւ իմաստնոց քահանայիցն: Եւ յայսպիսի բարեկարգութիւն լինելով ձեր՝ անուանն Աստուծոյ փառաւորութեան լինիք պատճառ առ արտաքինսն եւ ժողովրդեան ձերոյ՝ բարեաց նախանձու: Իսկ եթէ ի վիճմունս ի հակառակաբանութիւնս եւ ի հայիոյութիւնս միմեանց տեսանեն զձեզ, յորս են բազումք, մանաւանդ թէ ամենեքին, բաց ի սակաւուց, անունն Աստուծոյ վասն ձեր հայիոյի տեսողացն արտաքնոց, եւ ժողովուրդ ձեր առաւել խոտորին ի պատուիրանացն Աստուծոյ, եւ զպատիժ դատաստանի դուք կրէք զթիրելոցն ձերով պատճառաւ յուղիղ ճանապարհէ աստուածային օրինացն:

Մի ոք ի ձէնց սիրեսցէ զկուրութիւն տգիտութեան քահանայական ուսմանց յաղագս ծուլութեան կամ աշխարհական զբաղմանց, այլ թէւ ոչ ամենեցուն ամենայն շնորհօք կատարեալ լինել հնար է, զոր եւ աստուածային օրէնքն պահանջեն ի քահանայից, սակայն ի հարկաւորսն պարտին անթերի լինել, այսինքն՝ զեկեղեցական գիրս ուղիղ ընթեռնուլ, եւ զմանր ուսմունս ձայնաւորացն պաշտել յեկեղեցիս, եւ ապա գալ ի ձեռնադրութիւն քահանայութեան:

Բայց լսեմք զոմանց սուտ քահանայից, զի ոչ միայն յայլ ուսմանէ են տգէտք յաղագս հեղութեան, մանաւանդ թէ՛ վասն անհաւատութեան, այլ եւ զսաղմոսն Դաւթի ոչ գիտեն բովանդակ, առանց որոյ զնոսին զհարիւր եւ յիսուն փոխսն խօսել բերանով ընդ Աստուծոյ՝ ոչ մատչի պատարագ ըստ աւանդութեան կանոնի հարցն սրբոց: Ոմանք եւ ոչ զբանս աղօթից սրբոյ պատարագին գիտեն ի բերան, եւ սուտ պատարագաւն խաբել կարծեն զանխաբելին Աստուած եւ զմարդիկ եւ զհոգիս ննջեցելոցն՝ առ չաչս մարդկան կեղծաւորելով, որոց դատաստանն առաւել է, քան զամենայն մեղաց առաջի Աստուծոյ. որք եւ ոչ իսկ են արժանի այլ եւս մատուցանելոյ պատարագ, թէւ յետ յանդիմանելոյն առնուցուն ի բերան: Այլ թէ կամիցին զոգիս իւրեանց փրկել ի դատապարտութենէ մեծաւ ապաշխարութեամբ՝ թէ արդեօք քաւեսցին յառ Աստուած մեղանացն:

Մի ոք ի քահանայից վայրապար եւ առանց մեծի զգուշութեան կատարեսցէ զսուրբ մկրտութիւնն իբրեւ զաշխարհական ինչ գործ համարելով եւ մի ընդ աստուածային

բանիցն բանս ծիծաղականս եւ կատակերգութիւնս խառնեսցէ, որպէս լսենք զոմանց տգիտաց եւ աներկիւղից՝ զի առնեն, զի մի ինքեանց դատապարտութեան լինիցի այն պատճառաւ, եւ երախայիցն անմեղաց թերակատար զշնորհս Յոգուոյն Սրբոյ ընդունելոյ, այլ որպէս զսուրբ պատարագն, այնպէս երկիւղիւ կատարեցէք զպաշտամունսն եւ զընթերցմունսն աստուածաշունչ բանիցն եւ զամենայն կարգաւորութիւնսն սուրբ մկրտութեանն խորհրդոյ. եւ եթէ այսպէս առնիցէք, հաւատացէք, զի որպէս էջ Յոգին Սուրբ ի վերայ փառակցին իւրոյ ի Յորդանան, նոյնպէս եւ ի վերայ ամենայն ուղղափառ հաւատով մկրտելոց իջցէ, զորս եւ յորդէգրութիւն Աստուած հայր վերակոչէ շնորհօք, որպէս զբնութեամբ որդին, եւ լինիք դուք արբանեակք եւ սպասաւորք Յոգուոյն Սրբոյ յաստուածարարութեանն շնորհ, մանաւանդ թէ՛ իբրեւ զմանկաբարձս որդւոցն Աստուծոյ ձեռօք ձեր կատարելով եւ բառնալով ի մօրէ նոցին՝ յաւազանին ծոցոյ:

Եւ մի ոք ի քահանայից յետ հաց ուտելոյ իշխեսցէ առնել մկրտութիւն առողջից մանկանց, բայց թէ յերկիւղէ մահու, այլ նախ կատարեսցէ զմկրտութեանն գործ եւ ապա մատուցէ զպատարագն սուրբ, յորմէ եւ զմկրտեալն հաղորդեցուցէ:

Եւ մի յանհաւատից արանց կամ կանանց, որք ոչ են երկրպագուք Քրիստոսի, առցէ ոք կնքահայր մանկանց մկրտելոց, զի զոր ինքեանք ոչ ունին, այլում զհա՞րոջ կարեն տալ զխոստովանութիւնն, որ ի սուրբ երրորդութիւնն, յորժամ պահանջէ քահանան ի դէմս մկրտելոյն զդաւանութիւն հաւատոյն:

Վասնորոյ, մի՛ տայք տգիտաց աշխարհականաց յաղագս մարմնական ընչասիրութեան զայս առնել. եւ թէ յանդգնին, դուք մի՛ յանձն առնուք զմկրտելն, զի մի թերի առնիցէք զայն, որ մկրտինն, ի կատարմանէ, եւ ծիծաղելիս զմեծ խորհուրդն աստուածային կացուցանէք առաջի անհաւատիցն, որ թէ հնար էր՝ եւ ոչ միում ի նոցանէ արժան էր լինել մերձ յաւազանն սուրբ ի մկրտութեանն ժամու, զի մի վասն հակառակացն ճշմարտութեան Յոգին Սուրբ հեռացի ի մկրտելոցն:

Եւ մի՛ ոք ի ձենջ ըստ հարկի պահանջեսցէ զինս արժաթոյ անգին շնորհին վասն մկրտութեանն, կամ մահու հաղորդ տալոյ, այլ որ ունին եւ տան սիրով, որպէս զնուէր եկեղեցւոյ՝ առէք, եւ որ աղքատ լինին՝ մի՛ բռնադատէք:

Ասենք եւ յաղագս զծնունդս այլազգեացն մկրտելոյ, որ սովորութեամբ բերի ի հին ժամանակաց եւ է ընդդէմ հրամանին Քրիստոսի, որպէս ասաց՝ ոչ տալ զսրբութիւն շանց, զոր արժան էր խափանել, եւ ոչ թողացուցանել, զի զի՞նչ օգուտ է այլով բերանով խոստովանել զՔրիստոս եւ զգեմուլ զնա մկրտութեամբն մինչ անբանն է եւ անզգայ, եւ յորժամ զարգանայ հասակաւ՝ մերկանալ դարձեալ ուրացութեամբն եւ լինել հայիոյիչ աստուածային խորհրդոյ տնօրէնութեան նորա, ըստ դենին իւրեանց, փոխանակ փառաբանիչ լինելոյ: Որով առաւել դատաստանաւ դատելոց են յաղագս եղծանելոյ յինքեանս զտիրական պատկերն, զոր վերստին նկարագրեաց ի նոսա աւազանն սուրբ, քան զամենեւին ոչ դրօշմեալսն, այլ զի գոյ ի նմա եւ մասն բարւոյ, այսինքն՝ զի ի մկրտելոց անտի բազմաց ի տղայական հասակին հասանէ վախճան մահու, եւ այնոքիկ ոչ ընդ կորուսեալսն, այլ ընդ փրկեալսն արժանաւորին փրկութեան, եւ զի զսակաւն զայնոսիկ յափշտակելով ի սատանայէ՝ խառնենք ի գունդն Քրիստոսի. վասն այնորիկ ոչ իրաւունս համարեցաք զամենեւին խափանելն:

Բայց զայս միայն վասն սորին իրի պատուէր տամք քահանայիցոյ, մի՛ վասն ազահութեան ախտի յորդորել զնոսին եւ կամ յօժարութեամբ ընդունել, այլ դժուարաւ եւ ի հարկէ բերիլ յայնպիսի իրս: Զի թէ հաստատուն մնալոց էին ի հաւատս, բարի էր յորդորումնն եւ յօժարութիւնն ձեր, բայց զի ապրեալքն ըստ մարմնոյ՝ անդրէն ընդ ջուրսն են անցանելոյ, եւ ի լուսակիզն յօդեաց ի սելութիւն այծից փոփոխելոց, ըստ

սրբոյ Լուսաւորչին մերոյ տեսլեան, նորին աղագաւ անօգուտ է ջանն, որ վասն նոցին, զի շահն սակաւ է եւ վնասն յոլով:

Մի՛ որք ի ձեռն գաղտ պսակ դիցէ ումեք, այլ եթէ ծնօղս ունիցի եւ միաբան իցէ եւ ոչ բաժանեալ, գիտութեամբ եւ կամաւ նոցին եղիցի: Իսկ եթէ ոչ ընդ ծնողօք՝ հասարակաց տեսութեամբ յայտնի դիցի պսակն, զի վկայեսցի յամենեցունց, թէ ուղիղ է եւ ոչ ընդդէմ օրինացն Աստուծոյ, որով եւ երգոցն ձայնք եւ նուագարանացն զնոյն նշանակեն, իբրեւ թէ վկայս պսակելոցն զամենեցունց լսելիս եւ զտեսանելիս կացուցանելով: Իսկ գաղտնին՝ անվկայ է եւ անհաստատ եւ ոչ ընդ օրինօք, յորմէ պատուէր տամք ի բաց հրաժարել եւ ոչ յանդգնել յայսպիսի իրս վասն ազահութեան:

Մի՛ եւ կնաթողաց արանց եւ այրաթողաց կանանց առանց կանոնական հրամանին դիցէ որք պսակ, զի մի՛ լուծջիք դուք ի քահանայական կարգէ ըստ կանոնաց, եւ եղեալ պսակն՝ քակտեսցի, եւ եթէ բռնանան ոչ բաժանին՝ ընդ պոռնիկս համարեալ լիցին:

Մի՛ եւ այնոցիկ, որք առեւանգս ասին, դնիցէ պսակս, զի հակառակ օրինաց Աստուծոյ է եւ բիւրք չարեաց պատճառք ի սատանայէ շարժեալք ի մոլեկան ախտսն, եւ բազումք այն իսկ են, որ յետ սուտ պսակին, յորժամ յագին դիւական տռփմամբն, մեծաւ ատելութեամբ բաժանին ի միմեանց, եւ պսակադիրքն այսպիսեացս կցորդ չարեաց նոցին լինիցին:

Մի՛ եւ տղայոց անմեղաց՝ յաղագս ազահութեան հայրենի ժառանգութեան, կամ վասն այլ ինչ պատճառի, պսակ դիցէ որք ի քահանայից, զի բազում վնասք լինին յայնցանէ եւ պատճառս բաժանման յետոյ ի միմեանց: Այլ ժամանակ պսակի է ի գարգանալ արութեան հասակին ի հնգետասանին ամաց լրումն առնն, եւ յերկոտասանին կամ եւս առաւել՝ կնոջն, որպէս զի կարօղ լինիցին ըստ բանաւորաց՝ հաճութեամբ զուգիլ ընդ միմեանս առ ի հաստատուն լինելոյ զուգութեանն, եւ մի ըստ անբանից՝ առանց կամաց եւ յօժարութեան անհաստատ գոլով եւ առ ժամոյն պատահումն: Եւ այրն աւագագոյն պարտի լինել ըստ ժամանակի քան զկինն, որպէս զԱդամ նախ ստեղծեալ Աստուծոյ եւ ապա զԵւայ:

Մի՛ որք ի քահանայից ի բռնութենէ բռնաւորաց առանց կամաց առնն եւ կնոջն պսակ դիցէ, որպէս լսենք ի կողմանս Յայաստանեայց լինել, որ ընդ իշխանութեամբ այլազգեաց են: Չի պսակն այն անհաստատ է եւ լուծանելի, եւ պսակադիրքն ոչ առանց պատժոց, թէեւ ակամայ է գործն, եւ կաշառատուրքն բռնաւորաց վասն ջատագով լինելոյ նոցին յանիրաւ գործն յայն՝ առաւել դատապարտութեան եւ անիծից են արժանի, զի զօրէնս Աստուծոյ եւ զդատաստանս եկեղեցւոյ լուծանել փութան բռնութեամբ աւագաց: Վասնորոյ, առանց խղճոյ է լուծումն այնպիսւոյ պսակին, քանզի չէ ըստ հրամանին Աստուծոյ, այլ ի մարդկային բռնութենէ:

Մի՛ որք համազգեաց, որոց արեան մերձաւորութիւն իցէ, պսակ օրինութեան դիցէ, այլ մինչեւ ի յերկուց կողմանցն զչորրորդ ազգին զլիսաւորութիւնն կատարեալ ունիցին:

Եւ թէ զի՞նչ պատճառաւ զչորեակ թիւն կանոնադրեցին հարքն սուրբք սահման ամուսնութեան՝ ծանուցուրք, զի գիտիցեք:

Քանզի բնութիւն մարմնոյ ի չորից տարերաց գոլով՝ յիրաւի եւ մարմնական ազգակցութիւնն մինչեւ ի չորրորդ թիւն ժամանէ, որ է այսպէս. ի միոյ հօրէ երկուց եղբարց բաժանեալ՝ հաւասար ունին յինքեանս զհօրն գոյացութիւնս, իսկ առ ի նոցանէ ծնունդքն՝ զկէս արեան եղբայրութեանն, եւ երրորդ ծնունդն, որ յեղբարցն որդւոց, զկիսոյն կէս արեանն միայն, իսկ չորրորդ ծնունդն, որ ի սոցանէ, զչորեակ մասն արեանն մնացելոյ: Եւ այս է սահման եւ կէս արեան մերձաւորութեան:

Եւ քանզի ամենայն փոյթ Աստուծոյ եւ աստուածայնոցն յաղագս սիրելոյ է զմիմեանս մարդկան, վասն այնորիկ իրաւունս համարեցան, որք հոգւովն օրինադրեցին, զօտարացեալսն ի միմեանց միանալ սիրով ամուսնութեանն կապակցութեամբ, իսկ զմերձաւորսն արեամբ՝ բաւական վարկան համազգակցութեամբն միայն ունել զհաղորդութիւն սիրոյ առ իրեարս:

Եւ այս է առաջին պատճառ ոչ տալոյ թոյլ համացեղիցն ամուսնութեան, եւ եւ այլք յոլովք զորս իմաստնոցն թողաք քննել:

Եւ արդ, որ այսպիսի ընտրութեամբ ըստ օրինացն Աստուծոյ լինիցի պասկն, որպէս եւ գրեցաք, մի յայլում ժամու դիցէ զայն քահանայն, բայց յառաւօտէ աւուրն մինչ ցժամ ճաշոյն. եւ կերեալ եւ արբեալ զոք մի թողուցուք յեկեղեցին, եւ մի յանառակ կանանց կամ յարանց, որ յայլում ժամու չեն արժանի եկեղեցւոյ, զի մի պղծեսցի նոքօք տաճարն Աստուծոյ եւ աղտեղասցի պասկն օրինութեան:

Եւ ի ժամ կատարելոյ զսուրբ պասկն երգ գուսանացն լռեալ դադարեսցեն մինչեւ ելցեն յեկեղեցւոյն, զի մի դիւական երգն խառնեսցի ընդ աստուածային երգոցն:

Եւ ի բուն բարեկենդանի օրէ սկսեալ մինչեւ ցկատարումն պահոց շաբաթուն, որ յետ պենտէկոստէին է, մի ոք ի քահանայից տգիտութեամբ պասկ դիցէ ումեք, եւ ոչ յամենայն կիրակէս տարւոյն, որպէս հաստատեցին կանոնաւ սուրբ հարցն առաջինք, քանզի պահոց քառասնորդացն աւուրք՝ սգոյ եւ տրտմութեան է եւ խորհուրդ չարչարանաց Տեառն եւ ոչ գինարբութեան եւ ուրախութեան հարսանեաց, իսկ յինուընքն եւ կիրակէքն ունին զօրինակ երկնաւոր փեսային Քրիստոսի հարսանեաց եւ հարսին եկեղեցւոյ, որ լինելոց է ի հանդերձեալ աշխարհին, յորժամ խառնեալ միանան ազգ արդարոց մարդկան ընդ ինն դասս հրեշտակաց, զոր եւ անուն իսկ աւուրցդ յայտ առնէ յինուընք վերակոչելով, որով եւ զհաւատացեալս ամենայն մանկունս առագաստի հարսանեաց անուանեաց Տէրն, որոց հրամայէ ոչ պահել որչափ զփեսայն ընդ ինքեանս ունիցին, որ եւ աւուրք յարութեան նորա, մինչեւ ի վերանալ նորին յերկինս. վասն այսր պատճառի ոչ պատշաճ համարեցան հարքն սուրբք ի հոգեւոր հարսանեացն օրինակի աւուրսն, յորում ասացաւ ի Տեառնէ «Ոչ արանց կանայս առնել, եւ ոչ կանայք արանց լինել» [Մատթ. ԻԲ 30], զմարմնականս զայս կատարել հարսանիս, որ է ախտաւոր եւ ծննդական:

Եւ որոց ի հարսանիսն երթիցեն քահանայք, զայս խրատ պատուիրանի աւանդեմք: Մի յապաղել անդր ընդ գինարբու աշխարհականացն մանկունս, յորում յոլովս մեղանչեն անպատրաստքն, որք դեգերինն ի նմա ի տեսանելն ի լսել եւ ի խօսել զանուղղայս, այլ յորժամ գրաւ լինիցի կերակրոյն, եւ մինչ յերիս միայն արբումն բաժակի, յառնել վաղվաղակի ի սեղանոյ անտի, զի մի ընդ գինեմոլսն յարբեցութեան ըմբռնեալ՝ այան լինիցի արտաքնոց տեսողաց, ոչ միայն ինքն, այլեւ ամենայն քահանայք՝ միովն: Եւ ծանրագոյն ասպաշխարութեամբ, թէ արդեօք քաւեսցէ զարբեցութեանն մեղս, վերստին արժանի լինել քահանայագործութեան:

Մի՛ ոք ի քահանայից զսատանայական յանցանս յինքեան ցուցցէ, այն որ հակառակ եկաց Աստուծոյ եւ կործանեցաւ, եւ ընդդիմակաց լինիցի եպիսկոպոսին իւրոյ ի բանս կամ ի գործս, որպէս Կորիս եւ Դադան՝ Սովսիսի եւ Ահարովնի, զի մի զնոցին կործանումն ընկալցի յԱստուծոյ, մանաւանդ այնոքիկ, որք յանդգնին կապալս յարուցանել ի վերայ եկեղեցւոյ, կամ աճեցուցանել զյառաջագունից եղեալսն. եւ այսու պատճառաւ արտաքսեն զեպիսկոպոսունս յաթոռոց բռնութեամբ այլազգեաց, եւ ինքեանք լինին հրամանատարք ժողովրդոց եւ կապալատուք փոխանակ նոցա, որք անձամբ զանձինս ի ներքոյ առնեն աններելի դատաստանացն Աստուծոյ եւ անիծից դատապարտութեան. այնպիսիքն ոչ են արժանի ի կեանս իւրեանց

քահանայագործութիւն առնելոյ, եւ ոչ ի մահուն՝ հաղորդի կամ քահանայական թաղման:

Դարձեալ՝ մի՛ ոք ի քահանայից կամ ի ժողովրդոց զեկեղեցւոյ դատաստան առ մարմնական իշխանս դատեսցի, կամ՝ առ այլազգիս, կամ՝ առ քրիստոնեայս, զի մի՛ դատապարտեսցի յառաքելական եւ ի կանոնական հրամանացն. որպէս եւ գրէ Պօղոս առ կորնթացիսն, թէ՛ «Իշխե՛ ոք ի ձէնջ, եթէ իրք ինչ իցեն ընդ ընկերի իւրում դատել առաջի անիրաւաց եւ ոչ առաջի սրբոց» [Ա Կոր. Զ 1]. եւ հարքն սուրբք ի կանոնս իւրեանց լուծանել հրամայեն ի քահանայութենէ, որ զայս առնէ:

Դարձեալ՝ մի՛ ոք ի քահանայից հոգաբարձու քաղաքի կամ գեղջ լինիցի, կամ գաւառապետ՝ աշխարհական իշխանաց, կամ գրօղ հարկաց կամ սակից, կամ յայլ ինչ գործակալութիւն աշխարհի լինելով, քանզի անկարելի է ըստ տէրունական հրամանին՝ երկուց հակառակ տերանց ծառայել եւ հաճոյանալ տան Աստուծոյ, որ է եկեղեցի Աստուծոյ կենդանւոյ եւ տան աշխարհականաց: Վասնորոյ ընտրեսցէ այնպիսին ի միոյն ի բաց կալ, կամ ի յաշխարհական հոգաբարձութենէն կամ ի քահանայական գործոյն, իսկ եթէ ընդ աշխարհական հոգոցն յանդգնի եւ զքահանայական պատիւն ունել եւ զտեսութիւն ժողովրդոց, բռնութեամբ է այն եւ ոչ հրամանաւն Աստուծոյ եւ մեր, որ եւ դատելոց է այնպիսին ընդ կրկին յանդգնութեանն:

Լսենք զոմանց քահանայից ձիավարժս լինել եւ զէնս առնուլ ըստ զինուորաց, եւ ի խրախճանութիւնս խաղուց ձիւնթացից ընդ նոսին արշաւել երիվարօք եւ ի յորս երէոց եւ ի նետածգութիւնս եւ յամենայն ինչ յայսպիսիս, որ նոցայն գործոյ է անկ եւ ոչ եկեղեցւոյ սպասաւորաց, «Ձի զէն զինուորութեան մերոյ ոչ է մարմնաւոր» [Ա Կոր. Ժ 4], որպէս հրամայէ առաքելալն, այլ հոգեվոր եւ աստուածային, որովք պատերազմիմք ոչ ընդ մարմնոյ եւ ընդ արեան, այլ ընդ իշխանութիւնս եւ ընդ պետութիւնս, ընդ այսս չարութեան, որ ի ներքոյ երկնից:

Վասնորոյ, աղաչենք ի բաց լինել յայսմիտէ ի յանկարգ սովորութենէ աստի, եւ բայց թէ ի ճանապարհի, եթէ ի հետիոտս եւ թէ երիվարաւ՝ առնուլ զէնս յաղագս երկիւղի ինչ եղելոյ կարծեաց, եւ այն՝ պարկեշտութեամբ եւ ոչ ըստ զինուորութեան կարգի կապարճիւք եւ կամ կազմեալ սուսերաւ: Այլ ոչ եւս է արժան առնուլ զէնս կարգաւորաց, կամ արշաւանս առնել երիվարօք ըստ մանկական բարոյից ի բամբասանաց պատճառս տեսողաց: Ձի զորս խրատէ Պօղոս, «Ձգէն լուսոյ զգեմուլ» [Րոմ. ԺԳ 12], այսինքն՝ զուղիղ հաւատս եւ զգործս բարեաց, եւ նոքօք կռուել ընդ բնութեան մերոյ թշնամւոյն. չէ արժան զխաւարայինս զայս զէն ստանալ յանձին եւ պատերազմել սոքօք ընդ համազգեաց մերոց մարդկան, կամ խոցոտել զանբանից կենդանեաց հոյլս եւ կամ սիգաքայլ երիվարօք յօրանալ, բայց թէ ի տկարութենէ, քանզի յայսցանէ եւ ի սոյնպիսեացն արգելուն զմեզ աստուածային պատուիրանքն:

Քահանայ, եթէ զոք ի ժողովրդենէ իւրմէ վասն պատուիրանագանց լինելոյ ընդ բանիւ առնիցէ, եւ նորա յամառեալ մնայ ի յանցանսն եւ ոչ դառնայ, այլ ոք ի քահանայից անտի մի իշխեսցէ ընդունել զնա յեկեղեցի իւր, որպէս սովոր են ոմանք ի տգէտ քահանայից յինքեանս ձգել զայնպիսիսն, եւ որ զայս առնէ, նա տայ նմա ի մեղաց անտի անդարձ լինել, եւ զանձն իւր կցորդ պատուհասի յանցանաց նորա առնիցէ:

Այլ վասն այսպիսի իրաց եղելոց այս օրէնք հաստատեսցի ի միջի ձերում, զի զորոշեալն ի միոյ քահանայէ, եւ ամենայն քահանայակիցք նորին նմանապէս ի որոշեսցեն յինքեանց, մինչեւ զղջացեալ յանցաւորն դարձցի ի յանուղայ գնացից իւրոց ի առաջի անկեալ խնդրեսցէ զթողութիւն եւ ուխտ դիցէ Աստուծոյ՝ ապաշխարել եւ այլ ոչ եւս ի նոյն սովորութիւն չարեաց անկանել: Եւ յորժամ յիւրոյ քահանայէն

այսպիսի օրինակաւ ընկալցի գթողութիւն, յայնժամ եւ այլ քահանայքն ընկալցին զնա սիրովն Աստուծոյ:

Այս օրէնք ուղղութեան եւ ի մէջ եպիսկոպոսաց հաստատեսցի, որպէս զի զամ միոյ եպիսկոպոսէն բանադրեալն՝ ի քահանայից կամ յաշխարհականաց, այլ ոք յեպիսկոպոսաց ոչ ունին իշխանութիւն լուծանելոյ, բայց ի բանադրողէ անտի:

Աւանդենք եւ զայս եւս պատուիրան ամուրեաց քահանայիցդ, որ ըստ աշխարհի, զի որում ի մանկական հասակին հասանէ վախճան ամուսնոյն, թէ կամեսցի զոգի իւր ապրեցուցանել ի մեղաց եւ ի բամբասանաց եւ սուրբ խորհրդոյն արժանաւորապէս սպասաւորել, հրաժարեալ յաշխարհէ՝ ըստ կանոնական հրամանին եւ կարգ կրօնաւորութեան մտցէ, զի ի մէջ աշխարհի սովորական ընդելութեամբ լինելով ի տեսութիւնս եւ ի խօսակցութիւնս ընդ կանայս, մանաւանդ՝ խոստովանութեան նոցին լինել ընդունօղ ըստ օրինի քահանայութեան, անհնար է սրբութեամբ ծառայել Աստուծոյ. ապա թէ ընդ անձուկ ճանապարհն զնալ դժուարանայ՝ զլայնն եւ զարձակն սիրելով, լռել արժան է նմա ի սրբոյ պատարագին սպասաւորութենէ, թէեւ ի յայտնի վատութիւնս ոչ բամբասի, քանզի ոչ կարէ յերիտասարդական հասակին մաքրապէս սպասաւորել սրբութեանցն, մանաւանդ որ ոչ երկիւղածութեամբ եւ պարկէշտութեամբ եւ պահօք եւ աղօթիւք զգուշանայ անձին իւրում, այլ աներկիւղութեամբ վարի ի կերակուրս եւ յըմպելիս եւ յամենայն տեսակս ընդարձակ վարուց:

Իսկ որոյ մերձ ի ծերութիւն հասանէ վախճան ամուսնոյն, եւ վստահ լինի յանձն իւր սրբութեամբ եւ անարատ վարուք եւ առանց բամբասանաց սպասաւորել Աստուծոյ, որպէս զի զովութիւնս ընկալցի ի տեսողաց եւ մի բամբասանս. այնպիսին կացցէ յեկեղեցուջ իւրում որքան ախորժէ:

Եւ արդ քահանայիցդ առ ի խրատ՝ զոր գրեցաք սակաւուք, ոչ իշխանաբար հրաման տալով, այլ ծառայակցապէս աղաչելով, բաւական լիցի առ ի մէնջ. իսկ զպակասեալն ի մերոցս՝ ունիք հմտանալ կատարելապէս ի հարցն առաջնոց կանոնական գրոց՝ որովք օրինադրեցին զմանկունս եկեղեցույ ի փառս աստուծոյ:

ԱՌ ԻՇԽԱՆՍ ՈՐ ԸՍՏ ԱՇԽԱՐԻԻ

Փոփոխեսցուք զաստուածային պատուիրանացն խրատ եւ առ ձեզ՝ որ ըստ աշխարհի ունիք զքաղաքավարութիւն:

Եւ նախ եւ առաջին առ իշխանսդ, որք ի նուաղեալ ժամանակիս տիրէք ի տեղիս տեղիս բազմաց եւ կամ սակաւուց, զօրաց եւ գաւառաց, զորս աղաչեն, մի անհնազանդ լինիք օրինացն Աստուծոյ, այլ որպէս կամիք, զի ծառայք զկանս հրամանի ձերոյ հնազանդութեամբ եւ անթերի կատարեսցեն, որք թէ եւ զմի ինչ ի հրամայելոցն անկատար թողուն, պատուհաս կրեն ի ձէնջ, նոյնպէս եւ դուք, վասն զի բնութեամբ ծառայք էք Աստուծոյ, ծառայեցէք Տեառն երկիւղի եւ հնազանդութեամբ, զի մի պատուհասիցիք իբրեւ զապստամբեալս ի Տեառն այլ որպէս զմտերիմ ծառայս՝ պատիւ ընդունիցիք յերկնաւոր թագաւորէն:

Եւ արդ՝ առաջին զայս պատուիրան աւանդենք ձեզ, մի անհրաւաբար վարիք առ հնազանդեալսդ ծանր եւ դժուարակիր հարկադրութեամբ, զոր ոչ կարեն բառնալ, այլ օրինօք դատեցէք եւ ըստ չափոյ զօրութեան զիրաքանչիւր ոք, զմտաւ ածէք՝ «Ձի եւ ձեր տէր գոյ յերկինս, եւ ակնառութիւն ոչ է առաջի նորա» [Եփես. 2 9], որպէս եւ առաքեալ ասէ:

Մի՛ գոք զրկէք ի մարդկանէ եւ մի՛ նեղէք զաղքատս եւ զտնանկս, զի մի բողոքեսցեն առաջի Աստուծոյ վասն ձեր, եւ Աստուած լսէ նոցա՝ ըստ իմաստնոյն Սաղմոնի, զի ասէ, թէ՛ «Մի տար պատճառս աղքատին անիծանել զքեզ, զի մի՛ արարիչ նորա լուիցէ նմա եւ հատուցէ քեզ չարիս» [Առակ. Լ 19]:

Մի՛ չար եւ անիրաւ գործակալս եւ գաւառապետս կացուցանէք ի վերայ աշխարհի ձերոյ, զի մի յանիրաւութենէ նոցա, զոր գործեն, դուք դատիք յԱստուծոյ՝ հանդերձ նոքօք, այլ զարդարամիտս եւ զարդարադատս ընտրեցէք ունել ի վերայ մարդկան զգործակալութիւն, զի մի զարքունական սահմանեալ իրաւունսն՝ վաստակաւորացն թողցեն վասն սակաւ կաշառացն զբազումն եւ կամ ինքեանք գողասցին. եւ մի՛ առաւել քան զիրամայեալսն նեղեսցեն զնոսա եւ առցեն, զի անիրաւութիւն են երկու կողմանքն առաջի Աստուծոյ. այլ այնպէս իրաւադատ լինիցին, զի «Տացեն զկայսերն՝ կայսեր, եւ զԱստուծոյն՝ Աստուծոյ» [Մատթ. ԻԲ 21]:

Մի՛ գոք անիրաւութեամբ դատիք, այլ ուղիղ դատաստան արարէք, զի եւ ձերն դատաստան քաղցրութեամբ լինիցի յԱստուծոյ եւ մի խստութեամբ: Մի՛ վասն կաշառաց կամ վասն սիրելութեան միոյ կողմանն, կամ վասն ատելութեան եւ ոխակալութեան, կամ վասն պատուոյ երեսաց ի միոյն աչառելով՝ զանիրաւն արդարացուցանէք ի դատաստան եւ զարդարոյն թիւրէք զիրաւունս, զի մի անիծից օրինացն Աստուծոյ, որ յաղագս այսոցիկ, պարտականս զանձինս առնիցէք:

Մի՛ անտես առնէք զայրւոյն եւ զաղքատին զիրաւունսն, յորժամ աղաղակեն առաջի ձեր վասն զրկողաց իւրեանց, այլ դատ արարէք որբոյն եւ տուք իրաւունս այրւոյն, որպէս ասէ Աստուած մարգարէին. եւ ունկնդիր լերուք աղաղակի նոցա եւ փրկեցէք զնոսա ի նեղչաց իւրեանց եւ զյափշտակեալ ինչս նոցա դարձուցէք յանիրաւացն, յայնժամ եւ Աստուած լսօղ լինի աղաչանաց ձերոց եւ կատարէ զխնդրուածս սրտից ձերոց:

Մի որպէս զանբան կենդանիս, որ բնութեամբ ծառայք են մարդկան, ծառայեցուցանէք զմարդիկ, որ ընդ իշխանութեամբ ձերով լինին, ի գործ խիստ եւ աններելի, որպէս եւ փարաւօն՝ զորդիսն Իսրայէլի, եւ զայն՝ առանց կերակուր տալոյ նոցին, այլ ներելով եւ քաղցրութեամբ եւ սակաւօրեայ ժամանակաւ, եւ առատագոյն կերակրօք լցուցանել զնոսա յաշխատութիւն անդր, եւ չափով եւ մի յանչափս, որպէս զի կարօղ լինիցին վաստակօք իւրեանց զաղքատանաց կեանս զտանց եւ զորդւոց իւրեանց լցուցանել եւ զարքունական հարկսն հատուցանել:

Մի զվարձս վաստակաւորաց ձերոց հատանէք իշխանաբար, որպէս զայնոցիկ, զորոց ամբաստանեն առաքեալքն եւ մարգարէքն, թէ՛ «Ձրկեալն ի ձէնջ աղաղակէ, եւ բողոք հնձողաց եհաս յականջս տեառն զօրութեանց» [Յակ. Ե 4]:

Բաւական լիցի ձեզ, զի վաստակօք նոցա մեծանայք, եւ առաւել քան զչափն փափկանայք, եւ այն՝ զի ոչ թէ այլ բնութիւն է նոցա, եւ այլ՝ ձեր. այլ ի միոյ կաւոյ եւ ի խառնուածոյ, քանզի նմանապէս է տերանց եւ ծառայից, փարթամաց եւ աղքատաց, սկիզբն գալոյ յաշխարհ եւ կատարած ելիցն յաշխարհէ:

Վասն զի զուգահաւասար ամենայնքն ծննդեամբ մտանեն յերկիր եւ մահուամբ ելանեն ի սմանէ, իսկ մեծութիւն եւ փոքրկութիւն, բարձրութիւն եւ խոնարհութիւն, բարեբախտութիւն եւ պանդխտութիւն, ի մէջ ծննդեանն եւ մահուանն պատահեն մարդկան, որ են իբրեւ զերագք զարթուցելոց, որպէս ի փորձոյ անտի յայտնի է ամենեցուն իմաստնոց եւ տգիտաց, զի ոչ ինչ ի սոցանէ ունի զհաստատութիւն:

Վասնորոյ մի՛ վասն անցաւորիս կենաց կորուսանէք գյաւիտենական զկեանսն, զի թէպէտ եւ Քրիստոս դժուարաւ ասաց մեծատանց յարքայութիւն երկնից մտանել, ըստ օրինակի ուղտու ընդ ծակ ասղան, այլ եթէ զմեծութիւն ձեր ըստ կամացն Աստուծոյ ի գործ արկանէք, դժուարինն՝ ձեզ դիւրին լինիցի:

Ձի եւ Աբրահամ մեծատուն էր, եւ ոչ միայն արքայութեանն մտանելոյ արժանացաւ, այլեւ գոգ նորա արքայութիւն Աստուծոյ եղել եւ անուանեցաւ հանգիստ ամենայն արդարոց. նոյնպէս եւ Յոբ եւ ամենայն մեծատուն արդարքն, ըստ ասելոյն ի Տեառնէ, թէ՛ «Տեսանիցէք զԱբրահամ եւ զԻսահակ եւ զՅակոբ եւ զամենայն արդարսն յարքայութեան Աստուծոյ» [Դուկ. ԺԳ 28]:

Այսպէս եւ՝ դուք, եթէ ըստ նոցին օրինակի գնայք ի ճանապարհս արդարութեան, զի ոչ զոք նեղէին, ոչ զուրուք զինչս յափշտակէին, եւ ոչ ունէք անիրաւութիւն ինչ առնէին եւ կամ նենգութիւն, այլեւ յիրեանց արդար վաստակոցն զքաղցեալս կերակրէին, զմերկս զգեցուցանէին, զհիւրս ընդունէին, զկարօտութիւն կարօտելոց լցուցանէին, նեղելոց բաւական լինէին եւ տկարաց զօրացուցիչ, զաղքատն եւ զտնանկն ոչ միայն ինքեանք ոչ նեղէին, այլեւ փրկէին ի նեղչաց իւրեանց:

Եւ որպէս ոչ եղել նոցա մարմնաւոր փարթամութիւնն արգել եւ խափան ժառանգելոյ զարքայութիւնն երկնից, նոյնպէս եւ ոչ ձեզ լինիցի պատճառ չարեաց մեծութիւնդ, եթէ կամիցիք արդարութեամբ վարել զդա, որպէս եւ նոքա, այլ մանաւանդ բարւոյ առիթ լինի ըստ իմաստնոյն, զի ասէ, թէ՛ «Փրկանք առն մեծութիւն իւր» [Առակ. ԺԳ 8]:

Իսկ այն, որ փոխանակ զիւրն տալոյ կարօտելոց զնոցայն յափշտակէ, եւ կողոպտէ զնոսա, եւ փոխանակ հիւրընկալ լինելոյ եւ հանգուցիչ՝ աշխատելոց ի ճանապարհի, գողակից լինի գողոց դարանակալ ի ճանապարհի այնոցիկ, որք անմեղութեամբ գնան ընդ ուղիղ ճանապարհս իւրեանց, եւ զտուն իւր յանիրաւ ստացուածոց անտի լնու եւ մեծանալ կարծէ:

Թողից ասել զանթողլին յանցանք, որք ոչ միայն զինչսն յափշտակեն, այլեւ զարիւն անմեղացն հեղուն, զի մի դատախագ լինիցին յափշտակողաց ընչից իւրեանց, եւ զայն ոչ ածեն զմտաւ եթէ այլ դատաւոր կայ գիտօղ ամենայնի, յորմէ ոչ կարեն թաքուցանել զգաղտնիս չարեաց իւրեանց:

Յաղագս այսպիսեաց մեծատանց յիրաւի հրամայէ Քրիստոս՝ դժուարաւ մտանել յարքայութիւն երկնից, որոց ոչ արքայութիւնն է օթեւան, այլ հուր գեհեմին, եւ ասպնջական որդն անքուն եւ տարտարոսն յաւիտենական:

Եւ այս յիրաւի, զի թէ որք յիրեանց արդար ընչիցն ոչ կերակրեն զքաղցեալս եւ ոչ զգեցուցանեն զմերկս եւ ոչ ժողովեն զօտարս, լսելոց են ի Քրիստոսէ յաւուր դատաստանին, եթէ «Երթայք յինէն անիծեալք ի հուրն յաւիտենից» [Մատթ. ԻԵ 41]. ապա, որք աղքատին առաւել քաղցի լինին պատճառ եւ տառապելոյ մերկութեան եւ օտարին՝ կորստեան ընչիցն եւ անձին, եւ փոխանակ զբանդարկեալսն տեսանելոյ եւ մխիթարելոյ բանիւ եւ արդեամբք՝ արծակելոց անմեղաց բանդից եւ կապանաց լինին առիթ, ո՞ր արդեօք իմանի տեղի եւ չափ տանջանաց այնպիսեացն, եթէ ոչ ընդ սատանայի եւ հրեշտակաց նորա, զորոց եւ զկամսն կատարեցին:

Վասնորոյ, աղաչեմ, ի բաց լինել ամենեցուն ձեզ ի կորստական գործոցս յայսցանէ, եւ մի ոք պատճառեսցէ զպատճառս մեղաց ասելով՝ զի եթէ ոչ զրկենք եւ ոչ յափշտակենք, զիշխանութիւն մեր ոչ կարենք հաստատուն ունել:

Եւ առ այս՝ առաջին զայս ասեմք, զի թէ անկարելի էր որոց զիշխանութիւնս ունին՝ հաճոյ լինել Աստուծոյ, ապա զիա՞րդ բազումք ի թագաւորաց եւ յիշխանաց գովելիք եղեն Աստուծոյ եւ մարդկան, որք եւ յիշատակին ի գիրս սուրբս:

Դարձեալ, թէ եւ անհնարելի էր, ըստ ասելոյ ձեր՝ առանց զրկանաց իշխանութիւն վարել, ապա որ իմաստունն է՝ փախչել արժան էր յանցաւոր իշխանութենէն, եւ ոչ վասն այնորիկ անանց տանջանօք ընդ սատանայի տանջիլ: Բայց ոչ է անհնարին առանց անիրաւութեան վարել զիշխանութիւնն, այլ դիւրին եւ հեշտալի է, որք սիրեն եւ կամին. եւ մեք վկայեմք առաջի Աստուծոյ եւ երաշխաւոր լինիմք ամենեցուն: Չի եթէ որ զտուն իւր մաքրեսցէ ի զրկանաց եւ զիրաւամբք ստացուածս միայն ժողովեսցէ անդ, թէ եւ սակաւ թուի թէ իցէ, առաւել շահեկան լինիցի եւ պատճառ հարստութեան, քան զբազումս անիրաւաբար ստացեալս: Եւ զայս իմաստունն Սողոմոն յայտ արարեալ ասէ, թէ «Անէծք Տեառն ի տունս ամբարշտաց, յարկք արդարոց օրհնին» [Առակ. Գ 33], քանզի սակաւ ինչ անիրաւն զբազում իրաւամբք ստացեալսն՝ նման հրոյ կիզէ եւ ապականէ, զի անիծիւք եւ դառնութեամբ է ժողովումն անիրաւն ի զրկելոց անտի, եւ ընդ աղքատացն անիծից եւ Աստուծոյ անէծքն մտանեն ի տունս զրկողացն, իսկ տուն արդարոյն, զի սուրբ է ի զրկանաց եւ կերակրիչ է քաղցելոց, ընդ օրհնութիւնս աղքատացն եւ Աստուծոյ օրհնութիւնն մտեալ ի ծածուկ եւ անյայտ՝ զսակաւն բազմացուցանէ, որպէս զՍարեփթացի այրւոյն եւ զՍոմնացւոյն եւ զորս տէրն կերակրեաց յանապատին:

Եւ մի որ յանմտաց եւ ի մարմնասիրաց զբազում ինչս տեսանելով զրկողաց եւ ամբարշտաց եւ զսակաւս որոց իրաւամբք ստանան, այպանիցէ զաբնիւք մերովք, այլ լուիցէ այնպիսին աստուածահօր մարգարէին Դաւթի՝ զի ասէ. «Լաւ է սակաւիկ ինչ արդարոյն, քան զբազում մեծութիւն մեղաւորաց» [Սաղմ. ԼԶ 16]. նոյնպէս եւ որդւոյ նորին Սաղոմոնի, արդարոյն ասէ՝ «Ամենայն աշխարհ լի է ընչիւք, իսկ ամբարշտին եւ ոչ դանգ մի» [Առակ. ԺԷ 4]. եւ դարձեալ՝ լաւ է ասէ՝ «Բանջարօք կերակրիլ հանդերձ արդարութեամբ, քան մեծամեծ զենլեօք անիրաւութեամբ» [Առակ. ԺԷ 17]: Եւ յիրաւի է այս, զի որք յիրաւացի եւ յարդար ընչից իւրեանց կերակրին, ոչ ինչ կրեն պատիժն յԱստուծոյ, իսկ այնք, որ ի զրկանաց կամ ի գողութենէ եւ ի յափշտակութենէ լնուն զսեղանս իւրեանց, զամենայն, զոր առատապէս վայելեն յայլոց իրաց, տոկոսեօք ունին հատուցանել ի դատաստանին աւուր:

Մի եւ զպահս հաւատոյ լուծանէք ի ձուկն եւ ի գինի իշխանաբար, զի մի ընդ անժուժկալսն դատիցիք:

Դարձեալ եւ զայս ասեմք, զի ստութիւն եւ խաբէութիւնն, զոր Քրիստոս հրամայեաց, թէ ի չարէն է՝ ի սատանայէ, թէպէտ եւ ամենայն մարդոյ վնասակար է, բայց առաւել մեծամեծաց եւ իշխանաց, զի փոքրն, վասն զի անզօր է, ջանայ ստութեամբն զբան իւր հաստատել եւ հաւատալի առնել, իսկ մեծն, քանզի ի ձեռս իւր է առնելն, զոր կամիցի, իշխանաբար, յորժամ զիրաւունսն արհամարհիցէ:

Դարձեալ՝ ռամիկ մարդոյ, եթէ ստութիւն ինչ խօսի եւ թէ այլ ինչ վատթար իրս գործէ, ոչ լինի այնքան յայտնի, եւ ոչ հրապարականախատ լինիցի, իսկ զմեծին եւ զփոքր մի սխալանքն ի հայիոյութիւն եւ ի թշնամանս բարձրացուցանեն մերձաւորք եւ հեռաւորք, այլեւ սիրողքն չարի՝ օրինակ չարութեան առնուն զառ ի մեծամեծաց եղեալ պատուիրանագանցութիւնս ինչ:

Վասնորոյ, աղաչեն, մի եղիցի առ ձեզ բան խաբէութեան եւ ստութեան, մի առ ձեր հնազանդեալսն եւ մի առ արտաքինսն, այլ որոց խոստանայք բանիւ զբարիս, զնոյն եւ զործով կատարեցէք, զի այն է հաճոյ առաջի Աստուծոյ եւ մարդկան եւ գովութեան պատճառ ձեզ յամենայն բերանոյ:

Նաեւ զգիճնուորաց ձերոց եւ զամենեցուն, որք ծառայենն ձեզ, զսահմանեալ հռոզսն մի պակասեցուցանէք, զի զրկանք մեծ է այն եւ անիրաւութիւն. քանզի որպէս նոքա պարտական են վասն պարգեւացն, որ ի ձէնջ, զարիւնս իւրեանց հեղուլ վասն ձեր, նոյնպէս եւ դուք պարտիք զխոստացեալ թոշակսն նոցին հատուցանել անթերի:

Եւ մի ինչ բռնութեամբ առաւել, քան զչափն, գնայք առ նոսա, զի մի յերկիւղէ կողոպտելոյ եւ բանդ եւ պատուհաս կրելոյ ի ձէնջ անիրաւաբար՝ գաղտնի փախչին եւ ուրացողք լինին երդմանցն, որ առ ձեզ, եւ երկու կողմանցդ լինիցին մեղք՝ նոցա եւ ձեզ: Այլ եթէ հաւանիք խորհրդակցութեան մերոյ եւ խրատու, զայս սահման դիք ամենեցուն, որք ծառայենն ձեզ, զի որչափ կամք լինին մարդոյ կալ ի ծառայութեան ձերում՝ հաւատարմութեամբ ծառայեսցեն ձեզ եւ առանց նենգութեան, եւ որ ոք յօժարի ելանել ի ծառայութենէ ձերմէ, յայտնի հրաման խնդրեսցէ ի ձէնջ առանց երկեղի, եւ դուք մի սաստիւ եւ բռնութեամբ լինիք արգելօղ, բայց եթէ սիրով եւ իւրով կամաւ: Չայն, որ ոչ կամիք դուք գնալ ի ձէնջ, եւ այլոցն՝ քաղցրութեամբ տուք հրաման, եւ եթէ ինչ պարտից էք՝ հատուցէք նոցա: Եւ յորժամ այսպիսի իրաւունք տեսանեն ի ձէնջ լեալ, կամ ոչ գնան բնաւ, եւ կամ թէ գնան՝ փութով դարձեալ առ ձեզ դառնան եւ ազատէք զնոսա եւ զձեզ ի խղճէ երդմնագանցութեանն, եւ լինի այն մեծ վարձուց պատճառ ձեզ յԱստուծոյ:

Դարձեալ, մի՛ եղիցի ձեզ յօժարութեամբ դիմել երդմունս յանուն Աստուծոյ եւ յաւետարանն սուրբ եւ ի խաչ՝ առանց մեծագոյն հարկի, քանզի Քրիստոս հրամայէ յաւետարանին, ուր երդուննն լինի, թէ՛ «Ամենեւին մի երդնուցուս ոչ միայն յարարիչն, այլեւ ոչ յարարծս, ոչ յերկինս եւ ոչ ի յերկիր եւ ոչ ի գլուխ քո» [Մատթ. Ե 34], այլ այնպէս ցուցէք ամենեցուն զձեզ ճշմարտախօս լինել, մինչ զի լոկ բանից ձերոց, որպէս երդման, հաւատասցեն մարդիկ: Իսկ եթէ ծանրագոյն ինչ հարկ լինիցի երդնոյ, մի ոք մեղիցէ զանթողլի յանցանսն՝ ուրանալով զերդմունսն եւ երդմնագանց լինելով, զի առաւել չար է ուրացութիւնն, որ յերդմունսն է, քան զայն, որ յերկիւղէ մահու առաջի անհաւատից ուրանան, քանզի այն է բռնութենէ եւ յերկիւղէ տանջանաց եւ մահու, եւ այս՝ կամաւորութեամբ եւ վասն սակաւ ինչ կորստական շահի, եւ է զանագանութիւն սոցա, որպէս կամաւ մեղքն եւ ակամայ:

Եւ ոչ միայն առ հաւատակից քրիստոնէայս պարտ է առանց ստութեան պահել զերդմունսն, այլեւ առ այլազգիս, եւ մանաւանդ առ նոսա առաւել, զի մի անուանն Աստուծոյ եւ հաւատոյս քրիստոնէութեան պատճառ լինիք հայիոյելոյ ի նոցանէ. զի թէ կռապաշտ թագաւորին Նաբուգոդոնոսորայ՝ երդմնագանց լինելով հրէիցն, մատնեաց Աստուած զքաղաքն եւ զազգն ի ձեռս նորա, քանի եւս ի նորում պատուհասէ Աստուած զայնոսիկ, որք ատեն եւ ուրանան զերդմունսն, որ առ նոսա:

Եւ մի՛ ոք զայն առաջի դիցէ, եթէ վասն զի նոքա ստեն երդմանցն, որ առ մեզ, պարտ է զի եւ մեք առ նոսա զնոյնս արասցուք, այլ չէ մերս երդունն եւ նոցայն հաւասար զի մերս առ ճշմարտութիւնն է, եւ նոցայն ոչ նոյնպիսի: Վասնորոյ եւ մեք որպէս զծառայս գիտօղ կամաց տեսնն իւրոյ եւ ոչ արարօղ՝ բազում ըմպենք գանս, եւ նոքա որպէս զտգէտս՝ սակաւս:

Դարձեալ աղաչենք, մի՛ առ բարկութիւն շարժելով եւ ոչ ուղղադատ իրաւամբք, կամ խրատ ինչ առնէք մարդոյ կամ մահու վճիռ տայցէք, քանզի նոր օրէնքս ոչ հրամայեն զայսոսիկ, եւ հին օրէնքն թէպէտ եւ հրամայեն, բայց ոչ վայրապար, այլ ըստ յանցանացն արժանաւորութեան զիրաքանչիւրսն դատել ի խրատ եւ ի մահ:

Վասնորոյ եւ դուք, որ յիշխանութեանդ էք, թէպէտ եւ զնոր օրէնքս անկարելի ասէք պահել, զիին օրինացն հրամանս, որ վասն այսպիսի իրաց է, կատարեցէք: Իսկ եթէ առանց օրինաց դատիք զմարդիկ անիրաւաբար ի սպանումն եւ ի խրատ, գիտասաջիք

հաստատուն, զի խնդրելոց է ի ձեռն Աստուած յաւուրն դատաստանի զարիւն սպանելոցն եւ զհատեալ անդամս խրատելոցն:

Նաեւ զայս եւս պատուիրան աւանդենք ձեզ, մի՛ լինիք վրիժառուք եւ քինախնդիրք, որով զիշխանսն Իսրայէլի նախատէ մարգարէն Եսայիաս, այլ ըստ հրամանին Քրիստոսի ներօղ եւ երկայնամիտ լերուք առ ամենեսեան՝ որ մեղուցեալ իցեն ձեզ, զի եւ դուք ընկալջիք առ ի նմանէ զքաղցրութիւն եւ զբարերարութիւն, ըստ ասելոյն, թէ՛ «Մի՛ դատիք եւ ոչ դատիցիք, մի պատժէք, եւ ոչ պատժիցիք» [Ղուկ. 2 37], զի որով չափով չափէք, չափեսցի ձեզ:

ԱՌ ԶԻՆՈՒՐԱՑ ԴԱՍՍ

Խօսիմք ըստ կարգի եւ առ դասս զինուորացոյ, որ ընդ ձեռամբ էք իշխանութեանց եւ պետութեանց:

Եւ նախ եւ առաջին՝ զառաքելականն առ ձեզ բարբառիմք բան, որ պատուիրէ ձեզ հնազանդ լինել տերանց ձերոց՝ յամենայնի. «Մի՛ առ ականէ ծառայել որպէս մարդահաճոյք, այլ միամտութեամբ սրտիւ որպէս Աստուծոյ» [Եփես. 2 6]: Զի եւ այնմ ասէ, Տէր է հատուցանօղ, այսինքն թէ՛ որ հաւատարմութեամբ ծառայէ այնմ՝ ընդ որոյ իշխանութեամբ անկեալն է, թէեւ ի նմանէ պակասութիւն ինչ լինիցի ինքեան, մի ասէ տրտմեսցի, զի Աստուած է որ հատուցանէ նմա փոխարէնս բարեաց՝ ըստ ուղիղ վաստակոց իւրոց:

Իսկ որ նենգաւոր գտանիցի բանիւ կամ գործով, կամ անձին տեսառն իւրոյ, կամ տեղւոյ անրականի նորա, կամ ընչից նորին, Աստուծոյ է այն նենգութիւն եւ ոչ մարդոյ. եւ յԱստուծոյ ընդունելոյ է զվրէժ հատուցման չարեաց իւրոց, որ եւ ի հաւատոյն որոշեալ է այնպիսին եւ չար քան զանհաւատսն է, քանզի նոքա թէպէտ եւ ի ճշմարիտ հաւատոյ եւ յօրինաց Աստուծոյ մոլորեալք են, բայց զհնազանդութիւն տերանց իւրեանց եւ զմտերմութիւն հաստատուն բերեն յանձինս:

Եւ զի՞նչ ասենք առ քրիստոնեայ իշխանս՝ ունել միամտութիւն եւ սէր, յայտնի եւ ծածուկ. այլ թէեւ ի քրիստոնէից ոք ընդ այլազգւոյ է իշխանութեամբ եւ ի նորին պարգեւաց կերակրի եւ զգենու, զնոյն հաւատարմութիւն պարտ է ցուցանել նմա եւ զառանց նենգութեան ծառայութիւն: Զի եւ յորժամ գրէր զայսոսիկ առաքեալն Պօղոս, թէ՛ «Ծառայք՝ հնազանդ լերուք տերանց ձերոց» [Կող. 4 22], ոչ եթէ քրիստոնեայք էին տեարք ծառայիցն, այլ կռապաշտք: Բայց այսու յայտնի կամեցաւ ցուցանել հեթանոսացն զճշմարիտ օրէնս քրիստոնէից, եթէ ատելի է օրինաց մերոց նենգութիւն տերանց եւ սիրելի է հաւատարմութիւնն, զի մի՛ բանս հայիոյութեան յօրէնս եւ ի հաւատս մեր խօսեսցին, յորժամ ի քրիստոնէից զոք տեսցեն նենգաւորս գտեալ առ նոսա:

Եւ եթէ կարգիցիք ի տերանց ձերոց ի գործ վերակացութեան, կամ առաքիցիք ի տնօրէնութիւն ինչ բանի, արդարութեամբ եւ իրաւամբք առ զհնազանդեալսն վարեցարուք, մի՛ զոք նեղելով անողորմաբար արտաքոյ իրաւանց եւ մի՛ զոք զրպարտելով անկարեկից բնութեամբ՝ ցուցանելով զձեզ առ նոսա օրինօք դահճաց, եւ մի՛ առաւել քան զհրամայեալն ձեզ առնիցէք ըստ սրբոյ Մկրտչին խրատու, այլ թոշակօքն ձեր բաւականասցիք եւ ողորմութեամբ եւ սիրով զնացէք առ ամենայնսն, զի եւ դուք ողորմութիւն գտանիցէք յԱստուծոյ. եւ մի՛ յաղագս զինուորութեանդ արհամարհեալ զպատուիրանս Աստուծոյ, լինիցիք անհնազանդք առաջնորդաց, որք խրատեն զձեզ պահել զպատուիրանս Աստուծոյ, կամ զսուրբ պահս անօրինաբար լուծանէք, կամ զյափշտակութիւն ընչից աղքատաց եւ զանպարտ արեանց հեղմունս ոչ մեղս համարէք, զի բաց ի հասարակաց պատերազմական սպանմանցն, որք

հրամանաւ թագաւորացն լինին, այլոցն, որ ի ձեռն լինին, ամենեցուն, համարս պահանջելոց է ի ձեռն Աստուած՝ ծանր եւ անաչառ դատաստանաւ:

Նոյնպէս եւ զորս քան զսահմանեալ հռոգսն ձեր անիրաւաբար եւ բռնութեամբ յաղքատաց յափշտակէք, կամ ի տերանց ձերոց ընչից գողանայք, ունիք տալ զվճարն առանց պակասութեան յաւուրս դատաստանի:

Նաեւ քան զայլ հասարակաց ժողովրդականսդ՝ ձեզ առաւել պարտ է երկնչել յԱստուծոյ եւ զպատուիրանս նորա պահել, զի յամենայն ժամ ընդդէմ սրոյ թշնամեաց ունիք պատերազմել:

Վասնորոյ, առաւել քան մարմնական զինուք, հաւատոյ զինովն վառեցարուք, այսինքն՝ աստուածպաշտութեամբ եւ արդարութեամբ եւ սրբութեամբ, պահօք եւ աղօթիք եւ ողորմութեամբ, որպէս զի Աստուած լիցի ախոյեան ի պատերազմունսն եւ զթշնամիսն վանեսցէ առաջի ձեր:

ԱՌ ՔԱՂԱՔԱԿԱՆՍԴ

Պատուէր տամք եւ քաղաքայնոցդ եւ որք ի վաճառափողոցս նստիք գնել եւ վաճառել եւ առ արուեստաւորսդ, զի ուղղութեամբ տանիցիք զկեանս ձեր եւ անարատ քաղաքավարութեամբ:

Եւ մի որ խաբէութեամբ եւ նենգաւորութեամբ վաճառեսցէ զստացուածս իւր անմեղ գնողաց, մանաւանդ ստախօսութեամբ եւ սուտ երդմամբ զռամիկսն եւ զանգէտսն խաբելով, զի ի դատաստանին աւուր ընդ գողս եւ ընդ յափշտակողս դատելոց է այնպիսին, եւ առնու Աստուած զբարեգործութիւնն իւր եւ տայ զրկելոցն ի նմանէ:

Եւ մի եղիցի առ ձեզ կշիռ մեծ եւ փոքր եւ չափ կրկին, «Ձի պիղծ են երկոքեան առաջի Տեառն» [Առակ. Ի 10]՝ որպէս ասաց Սաղոմոն, այլ արդարութեամբ եւ զորդութեամբ վաճառեսցէ զգործս ձեռաց ձերոց եւ զնիւք վաճառոյ ձերոյ, զի մի անէծք զրկելոցն այրեսցէ զգոյս ձեր, այլ օրհնութիւնն Աստուծոյ մտցէ ի տունս ձեր: Եւ մի արհամարիէք զշինականսն, իբրեւ զանգէտս, յասիրէ Աստուած զարդարամիտ կեանս նոցա քան զարաղագս պարզամտութեանն իւրեանց, քանզի առաւել տաւորս եւ զխաբեբայս ի մարդկանէ:

Մի տայք զարծաթ ձեր ի վարձու, ըստ մարգարէին, այնոցիկ որք նեղին ի բռնութենէ իշխողաց, եւ ուտէք զաղքատութեան վաստակս նոցա ի շահս վաշխիցն, այլ որպէս եղբարք կարեկիցք եւ օգնականք լերուք միմեանց:

Եւ զոր տայք նոցա փոխ՝ զայն միայն պահանջիցէք ի նոցանէ եւ շահիցիք զվարձս յԱստուծոյ բազմապատիկ յանանց կեանսն, որպէս եւ հրամայէ Քրիստոս՝ ոչ միայն առանց վաշխից տալ, այլ թէ՛ տուք այնոցիկ, յորոց ակն ոչ ունիցիք առնուլ» [Ղուկ. Զ 34]:

Այլեւ յամենայն գոյից ձերոց տուք ողորմութիւն կարօտելոց եւ աղքատաց, զի այնու սրբեսցի ամենայն ինչ ձեր եւ առնուցուք զփոխարէն ի Քրիստոսէ յաւուրն դատաստանի:

ԱՌ ԵՐԿՐԱԳՈՐԾՍ ԵՒ ՀԱՄՕՐԷՆ ԺՈՂՈՎՐԴԱԿԱՆՍԴ

Լուարուք եւ երկրագործք համօրէն ժողովրդականքդ գխրատ պատուիրանին Աստուծոյ, զոր աւանդեմք ձեզ, որոց մանաւանդ առաւել պիտանացու է դեղ

հոգեւորական առ ի բժշկութիւն ոգւոց, զի եւ դուք առողջանայցէք ի մեղացն հիւանդութենէ:

Որով աղաչենք զձեզ, մի՛ անցաւոր կենացս հեշտութեամբ մարմնոյ, գլաւիտենական հեշտութիւնն հոգւոց, զոր յարքայութեանն երկնից վայելեն սուրբքն կորուսանէք:

Եւ զի տաճար էք Աստուծոյ, որպէս ասաց առաքեալ, եւ Հոգի Աստուծոյ բնակեալ ի ձեզ մկրտութեամբ աւագանին, մի՛ ապականէք պղծալից պոռնկութեամբ եւ շնութեամբ զտաճարդ Աստուծոյ, որ են հոգիք ձեր, զի մի՛ ապականեսցէ զձեզ Աստուած ի դատաստանին աւուր հրով գեհեմին, որպէս եւ գրէ Պօղոս:

Եւ մի՛ արբենայք զինեալ յորում գեղխութիւն եւ յիմարութիւն է, որ է մայր պոռնկութեան եւ ամենայն պղծութեան եւ անիրաւութեան եւ վիճման եւ աղտեղի բանից անարգանաց, յորմէ եւ սպանութիւնք լինին, զի մի արտաքս անկանիցիք յարքայութեանն Աստուծոյ ժառանգութենէ ընդ սպանողս եւ ընդ չարագործս՝ ըստ առաքելական բանիցն:

Եւ թէ ոք ի ձեզնց մեղաւ այսոքիւք Աստուծոյ եւ կամ այլ ինչ յանցանօք, մի կացցէ հանապազ ի նոյն աղտեղի սովորութիւնն մինչեւ ի վախճանին օր, այլ ի ձեռն խոստովանութեան եւ ապաշխարութեան քաւեսցէ զյանցանս իւր եւ գործեսցէ յայսմիտէ փոխանակ չարին զբարիս:

Դարձեալ՝ մի՛ զլեզուս ձեր առնէք գործի սատանայի ի ձեռն չար եւ դառն յիշողաց, մանաւանդ որ զհաւատ եւ զհոգիս անարգին եւ զմկրտութիւն աւագանին եւ զմկրտիչ քահանայն եւ զերեսս եւ զբերան, որ քան զուրացութիւն եւ զթլպատութիւն մեծ են այս յանցանք, զի այլազգիք, որ ուրանալ տան քրիստոնէին զհաւատն, զԱստուած ոչ տան անարգել:

Իսկ այս, որ զհաւատն անարգէ, ոչ զմարդ անարգէ, այլ զԱստուած, զի հաւատ ամենայն աստուածապաշտի՝ Աստուած է, եւ որ զմկրտութիւն եւ զմկրտիչ քահանայն անարգէ՝ առ Հոգին Սուրբ է անարգութիւնն այն, զի նովաւ ծնանին մկրտեալքն աւագանաւն. եւ որ զհոգի մարդոյ եւ զերես անարգէ, նոյն առ Աստուած վերանայ հայիոյութիւնն, զի հոգի յԱստուծոյ է փչումն, եւ երեսն պատկեր է Աստուծոյ, նոյն եւ բերանն ընդունօղ է մարմնոյ եւ արեանն Քրիստոսի:

Եւ արդ՝ մի տրտմեցուցանէք զՀոգին Սուրբ Աստուծոյ այսպիսի զազիր եւ աղտեղի բանիւք, զի մի հեռացի ի ձեզնց Աստուծոյ հոգին, որ բնակեաց ի ձեզ յաւագանին, եւ փոխանակ մտցէ եւ բնակեսցէ ի սիրտս ձեր հոգին սատանայի:

Դարձեալ եւ զայս պատուէր առ հասարակ ամենայն հաւատացելոցդ աւանդենք, զի զմանկունս ձեր երկիւղիւն Աստուծոյ սնուցանիցէք, խրատելով զնոսա ի մանկական տիոց լինել աստուածասէր, ողորմած, աղօթասէր, եւ ուսուցէք նոցա զբանս աղօթից, եւ սաստեցէք չսովորել ի խօսս աղտեղիս եւ ի յիշոցատութիւնս, զի ի մանկութեան ժամանակի առաւել տնկի խրատ ծնողացն ի միտս մանկանցն անջնջելի յիշատակաւ, ընդ որում եւ վարձս բարեաց ընկալչիք փոխարեն ի Քրիստոսէ:

Եւ զլուխ ամենայն բարեաց զսէր առ միմեանս կալչիք, եւ առ աղքատս եւ մերկս եւ հիւրս եւ բանդեալս եւ հիւանդս՝ զկարեկցութիւն եւ զողորմութիւն, որով արքայութեանն լինիչիք ժառանգորդս ի Քրիստոս Յիսուս:

ԱՌ ԿԱՆԱՆՑ ԴԱՍՍ

Պատուեր տամք եւ կանանց ազգի պարկեշտութեամբ եւ բարեծելութեամբ լինել յամենայնի, որպէս եւ վայել է քրիստոնէից, եւ առաւել քան ոսկւով եւ արծաթով՝ անօթխածութեամբ եւ պատկառանօք զարդարել զանձինս ձեր:

Եւ մի՛ որք ի գայթակղութեան պատճառս մեղաց անմիտ երիտասարդաց այլագունեսցէ զգոյն երեսաց իւրոց օտար դեղօք, զի մի՛ զիւր հոգին եւ զցանկացողին ինքեան արկցէ ի գուրն անօրէնութեան:

Եւ մի՛ որք նմանող լիցի օձին՝ գործի անօրենութեան լինելով սատանայի, զոր եւ կաւատն անուանեն, զի որպէս նա եւայի ջամբեաց զպտուղն մահու խաբէութեամբն, նոյնպէս եւ սա զանմիտ կանանց եւ զարանց տայ ճաշակել զպտուղն մահաբեր մեղաց, որ ի սկիզբն քաղցր երեւի անմտաց, եւ յետ կատարմանն դառն, քան զլեղի, որ եւ զանէօս օձին ժառանգեսցէ այնպիսին յԱստուծոյ, զորոյ եւ զգործն ստացաւ:

Դարձեալ՝ մի՛ որք ի ձենջ սատանայական կախարդութեան եւ աղանդոց դեղատուութեան զհետ երթիցէ, զի այլ մեղք ի գործսն է վնասն, եւ այդ ի հաւատն, քանզի կախարդութիւնն ի սատանայէ է, եւ եթէ որք ոչ նախ հեռանայ յԱստուծոյ եւ առնէ զինքն սատանայի պաշտօնեայ եւ երկրպագու, ոչ յաջողին կախարդութիւնքն:

Վասնորոյ աղաչենք ի բաց լինել յայսպիսի մեծ եւ աններելի չարեաց, զի մի ընդ սատանայի դատապարտեսցի այնպիսին ի հուր գեհենին, զի այս գործ կռապաշտիցն է եւ ոչ քրիստոնէից, զոր Քրիստոս եբարձ գալստեամբն իւրով յաշխարհէ զկռցն մոլորութիւնն եւ զգործս նորին չարութեան:

Արդ, մի՛ որք վերստին գործակից լիցի սատանայի՝ չար գործովք կախարդութեան եւ ընդ նմին այրեսցի ի հուր գեհենին յաւիտեան:

Եր եւ այլ ինչ բազումս գրել առ ձեզ յաստուածային պատուիրանաց առ ի զգուշութիւն ի մեղաց եւ յամենայն չար գործոց, բայց զոր պակասն է ի գրոյս՝ ունիք ուսանել ի քահանայիցդ եւ յեպիսկոպոսացդ, որք կարգեալ են յԱստուծոյ տեսուչք հոգւոց ձերոց՝ օր ըստ օրէ համառօտել ձեզ զբանն ճշմարտութեան:

Եւ մեք աղաչեսցուք զՏէր, զի հանցէ ի ձենջ զսիրտ քարեղէն եւ տացէ ձեզ սիրտ մարմնեղէն՝ լինել երկիր արգաւանդ եւ արդիւնացուցանել զսերմն բանիս մեր յոգիս ձեր եւ տալ պտուղ բազմապատիկ ի չափ երրորդին, որով զուարթագին եւ անտրտում երեսօք ասասցուք յաւուրն դատաստանի առաջի արդար դատաւորին՝ ահա ես եւ մանկունք իմ, զոր ետուր ցիս, եւ դասեսցուք ընդ աջեայսն ի յաւիտենական կեանսն՝ ձեօք հանդերձ ի Քրիստոս Յիսուս, ի Տէր մեր, որ է օրինեալ յաւիտեանս. ամէն: -0-